

Zeitschrift: Annalas da la Societad Retorumantscha

Herausgeber: Societad Retorumantscha

Band: 49 (1935)

Artikel: Il temps dellas partidas ella ligia grischa : 1600-1639 : quarta part

Autor: Pfister, Alexander

DOI: <https://doi.org/10.5169/seals-205611>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 11.08.2025

ETH-Bibliothek Zürich, E-Periodica, <https://www.e-periodica.ch>

IL TEMPS DELLAS PARTIDAS ELLA LIGIA GRISCHA

1600 – 1639.

QUARTA PART.

Dr. Alexander Pfister

La Frontscha dat agid 1624.

Bandunond l'armada imperiala gl'avrel 1624 nossia tiara, han Gion Gudegn Schmid de Glion, Gregori Meyer de Cuera, Constantin Planta de Zuoz ed Enderlin de Maienfeld stuiu serender sco perschuniers culla truppa a s. Pieder, per garantir il contract de pasch ed ils avantatgs dell'Austria e digl uestgiu de Cuera¹⁾. L'entira tiara retica schemeva sut las grevezias humilitontas della pasch. Perfin la gronda part dils catolics ella Cadi ed en Lumezia eran irritai e lamentavan sur las condiziuns draconicas dil contract de Lindau. Molina haveva sez animau ils Grischuns de buca approbar las condiziuns dell'Austria. Ella Ligia della casa de Diu era la greta aunc pli gronda, pertgei Rudolf de Planta regeva da Zernez anora en num dell'Austria sco in despot e vuleva ussa organisar la dertgira nauscha, prevedida a Lindau, per cumentar ses sentiments de vendetga; mo al nunci sto el en quels dis rapportar, ch'ei vegni pli e pli malruasseivel, ed era la missiun caputschina en Portenza ed en Giadina, che stava sut la prefectura de pader Ignazi, temeva pigl avegnir in grev combat.²⁾.

¹⁾ Al Rev. Dr. P. Adelhelm Jann, O. Min. Cap., professer a Stans, che ha schau examinar mei sia preziosa collecziun de copias ord igl Archivio della Sacra Congregatio de Propaganda Fide a Roma, exprimel jeu per sia gronda buontad e benevolentscha miu cordial engraziament.

Pareglia Annalas XLV, emprema part, Annalas XLVI, secunda part, Annalas XLVIII, tiarza part.

²⁾ Archiv federal, Bern. Filza 17, Svizzeri, Cavazza al senat, igl 1 de mars 1624. Affaires Etr. Grisons III, Molina a Richelieu ils 26 de schaner 1624 e Sprecher I, 469.

Ils 10 d'avrel 1624 han a Turitg Ulysses de Salis e siu frar Rudolf, Gion Pieder Guler, junior, Heinrich Hartmannis, Guibert de Salis, Nicolaus de Salis, Gion Ant. Pestalozza, Andreas Guicciardi, Vincento Vietdomini, Carli a Marca e Gieri Genatsch rugau il retg de Frontscha instantamein per agid, schend: Nus havein mo las larmas pli, per exprimer nossa sventira. Gl'agid vegn. Miron, gl'ambassadur franzos, haveva gia ils 11 de mars animau la dieta retica de resister allas pretensiuns austriacas-spa-gnolas. Ils 29 d'avrel passa il cardinal Richelieu el cussegli dil retg Ludivic ils XIII ed entscheiva in combat per il predomini franzos ellas Ligias. Miron tracta cun Bern, Turitg ed il Valais per agid; silsuenter tegn el cussegli cun Cavazza, gl'ambassadur venezian a Turitg. Da Paris vegn aunc Mesnil, il schiender de Miron, e tier quel comparan Gieri Genatsch, Ulysses de Salis e Gion Pieder Guler. Genatsch declara en liung discours latin las relaziuns ellas Ligias e presenta in plan d'uiara. Ils capitanis Gion de Mont de Vella, Andriu Brügger e Rudolf de Schauenstein vegnan da Paris a Solothurn, van da leu a casa ed emprovan d'encuraschar lur pievel per il combat, e cul medem intent compara a Solothurn il marquis de Coeuvres sco ambassadur extraordinari. La dieta dellas Ligias a Cuera sto sedecider; ella ha grev de far. Ils deputai della Ligia grischa vulan per part sevolver a Madrid, tier Leopold e tier ils XIII cantuns e descriver la greva posizion della tiara; ils deputai della Ligia della casa de Diu vulan scriver a negin; lur opinuon anfla il pli³⁾). La dieta tarmetta dus umens a Solothurn per beneventar il marquis de Coeuvres. Els expriman il giavisch, de schar ils contracts cull'Austria senza midada, mo lur tiara subdita deigi vegnir restituida. Coeuvres ei surstaus giud las modestas aspiraziuns; el spera, che Gion de Mont, Brügger e Schauenstein vegnien denton ad operar per la revolta. Els han denton daveras relatau a lur confidai dellas preparaziuns a Paris ed en Svizzera, e la dieta dils 30 de fendar ha lu la curascha ded annular la brev adressada pli baul a Coeuvres. Ella giavischa la protecziun dil retg Ludivic ils XIII e surtut l'execuziun dil contract de Madrid. Ina deputaziun va culs novs giavischs a Solothurn. Cheu vegn teniu cussegli sul

³⁾) Archiv federal. Nunziatura svizzera. Scappi al cardinal Barberini, brevs dils 10 d'avrel ed ils 11 de zercladur 1624.

proceder ell'uiara⁴). Per saver armar la truppa grischuna, damonda la Frontscha 2000 umens ord las Ligias en survetsch franzos, cun la stgisa de vuler defender Basilea, che seigi en prighel. Ils cumins ston decider, schebein els vulan conceder la truppa, mo la plipart scamonda de far schuldada. Tuttina entscheivan gia avon la decisiun il settember 1624 ils capitanis a rimnar truppa. Il nunci ei en quitaus pigl uestgiu e per las missiuns caputschinas en Portenza e Giadina e tarmetta siu secretari a Solothurn, per intervegnir, tgei ins prepari, ed el damonda era la Ligia grischa, tgei che la formaziun della truppa munti. Il cauderschader Gioachim de Cabalzar a Mustér pretenda sin quei, ch'el sappi nuot sur igl intent della Frontscha⁵). Era gl'archiduca Leopold survegn novas da ses amitgs, che Schmid de Glion e Montalta rimnien las compagnias ed il colonnel R. de Schauenstein e Gion de Mont fetschien sez recruta; ses adherents smanatschan cun ina dertgira nauscha, mo els san buca impedir l'acziun franzosa. Il project d'uiara de Genatsch deigi vegnir exequius, schegie che Schauenstein e Brügger, sco officiers de professiun, pretendan che quei plan dil predican hagini peis ni mauns. Schauenstein vul gia ussa saver nuot de Genatsch, quel deigi buca vegnir capitani, ferton che Genatsch gauda tutta simpatia de Coeuvres⁶). Salis e Genatsch havevan giavischau de surdar las compagnias a partisans franzos ni venezians, mo suenter lur partenza da Solothurn ha Molina dumignau Coeuvres de far nominar el regiment Schauenstein per part buns spagnols sco G. Tschamun de Florin, Rudolf de Travers, Giacun Schmid de Grüneck de Glion sper Carli a Marca, Gion Catrina de Schons, Heinrich Hartmannis⁷). Naturalmein vuleva Coeuvres cheutras gudognar la Surselva per ses intents; davera era la partida spagnola ella Cadi ed en Lumnezia sin duas, tgei

⁴) Affaires Etr. Grisons III, brevs de Molina a Richelieu dils 26 de schaner e 12 de fevrer 1624. Brügger ha denton gia fatg gronda tschatschra, ferton che Molina ei en suspect, ch'el tracti ni relati tut als adversaris; el stat en bunas relaziuns cul nunci.

⁵) Scappi a Barberini, ils 17 e 24 de settember 1624 (Nunziatura), Brügger e Schauenstein a Coeuvres e Miron, Ragaz ils 30 de settember 1624.

⁶) Cavazza ils 23 d'uost 1624 en Filza 18, Scappi ils 18 de nov. 1624.

⁷) Cavazza al senat, ils 23 d'uost 1624.

far. Ina deputaziun va aunc dabot vi d'Ursera tier il niev ambassadur de Milaun, d'Ogliano, per seconferir e dumandar, sche ins sappi sefidar digl agid de Milaun-Spagna, per cass, che Coeuvres damondi truppa da lur cumins. Coeuvres ha sut maun animau la Lumnezia e la Cadi de s'unir cun el ed intrar ella alianza ded Avignon, per liberar la Valtlina⁸⁾.

Ils 15 de settember vul Coeuvres penetrar cun sia truppa ellas Ligias. L'attacca vegn refiersa silla fin d'october, e denton han ils colonnels e capitanis fatg truppa. Rudolf de Salis rimna ses umens sper il lag de Turitg, marscha cun els a Ragaz e pren da leu anora il pass s. Glieci; il general Du Landé accompogna el. Gion Tschamun de Florin e scarvon Tscharner éin sin via tier Coeuvres, per rugar el de refierer la campagna; els teman il prighel davart l'Austria. Sin lur viadi arrivan els entochen a Wesen e san leu observar, co Salis embarca siu regiment, per traversar il lag Rivaun, ed els tuornan a casa⁹⁾.

Gl'archiduca Leopold ei occupaus egl Elsass, e perquei sa el buca resister all'invasiun franzosa ellas Ligias. Il pievel ellas VIII dertgiras e Giadina bassa spera de vegrir liberaus dall'Austria entras la truppa franzosa, ed ils missionaris caputschins en Portenza bandunan quella vallada. Ils franzos campeschan a Jenins, e leu arrivan il cauderschader Gioachim de Cabalzar e Rudolf de Marmels, prefect Lehner e Fortunat de Juvalta, per salidar e beneventar il general Landé. La truppa s'avonza denton encounter Cuera. A Zezras, che haveva duront il domini austriac giu ina pleiv catolica, arriva il capitani Gieri Genatsch cun siu amitg, il predictant Gion a Porta, pren possess dils beins della pleiv e surdat els ad a Porta¹⁰⁾.

Ils 9 de november vegn Coeuvres sez sur Jenins a Cuera. Gl'uestg, schegie partisan austriac, e siu clerus comparan silla porta dil marcau, per retscheiver e salidar il marchese de Coeu-

⁸⁾ Scappi, ils 22 e 29 de nov. 1624.

⁹⁾ **Rott, E.** III, 800.

¹⁰⁾ Archivio di Propaganda Fide, Roma. Scritture riferite nelle Congregazioni generali, vol. 342, fol. 194, Lucern ils 24 de schaner 1623. Archiv federal, Bern, Nunziatura, vol. 13. Lucern ils 18 de nov. 1624. Gion a Porta era cun Alexis staus perschunier ad Innsbruck e vegnius liberaus tras il pagament de Guler. Blasius Alexander era sco assassin de Pompeius Planta vegnius truaus alla mort.

vres e sia truppa, mo pli ventireivels ein ils predicants; els speran pertut la restituziun de lur pleivs, e Gieri Saluz damonda la permissiun de puspei perdegar a Favugn. Coeuvres cloma immediat sils 25 de november ina dieta de tuttas treis Ligias a Cuera. Quella annullescha la pasch de Lindau ed ils tractats cun Milaun (1623), mo renovescha la pasch perpetna (Erbeinigung) cull'Austria e l'allianza cul retg de Frontscha ed annunzia ina amnestia generala. Tgei che duei ussa daventar, san ins aunc buc. En Surselva spetgan ins, che la truppa occupeschi era la Ligia sura. Ed il nunci ei en tema per la reforma en claustra a Mustér.

Entras Molina roga il nunci ussa Coeuvres, de buca destruir sia lavur per la reforma a Mustèr, ni silmeins metter leu mo schuldada catolica. El di, che la gronda part dils officiers seigien protestants.

Ils quitaus a riguard la truppa franzosa ein denton buca fundai. Coeuvres marscha cun sia truppa — il regiment Salis ordavon — encunter la Giadina e campescha ils 28 de november a Samada. El lamenta sur ils prezis exorbitants, ch'el stoppi pagar als purs ellas valladas grischunas per las victualias. Sia fin e mira ei ussa clara, era al guvernatur a Milaun. Quel tarmetta sia truppa encunter la Valtlina, mo ella retuorna en cuort a Como. Las Ligias survegnan smanatschas da Milaun; il guvernatur pertratga de vegnir sul Gottard e sepostar ad Ursera el dies als Grischuns e Franzos, mo dals cantuns catolics sa el pauc sefidar; spagnols e franzos ein leu in encunter l'auter.

Sil pass s. Gieci ha Coeuvres schau anavos in regiment bernès e quel de Brügger sco guardia; la Giadina ha il colonnel Schauenstein de pertgirar. Quels dus regiments eran mal menai ed havevan pauc buna schuldada. Schauenstein era in um vegl, e Brügger valeva per in nausch ranver e brutal um (vilain, avare, brutal). En plazza de Schauenstein dueva siu fegl administrar il regiment. Salis encuntercomi haveva ina stupenta truppa, surtut glieud engaschada ella contrada dil lag de Turitg.

Cun quella truppa eis el marschaus da Samada ordavon all'armada de Coeuvres sul Bernina en Puschlav. La pintga fortezza de Piattamala ha fatg mo cuorta resistenza, e l'armada — 4—5000 umens — ha en cuort scatschau la truppa papala dil

¹¹⁾ Scappi a Barberini ils 22 e 29 de nov. 1624. Archiv federal.

marchese de Bagno e priu possess della Valtlina; Bormio haveva già avon capitulau. L'entschatta digl onn 1625 ha Coeuvres preparau l'attacca sin Clavenna. La compagnia de Genatsch, che surveva sut Salis, ed autras ein idas a Tirano e sul Bernina e Maloja en Bergaglia e da leu avon Clavenna. Era ils regiments Schauenstein en Giadina e Brügger ed ils Bernès sil pass s. Gieci, han ussa priu quella via, e per pertgirar las Ligias sil pass s. Gieci, ein dus novs regiments vegni formai sin quen della Frontscha; in de quels cun 1000 umens ord la Ligia grischa stava sut il colonnel Caspar Schmid de Grüneck ed ils capitanis Gioachim de Cabalzar, Rudolf de Marmels, Chr. Montalta, Riget de Capaul de Flem, Silvester Rosenroll, Rigett Capaul de Schons, Barclamiu Cazin e Gion Hössli.¹²⁾

La truppa spagnola, che pertgirava la via sillas rivas dil Lago di Mezzola e sper Fuentes si a Verceja e Novate e la val laterala de Codera, ha resistiu. Gl'avrel 1625 ha il regiment de Schauenstein (umens ord la Ligia grischa) battiu a Gordone e Malaguarda e piars leu il schuldau Caspar Lombriser ed il litinent Giachen de Mont, che surveva sut siu aug Gion. Era els combats entuorn il castel de Codera ha quella truppa battiu sut Gion de Mont, che ha cheu sco litinent-colonnel menau il regiment e demussau sia capacitat.¹³⁾ Nuotatonmeins ha en quels dis de primavera 1625 la truppa grischuna fatg grevs quitaus a Coeuvres. Als Franzos muncavan ils daners; il regiment bernès vuleva ir a casa, ed era ils regiments Schauenstein e Brügger vulevan buca survir pli. Duas compagnias dil regiment Schauenstein han in bi di refusau de star guardia encunter gl'inimitg; la truppa lamentava, murmignava e smanatschava, ed il matg 1625 han ils capitanis Schmid, Florin, Catrina, a Marca, R. de Travers e Gion Battesta de Salis declarau, che lur truppa seigi miez niua e marmugni di e notg. Quei era nuot a parti; gia da Piattamala a Tirano eran 200 umens de Coeuvres marschai a pei blut. Vulend ussa Coeuvres attaccar Novate, ina posizion de gronda muntada, han ils Bernès refusau de marschar. Coeuvres era fetg malcuntents. El havess preferiu truppa franzosa e quei tonpli, ch'ils caus dellas Ligias semischedavan ellas interpresas

¹²⁾ Sprecher I, 511.

¹³⁾ Salis, Memorie 223, 224 e 226, Sprecher I, 515 e 518.

d'uiara. El ha perquei rugau a Paris per autra truppa e cussigliau, ded engaschar quella en Uri ed els cantuns catolics, che seporschevan ussa de dar truppa en sold della Frontscha. Duront la stad ha ina greva epidemia spossau la truppa. Ils regiments franzos dumbravan 250 enstagl de 1000 umens; ils Venezians, vegni en agid, havevan 2500 enstagl de 4000 umens. Salis haveva 500 da 1600, ed il regiment de Turitg 60 enstagl de 1000. Tut temeva la mort en Valtlina, e nova truppa era buca de survegnir.¹⁴⁾ Pér gl'atun vegn nova truppa. Coeuvres vuleva sinquei far pasch denter ils subdits e las Ligias. Ils menaders ellas Ligias, surtut era Luci de Mont, havevan adina puspei giu il pertratg de far sez e persuls la pasch culs subdits; mo las Ligias vulevan l'entira tiara e tutta autoritat de pli baul, ils subdits la libertad. L'entschatta de december 1625 han las Ligias tarmess Rudolf de Marmels, Wolf de Montalta, Caspar de Schauenstein, Christoph Lehner, Fortunat Juvalta, Gion Victor Travers, Paul Buol, Paul Walther ed Ulrich Buol tier Coeuvres per dumanadar la restituziun della Valtlina, suenter che Coeuvres haveva pli baul gia surdau Bormio e Clavenna. Quella deputaziun ha conferiu culs subdits e concepiu in contract de 16 artechels, ch'ein silsuenter buca vegni approbai. Il nunci raproschava, che Coeuvres hagi en quellas tractativas giu mo protestants e luvrau en disfavur dils subdits.¹⁵⁾ Ils deputai eran quater protestants e tschun catolics.

La truppa era puspei per part reorganisada. Il regiment Schauenstein era l'entschatta de schaner 1626 ad interim vegnius relaschaus. Gion de Mont haveva fatg ina compagnia ed era marschaus il december 1625 cun quella a Paris en survetsch dil retg de Frontscha.¹⁶⁾ A Clavenna batteva nova truppa franzosa sper il regiment de Salis (culs capitanis Ruinelli, Genatsch, Thomassin e Pestalozzi). La primavera 1626 ha Schauenstein puspei organisau siu regiment, ed il zercladur 1626 ei Molina daventaus il menader de quel, ed ils capitanis ein ussa: Heinrich

¹⁴⁾ Archiv federal, Bern. Aff. Etr. Grisons III, IV, V, la correspondenza de Coeuvres dils onns 1624—1626.

¹⁵⁾ D'Estrée al retg, Sondrio ils 11 de schaner 1626 en Aff. Etr. V. 1626 en Aff. Etr. V.

¹⁶⁾ Gion de Mont a Miron, Lumnezia ils 5 de fenadur 1626 e Malo a d'Herbaut ils 26 de december 1625. Archiv federal.

de Schauenstein, Gion Tschamun de Florin, Carli a Marca, Hercules de Mont, Gion de Marmels, Risch Monitalta, Gieri Planta e Gion Saluz. Tuts capitanis havevan il fevrer survegniu camond de completar lur compagnias. Els han respondiu, che senza daners seigi quei buca pusseivel. Ils 16 de matg han els finalmein declarau categoricamein: Nus seschein buca tractar sin quella moda.¹⁷⁾ Coeuvres ha schau vegnir ils colonnels a Sondrio e tractau cun els migeivlamein; el ha priu 300 umens a mintgin dals regiments Salis e Ruinelli e dau a Brügger il camond de relaschar sia truppa. Ils combats a Clavenna han il matg 1626 priu ina fin. Il regiment Schauenstein ei il settember 1626 vegnius en Valtlina, e leu ei la truppa grischuna e franzosa aunc restada senza occupaziun duront las lungurusas tractativas entochen il mars 1627.

Relaziuns internas. Il contract de Monsonio 1626.

L'armada franzosa haveva priu las tiaras subditas, mo buca sligiau las grevas difficultads internas ed externas dellas Ligias.

El temps della reforma eran nossas valladas da Turitg, s. Gagl e dalla Germania anora vegnididas inundadas dallas ideas e tendenzas dil temps, il spért religius individualistic dil simpel um, che encureva sin sias vias siu Diu; ils desideris democratics e sozials, che vulevan artar ils dretgs feudals, dominavan il moviment, e quel era penetraus sur cuolm ellas valladas talianas-grischunas ed en Valtlina. — Ussa, tschien onns pli tard, regeva puspei in niev e grond moviment spirtal el mund; ei era en general la reacziun encounter il spért individualistic e democratic, che haveva piars empau de sia forza impulsiva. L'autoritat absoluta regeva ils stadis ella politica, e da Roma anora vegneva il pertratg ded impunder tuttas forzas, per reunir tuts cartents cristians sut l'autoritat papala, sut il dogma ed en ina seriusa disciplina ecclesiastica. Quei era spért de Trient e della cunterreforma, e quel regeva ussa pli ni meins il temps ed ils stadis.

¹⁷⁾ La brev ei signada: Ulysses de Salis, G. P. Guler, Carlo Salis, J. Ruinelli, Giorgio Genatio, S. Scavenger, Fortunat Sprecher, Caspar Frisch, Chr. Rosenroll, Joh. Hirschberger, Petter Zechin, Flori Buol e Beli. Aff. Etr. Grisons V. Clavenna ils 6/16 de matg 1626. — Malo a d'Herbault, Sondrio, ils 13 de zercladur 1626, ed instrucziun a Coeuvres, zercladur 1626.

Ellas valladas reticas havevan quellas ideas duront in miez tschentaner fatg mo fetg modests progress. La conquista della tiara entras Leopold 1622 pareva midar las relaziuns e porscher allas ideas romanis il fundament per in grond success. Baldiron, il menader della truppa austriaca, haveva eleminau ils predicans ord Portenza e Giadina bassa, ed ils paders caputschins de Brescia havevan surpriu l'entira pastoraziun sut la direcziun dil pader prefect Ignazius. Els stavan sut la Congregaziun de Propaganda Fide a Ruma cul papa sco cau ed il cardinal Antonio Barberini sco secretari. Els havevan per part reconstruiu baselgias e casas pervenda, intschendradas ell'uiara de 1622; els tenevan survetsch divin, visitavan ils habitants ed empruavan cun gronda fervur de reconduir il pievel tier la baselgia romana. En pliras visch-nauncas, e surtut en Giadina aulta, instruevan magisters la giumentetgna ella grammatica ed ella religiun. En uniun cun Milaun ed igl archiduca Leopold dueva il pievel en val Mustair, Giadina, Puschlav e Bergaglia vegnir convertius, per impedir, che la reforma vegni da cheu anora propagada ell'Italia. Silsuenter dueva la restauraziun della baselgia catolica s'extender sur autras parts grischnas, era sur la Ligia grischa e quella della casa de Diu. Naturalmein operava la propaganda en medem temps era en auters loghens, aschia dalla Savoia anora a Genevra e contuorn, a Basilea, egl Elsass ed en autras contradas. A Cuera eran ils paders dominicans returnai en claustra de s. Clau; la claustra a Cazas dueva tenor ils contracts de 1623 vegnir remessa, ina caussa, che compareva perfin als menaders catolics en Surselva malemperneivla, perquei che la rauba era ca. 60 onns pli baul vegnida partida. Quella facultad vuleva la propaganda ussa impunder per fundar in seminari teologic a Cuera — ina instituziun, che mintga uestgiu dueva ussa survegnir. Talas pretensiuns della congregaziun e ses organs preparavan grevas difficultads, ed ils representants della reforma insistevan, correspondend a lur ideas individualisticas, adina sin la libertad de religiun e consciencia e refusavan de renconuscher in'autra autoritad che la s. Scartira. Internamein eran las Ligias pia stimuladas per in combat religius.

Denton l'absenza dils predicans ed il basegns d'in confiert religius, la pressiun dell'Austria e de Milaun, ha els onns 1622 e

1623 favoriu igl operar dils paders caputschins. Fortunat a Planta a Zuoz e sia familia eran gia dapi 1594 catolics; la decisiu sur la reforma era a Zuoz curdada pér tard.¹⁸⁾ Rudolf de Planta a Zernez ei era, correspondend a sia posizun sco representant dell'Austria, 1623 seconvertius e cun el sia consorta Margreta Travers e sia servitid a Zernez.¹⁹⁾ Il medem onn spera pader Ignazi de haver gudognau quasi tut Ardez entras pader Ireneo, e 1624 era Fetan e Tschlign.²⁰⁾ A Pontresina banduna il predictant Gion Jodoco u Jodazzi sia consorta, probabel ina sora de Gieri Genatsch, e siu bab, secretari en siu vitg natal Zernez, e va da leu sco convertit a Roma. El frequenta silsuenter il collegium helveticum a Milaun, ei cuort temps magister en casa dil marchese de Bagno en Valtlina e viva silsuenter a Roma.²¹⁾ En Puschlav haveva il pievel catolic imitau gl'exempel d'in Robustelli, surpriu 1623 ils protestants e mazzau 30 persunas; 700 habitonts eran sesuttamess alla baselgia catolica, ed igl anteriur predictant Paganino Gaudentio, returnaus ord l'Italia sco pader caputschin, operava en sia patria en uniu cul pader Ignazi. Ord Bergaglia eran ils predictants fugi, mo vulevan returnar, ed il marchese de Bagno en Valtlina patertgava de «clauder ils égls» ad els; la congregaziun de propaganda ha disapprobau quei pertratg sco ina «offesa di Dio».²²⁾ Era en Giadin'aulta duevan ils predictants cun agid dil guvernatur Feria e dil marchese de Bagno svanir.²³⁾ A Chiavenna preparavan ils paders caputschins de fundar ina claustra. A Mustér e Favera dueva la reforma della veta claustral vegnir exequida culla mira de sustener ils intents della missiun retica, era tras ils paders benedictins.

¹⁸⁾ Archivio di Propaganda a Roma, Scritture riferite, vol. 68, fol. 233.

¹⁹⁾ A. d. P., Roma, Scritture rif. vol. 342, fol. 279.

²⁰⁾ A. d. P. Roma. Lettere volgari, vol. 12 e 13.

²¹⁾ A. d. P., Roma. Scritture rif. vol. 391, fol. 395, ils 25 de fevr. 1631.

Havendo tradotto per servitio della missione della Rhetia il trattato del Padre (A)lessio de capienda fide, dalla lingua latina nella romansa. Adumbatten ha Jodoco empruau de converter sia dunna: non può guidar sua moglie alla fede cattolica, che tuttavia sta durissima, crede poter far il divortion e anche entrar in religione se fosse inspirato da Dio (Scritture rif. vol. 342, fol. 97. Milano, ils 25 de zercl. 1625).

²²⁾ A. d. P. Lettere volgari, vol. 2, fol. 89; vol. 3, fol. 7, 51, 81, 1624.

²³⁾ A. d. P., Roma. Lettere volgari vol. 3, fol. 89, 112, 134, 168.

Vegnend gl'atun 1624 Coeuvres cull'armada franzosa ella tiara, ei tut semidau. Sco Gion a Porta a Zezras ein ils auters predicants returnai plein speronza e fidonza ella patria. A Cuera ein il pader Paganino Gaudentio e P. Giovanni Maria dils dominicans sco vicari de s. Clau restai, mo ils convertits han ord tema de vegnir persequitai, tralaschau de visitar il survetsch divin; il pievel en Giadina ha refusau de dar la dieschma e las intradas als paders, e la resistenza encunter ils paders e lur operar ei carschida anetgamein. Ils predicants — il menader era Thunet Vuolp (Clau Antoni Vulpius de Ramuosch²⁴⁾) — han animau lur adherents de buca visitar il survetsch divin dils paders e de preparar per il combat; libertad de conscienzia ei ussa vivamein plaid e pretensiun. Igl archiduca Leopold, Milaun e la congregaziun de propaganda a Ruma vulevan buca desister dalla posizion en Giadina e dals dretgs ecclesiastics, reacquistai 1623. La congregaziun ha perquei admoniu il retg Ludivic ils XIII e cardinal Richelieu de proteger la missiun, e pader Ignazi ei la primavera 1625 ius a Paris e Fontainebleau ed ha duront siat meins empruau de vegnir tier siu intent; el ei returnaus empau combrigiaus, sulet cun speronzas e perschuadius, che ils interess politics decidien la sort della missiun. Havess Richelieu vuliu ademplir ils giavischs de Roma, sche havess el surviu alla Spagna ed Austria, pia als adversaris. En Giadina bassa haveva il pievel denton puspei priu possess dellas casas per vendas, aschia a Guarda, Sent e Tschlign, ed a Suosch era il pre dicant Jan Clos (Gian Nicolaus) returnaus en sia pleiv ed haveva perdegau en baselgia; il medem era daventau a Lavin. Ser Clavuot haveva a Scuol cun siu pievel rutt la porta baselgia, per saver tener survetsch divin, e tenor P. Ireneo haveva el detg en siu priedi: che quelli dell'Agnedina son ben codardi a non far con papisti quanto li cattolici della Valtellina havevano fatto con li suoi questi anni passati quando li amazzaron.²⁵⁾ Duront che pader Ignazi era sin via a Paris, era P. Giacinto l'entschatta de mars ius tier il marchese de Coeuvres en Valtlina e lamentau sur la situaziun en Giadina. Quel era tuttavia buca edificaus sur il

²⁴⁾ Pareglia era Chrestomatie VI, 308.

²⁵⁾ Archivio di Propaganda, Roma. Scritture rif. vol. 342, fol. 8 e 38, avrel e matg 1625.

secuntener dils paders. El reproschava ad els la fugia ord Portenza e disapprovava ina tenonza militanta en Giadina, mo udend el il secuntener de Clavuot e Clos stueva el temer in'acziun dall'Austria, e perquei ha el clamau in representant de mintga vischnaunca, ils predicants ed il commissari Dumeni Gulfin d'Ardez; pertgei Gulfin haveva introduiu ils predicants, schend che Coeuvres hagi lubiu de returnar a casa. Ils predicants ein buca compari, e Giachen Bella de Zernez (perversissimo eretico, pli tard convertit) e Dumeni Gulfin han defendiu ils protestants cun success, pertgei Gulfin ei returnaus a casa sco capitani della truppa de Giadina bassa ed administratur dellas pleivs e lur intradas (per mauns dils paders caputschins); mo la brev smannatschonta, che Coeuvres haveva dau ad el per il pievel de Giadina, ha el supprimiu, ed ils plevons Clos e Clavuot ein restai en lur patria. Els tuccavan ils zenns e tenevan survetsch divin sin cadruvi ni sin plazza aviarta; ils morts sàtrai tenor ordinaziun dils paders ordeifer il senteri en in prau, han els reconduiu el senteri. La resistenza ei carschida. Ei mava ussa las tunas, che Coeuvres hagi elegiu il predicator e capitani Gieri Genatsch sco castellan a Ramuosch, per administrar ils beins e dretgs epis copals, ed il pievel sperava d'anflar en el in herox ni silmeins in menader el combat culspaders caputschins.²⁶⁾ Schauenstein stava per temps cheu cun siu regiment en survetsch de Coeuvres, mo el restava en quels fatgs inactivs. Sin camond de Coeuvres han Schauenstein ed il secretari Antoni Molina radunau miez matg 1625 ils deputai dellas vischnauncas en Giadina bassa, ed ils predicants han puspei survegniu camond de bandunar la tiara. El medem temps dumandava pader Rudolf, il confessur de Miron, che la Giadina bonificheschi tut donn caschunaus alla missiun ed als paders. L'irritaziun dil pievel era gronda, e Molina temeva ina sullevaziun en l'entira Giadina. Las vischnauncas han en ina brev protestau e declarau: ils paders fan a nus grevamein entiert, pertgei els possedan aunc las baselgias, pleivs ed intradas; ils predicants tegnan suenter in liung exil mo survetsch divin privat, e vegnan ils paders ed ils convertits taxai

²⁶⁾ Janatsch, col quale pensano gli eretici nell'Engadina inferiore estirpar la religione cattolica ed ammazzar tutti li cattolici. A. d. P., Roma. Scritture rif. vol. 342, fol. 50 e 60, ils 29 de zercl. 1625.

d'infams, sche daventa quei da privats; mo il pievel damonda ussa la libertad de cunscienzia. Las ordras de Coeuvres han ils Engiadines ignorau, ed il marchese saveva buca stridar ses megliers adherents ellas Ligias; el era cuntents ch'ils predicants desistevan silmeins de tener survetsch divin en baselgias parochialas. Per ils paders eran las relaziuns insurportablas, ed els vulevan viers la fin digl onn 1626 bandunar la tiara, mo a Roma savevan ins buca approbar quella intenziun. Era il nunci ha en quels dis admoniu ils paders tier «mansuetudine e piacevolezza» e de buca smanatschar cun in'invasiun austriaca.

Sper quellas difficultads internas impedevan aunc las relaziuns en Frontscha in success de Coeuvres. Il minister Richelieu menava puspei uiara culs hughenots (1625), ed ultra de quei vulevan ils adversaris buca tolerar siu combat encunter la Spagna e la Curia romana. El ha perquei incumbensau igl ambassadur de Fargis a Madrid, de tractar culla Spagna sur la damonda della Valtlina. Quei era ton pli lev, essend che la Spagna haveva era basegns della pasch.²⁷⁾ Avon che serrar quei marcau, ha el aunc tarmess Bassompierre il december 1625 a Baden en Svizzera tier la dieta federala, per far acceptar quella il contract de Madrid, surprender la garanzia per quel e cheutras impedir in niev e mender contract. Mo a Baden ei era il nunci comparius ed ha pretendiu, ch'ils contracts de 1623 en favur digl uestgiu de Cuera vegnien respectai e la Valtlina remessa en mauns dil papa. Cun risguards visavi las Ligias saveva la Frontscha buca far in tal marcau. Gl'avrel 1626 van lu las tunas, ch'il niev contract seigi serraus a Monsonio en Spagna ils 5 de mars 1626. Cheutras ein ils menaders dellas Ligias en gronds quitaus; els spetgan nuot bien; la damonda sepresenta: tgei ei daventau elles damondas dellas VIII dertgiras e della Valtlina. Las Ligias recamondan la protecziun de lur dretgs al retg de Frontscha e tarmettan el medem senn Rudolf de Schauenstein e Gregori Meyer de Cuera a Baden tiels Confederai. Cuort suenter san ins de resdar il cuntegn dil contract: las Ligias dueian piarder lur dretgs en Valtlina e retscheiver ina summa annuala, che duei vegnir fixada a Paris. Il general Coeuvres ha il zercladur 1626 survegniu ordras de procurar che las Ligias approbeschien quei

²⁷⁾ Rott, IV, 1 p. 5—8.

contract, el saveva persuenter empermetter, che la summa d'indemnisaziun vegni ad esser gronda. Il retg Ludivic ils XIII ha ultra de quei tarmess igl ambassadur Chateauneuf a Veniescha, per rugar la Serenissima de buca sustener las Ligias encunter il niev contract.

* Da Veniescha vegn el en Valtlina. Gion Pieder Guler e Caspar Molina salidan el calonda settember 1626 sils confins, ed ils 14 de settember vegn el a Puschlav tier ina deputaziun dellas Ligias, consistenta ord ils caus: cauderschader G. T. de Florin, caupresident Chr. Lehner e caumistral Guler, lu Rudolf de Schauenstein, Caspar Molina, Fortunat Juvalta, colonnel Andriu Brügger, Dr. Giachen Schmid de Glion e Fortunat Sprecher.²⁸⁾ Chateauneuf ha presentau il contract e fatg valer, ch'el seigi favoreivels, surtut perquei ch'el libereschi las Ligias dals contracts de Lindau e de Milaun; la summa annuala vegni ad esser de muntada, ed ultra de quei haveva el survegniu ordras ded augmentar las pensiuns generalas (che mavan en cassa dellas Ligias) de 1000 sin 1200 livras per Ligia ed empermetter als pli fervents amitgs della Frontscha e dil contract ina piazza de capitani ella garda.²⁹⁾ Ils subdits eran prompts ded acceptar il contract, e legend silsuenter il plevon a Clavenna quel giud scanschalla, resuna dals auditurs il clom: Viva la libertà! Ils Grischuns han a Puschlav declarau: Mai e pli mai! Malgrad tuttas bialas empermischuns eran ils deputai dellas Ligias grittentai. Schauenstein haveva entgins dis avon declarau, ch'ils artechels de Monsonio seigien horribels e cuntraris a tats dretgs e libertads; perfin Clavenna e Bormio, che seigien mai serevoltai, mundien a piarder; ils buns survients dil retg seigien ellas Ligias strusch se'jirs de lur veta, il pievel entscheivi a murmignar e grir encunter els; schizun ils contracts de Lindau e Milaun seigien pli honorif'cs, e las Ligias havessien fatg meglier de tractar sez-zas culs subdits. Ella conferenza a Puschlav han era ils auters deputai fatg grevas reproschas alla Frontscha. Chateauneuf era tut surstaus e respondeva mintgamai als oraturs: Quei viel jeu dir al retg. Ils deputai ein buca senuspi de dir: Mein nus puspei in bi di a Milaun e surdein nus alla Spagna pass e repass, sche

²⁸⁾ **Sprecher**, I, 540.

²⁹⁾ Archiv federal, Bern. Instrucziun a Coeuvres dil zercl. 1626.

survegnin nus meglieras condiziuns. Las medemas remarcas ha igl ambassadur franzos stuiu udir silsuenter a Cuera.³⁰⁾ El ha observau claramein, co las Ligias sepreparavan en quels dis de sevolver tier la Spagna e l'Austria. Era ils catolics en Surselva eran consterni giud il niev contract. Cauderschader Florin ha dumandau Chateauneuf, co ins vegli proteger ils Grischuns, che hagien lur beins en tiara subdita e stettien tuttina buca sut giudicatura dils subdits.³¹⁾ Il contract de Monsonio era daveras aua sil mulin spagnol; quella partida s'cheva aviartamein, ch'ins deigi mo schar marschar ils Franzos a casa e lu tractar ad Innsbruck e Milaun. In secretari de Casati ei quels dis a Faveras e retscheiva leu ils menaders spagnols della Ligia grischa e presenta ils avantatgs, ch'in contract cun Milaun havessi visavi a quel culla Frontscha³²⁾, ed il retg de Spagna lai dir, ch'el vegni a restituir tut als Grischuns, sche quels siarien marcau cun el. Ils ministers digl archiduca Leopold operavan era mintga di els cumins ed animavan de buca acceptar il contract de Monsonio, ed en uniu cull'Austria iuvrava era pader Ignazi; pertgei la missiun haveva tuts interess de combatter la politica franzosa. Adina puspei fageva la partida spagnola valer; sche las Ligias garanteschien la confessiun catolica per l'entira Valtlina e pass e repass, sche sappien ellas a Milaun obtener las condiziuns, ch'ellas veglien. Chateauneuf carteva nuotatonmeins, ch'ina gronda indemnisiaziun annuala per ils dretgs en Valtlina vegni a cumentar tuts, ed il contract de Monsonio sappi lu anflar l'approbaziun.³³⁾ Las Ligias han deputau Florin e Lehner a Baden tier ils Confederal e Schauenstein, igl emprem confidau de Mesmin e della Frontscha, cun Molina e Guler ensemens tiel retg Ludivic ils XIII. Dr. Giachen Schmid de Glion era aschi ligiaus cun la Spagna, ch'el ha refusau de surprender quei uffeci. Carli a Marca, Gregori Meyer e Fortunat Sprecher ein i en Valtlina a rugar Coeuvres de midar nuot, avon che las Ligias hagien fatg lur pass.

³⁰⁾ Archiv federal, Bern. Schauenstein agl retg, Cuera ils 31 d'uost, 9 de sett. e 9 de nov. 1626. Conférence tenue entre Chateauneuf et les deputez Grisons. Chateauneuf a d'Estrée, Cuera ils 19 de nov. 1626.

³¹⁾ Archiv federal, Bern. Chateauneuf a d'Estrée ils 23 de nov. 1626.

³²⁾ Rott, IV,1 pag. 45.

³³⁾ Archiv federal, Bern. Chateauneuf, Cuera ils 30 de nov. 1626.

Rott, IV,1, pag. 243 e 244.

Quellas han ussa offeriu ad el la nova truppa, ch'el haveva pli baul dumandau ed han completau ils regiments de Molina e Ruinelli. La partida franzosa vuleva ademplir tuts giavischs al retg de Frontscha ed ha sin insinuaziun de Coeuvres (ussa marshall d'Estrée) formau il november 1626 in **cussegli dil stadi** ni cussegli secret. Gia dalla dieta dil fevrer 1626 haveva Coeuvres sperau la formaziun d'ina nova regenza, che sappi tractar las damondas politicas senza dumandar ils cumins per lur pareri.³⁴⁾ Coeuvres haveva dumandau in cussegli mo de sis umens ed haveva sperau de saver tschentar sez quels, Guler alla testa. Molina, che dueva direger quella fatschenta ella dieta, ha anflau resistenza. Ina part vuleva 32 cussegliers, in'altra mo in cussegli per l'uiara e quei mo per treis meins. Molina scheva, u «con l'amore o con forza» vegni la dieta a sesuttametter. Il fevrer ha ella buca fatg quei.³⁵⁾ La renitenza derivava dals representants ord la Lumnezia, la Cadi e Glion. Vagnend ussa ils 19 de november 1626 Chateauneuf a Cuera, ha la dieta cun risguard sin las novas dil contract de Monsonio formau in cussegli dil stadi consistent ord 27 umens; la Ligia grischa era representada tras Florin, Giachen Baliel, Hercules de Mont (remplazaus suenter tras siu frar Luci), Christoph Montalta, junior, Crest Florin, Rudolf de Schauenstein, Gion Pieder Schalkett, Gion Schorsch e Caspar Molina. Era ils treis caus havevan de comparer. Ils cumins han denton restrinschiu la pussonza de quei cussegli e condizionau, che tractativas cugl extierur e la lubientscha de schar passar truppa seigien de suttametter a lur decisiu. Quei cussegli ha ussa tractau cun Chateauneuf sur il contract de Monsonio, per acceptar ni midar u remediar el. Gl'ambassadur vuleva far acceptar il marcau e s'excusava, ch'il retg hagi en sias relaziuns visavi la Spagna buca saviu far auter. Ils menaders ellas Ligias vulevan saver nuot dil contract, e Mesauc e Calanca han perfin decretau la peina de mort, a tgi che proponi d'acceptar ils artechels de Monsonio³⁶⁾ En ina votaziun han ils cumins refusau il contract. Era a Solothurn tier la dieta federala han ils

³⁴⁾ Archiv federal, Bern. Nunziatura. Scappi, Lucern ils 17 de fevrer 1626.

³⁵⁾ Scappi, Constanz, ils 12 de mars 1626.

³⁶⁾ Rott, IV,1, pag. 82.

Grischuns saviu urbir nuot. Denton ei lu a Paris vegniu fixau la contribuziun annuala dils subdits silla summa de 25 000 renschs, ed ils 4 de fevrer ei la truppa papala returnada ella Valtlina. Denter ils capitanis de quella truppa era Mazarini, pli tard cardinal e minister a Paris. Il mars 1627 ei Coeuvres marschaus, cun la truppa franzosa ord la tiara. El ha tralaschau 100 000 talers e biaras armas, sinaquei che la Rezia sappi sedefender.

Ils subdits han formau in'atgna regenza e presentau lur novs officials indigens allas Ligias, per schar confirmar els, sco il contract de Monsonio perscriveva. Las Ligias han refusau quei. Gl'ambassadur Mesmin era restaus a Cuera ed empruava de direger las fatschentas. Da Richelieu haveva el ordras ded assister officialmein al nunci, en verdad far nuot, che displagi als Grischuns, ed aschia savevan ils Engiadines sperar sin siu susteniment. Schauenstein, Guler e Molina eran en num dellas Ligias viagiai a Paris, per rugar il retg, ch'el midi il contract de Monsonio e mantegni las tiaras subditas el possess dellas Ligias. En general sesperdevan las speronzas silla Frohtscha, e Molina vuleva denter auter mo la lubientscha dil retg, de penetrar cullas armas en Valtlina. La Frontscha dueva en quei cass urbir la neutralitat dalla Spagna e dall'Austria. Ils deputai a Paris han urbiu ora nuot, pertgei la Spagna vuleva ad interim neginas midadas, ed a Paris operava il capitani Gion de Mont de Vella encunter Molina e siu pertratg de surprender ils subdits cullas armas, enstagl de suttasriver il contract de Monsonio.⁸⁷⁾ Dall'autra vart era lu il retg pauc edificaus, ch'ils de Monts veglien dismetter il cussegl dil stadi ellas Ligias, ed el scheva sche quei daventi, sche vegli el saver nuot pli dallas Ligias.

Ella damonda dell'elecziun digl uestg de Cuera ha la Frontscha aunc fatg valer sia influenza. Gl'uestg Gion Flugi miera en quels dis e pader Ignazi vul cun risguard als interess della missiun l'entschatta absolutamein in Austriac sco successur (canoni Dietrich de Constanz). Il papa giavischa negin adherent dell'Austria,

⁸⁷⁾ Rott, IV,1, pag. 172, 177, 207, 244, 245. Rott plaida dils frars de Mont, quei ei bein in'errur. Molina encureva dasperas era empau nunschenadamein ils agiens interess, surtut ina plazza de capitani ella garda, sco Ulisses de Salis haveva gest quels dis obteniu. Stuend el secuntentar cun ina cadeina d'aur e mo cun empermischuns per ina tala plazza, sch'era el fetg malcuntents.

ed il nunci e Mesmin s'uneschan finalmein sill'elecziun de canoni Mohr, tonpli che quel ei adina staus en relaziuns amicablas cun Miron e cun Gueffier. La Frontscha emprova de gudognar el per ses interess; il retg ha da 1615—20 dau ina pensiun de 100 livras agl uestg; il capetel diocesan damonda ina pensiun era per ils onns 1620—27. Ei retractava era de pagar ils gronds deivets digl uestgiu. Mesmin dat agl uestg 4000 pfunds ed anfla igl uestg tut consolaus ed encuraschaus visavi la pli part dils canonis, che han buca viu da cor sia elecziun.³⁸⁾ Veggend lu il novembre 1627 a Cuera las novas d'ina victoria franzosa sur ils Ingles, celebrescha gl'uestg in solemn survetsch divin e reamonda al clerus ded urar pil retg de Frontscha.

Tut quella premura dil retg ha buca schau emblidar ils Grischuns lur situaziun, ch'il contract de Monsonio haveva schendrau, e la gronda part dil pievel grischun reflectava sur las vias, che savessien menar tier pasch e contract cull'Austria e culla Spagna.

La missiun retica. Tractativas cull'Austria ed il contract ded Innsbruck. 1629.

Interess personals, il survetsch militar, dumandavan aunc da biars menaders risguards per il retg de Frontscha, mo en general giavischava il pievel grischun ruous e bunas relaziuns culs vischins, cull'Austria e Milaün. Naturalmein haveva la missiun retica adina in avantatg de menar il pievel sin quellas vias.

La partenza de Coeuvres e sia truppa il mars 1627 haveva giu per ils paders caputschins e lur adherents grevas consequenzas. Gia las novas dil contract de Monsonio havevan nutriu la pissiun denter ils paders ed il pievel protestant. Ina commisiun haveva il zercladur 1626 a Zuoz empruau de pacificar las parts; era Gieri Genatsch seseva denter ils mediaturi; el gudeva la confidanza de ses compatriots engiadines; il contract de Monsonio disapprobava el seo ils auters Grischuns e veseva a veggend il di, che quels mundien a Milaün ed Innsbruck a tractar la pasch. Bein ord quella perschuasiun vuleva el finir il combat en Giadina. Gl'atun 1626 han ils caus clamau el da sia truppa a Morbegno puspei a Zuoz, per menar ses compatriots ord quei «chaos» tier ruous. Ils Engiadines paran

³⁸⁾ Archiv federal, Bern. Mesmin al retg, Cuera ils 29 d'uost 1627.

strusch d'haver adempliu ses giavischs.³⁹⁾ Vagnend lu els medems dis Chateauneuf da Veniescha neu ella tiara, ha Gieri Genatsch cussegliau a ses compatriots, de dumandar l'assistenza digl ambassadur, per obtener dals paders las baselgias, pleivs ed intradas ni silmeins saver guder las baselgias ensemens culs catolics. Quei cussegli han ils predicants discussionau en ina sinoda e suondau el. Denton a Roma discussegliava la congregaziun de propaganda il survetsch divin en ina baselgia comunabla.⁴⁰⁾ Pader Ignazi era sepresentaus gia en Valtlina a Chateauneuf ed haveva discret las relaziuns, e gl'ambassadur haveva cussegliau ad el de vegnir a Cuera. Leu ei Chateauneuf selamenatus sur il tractament dils missionaris, ed ils deputai della Ligia della casa de Diu han animau ils Engiadines de schar cun pasch ils paders.⁴¹⁾ Ils predicants han tenor il conclus della sinoda tarmess ina deputaziun dils lur cun in representant de mintga vischernaunca a Cuera tier Chateauneuf. Quel ha confruntau els cun pader Ignazi, che ha repetiu sias reproschas. Chateauneuf ha tarmess els a casa cun nauschs plaids (li mandò via con male parole). Sinquei ha el pretendiu, che

³⁹⁾ Haffter, E., Urkundenbuch p. 89 e 90.

⁴⁰⁾ Archiv federal, Bern. Affaires Etr. Grisons 6, Mesmin a d'Herbaut, Cuera ils 22 d'oct. 1628. Archivio di Propaganda, Roma Scritture rif. vol. 68, fol. 316.

⁴¹⁾ Archivio di Propaganda, Roma, vol. 68, fol. 326, ils 15 de nov. 1626. Las lamentaschuns de pader Ignazi serepetan en ina brev, ch'el scriva da Constanz ils 28 de november 1626: perche questi predicanti havendo adherenza della maggior parte di quei popolazzi heretici, tutto il loro studio è in provocarli et incitarli contra di noi, et de poveri cattolici, a quelli fanno mille torti, et ingiustitie, essendo li giudici heretici, li villegiano, li perseguitano, sino al sangue, et gli è impossibile il poter vivere fra loro, e professare la fede cattolica, a noi rompono gli altari, profanano li cimetterii, ci levano dalli nostri hospitii le porte et li tetti, li riempano di mille immonditie, e ce ne hanno occupati diversi li medesimi predicanti. S'andiamo per le terre per dire la Messa a quei puochi cattolici vengono contra di noi le donne con bastoni, dalle finestre ci tirano delle pietre e dicano mille villanie, e se qualche persona ci vuol fare qualche servitio è persequitata sin alla morte, non possiamo havere n'anco legna d'accender il fuoco, e sono necessitati li operarii medesili ad andare ne boschi a pigliare le legne, et lavorare come tanti facchini, et tutto ciò viene da predicanti perche ci vorebbono pure per ogni modo scacciare et levare quei pochi semi della religione cattolica. A. d. P., vol. 68, fol. 328,

las Ligias tarmettien dus commissaris en Giadina ad intermediar la pasch. Las baselgias ed intradas dellas pleivs duevan restar als paders; il giavisch de pader Ignazi, de bandischar ils predicans ord la Giadina, ha el buca adempliu.⁴²⁾

Strusch ei la truppa de Coeuvres stada ord la tiara, sche han ils protestants en Giadin'aulta e bassa occupau las baselgias e persequitau ils convertits, e quels ein seradunai tieis paders en casa pervenda; ils jasters (catolicks) han stuiu bandunar la vallada. Ils Engiadines vulevan denton secundentiar de guder las baselgias u avon ni suenter il survetsch divin dils paders.⁴³⁾ Rudolf Planta ei sin las novas della sullevaziun en Giadina returnaus dal casti de Ramez sper Meran a Zernez, per assister als paders ed ha immediat dumandau la protecziun digl archiduca Leopold, temend el de vegnir surprius e mazzaus u bandischaus.⁴⁴⁾ Leopold haveva gia dau camond ded arretar e menar a Fürstenburg ils protestants de val Mustair, che vulevan en quels dis introduir il predican. Semigliontamein havevan ils protestants a Puschlav la mira de clamar a casa lur plevon. Ils protestants sereferevan en quellas interpresas sin Mesmin. Quel ha occasionau ils caus ded eleger Travers sco commissari en Giadina bassa, per far restituir las baselgias als paders, mo ils paders schevan, ch'el detti mo buns plaid. Veggend il zercladur 1627 la dieta a Cuera, ein ils deputai della Giadina compari cun plevon Thunet Vuolp e pader Ignazi, accompognaus dagl uestg e siu decan, e duront treis uras han els representau las relaziuns als deputai della dieta. La decisiun ei curdada en favur della missiun: tuttas baselgias de Giadina bassa e val Mustair, eregidias avon la reforma ni dals paders (pia dals catolicks), duevan vegnir remessas als paders, ed aschia era las intradas dellas pleivs. Il pievel de Giadina ha refusau ded exequir quei conclus, e la dispeta mava vinavon.

La missiun ha en quels dis entschiet ad operar en outras parts dellas Ligias. La pleiv de Domat haveva tarmess ina deputaziun tier il nunci a Lucern e dumandau P. Ireneo, che ha-

⁴²⁾ A. d. P., vol. 68, fol. 12, Lucern ils 12 de dec. 1626.

⁴³⁾ A. d. P., vol. 68, fol. 53, Lucern ils 29 de mars 1627.

⁴⁴⁾ A. d. P., vol. 68, fol. 281, Zernez, ils 25 de matg 1627.

veva viviu tschun onns ad Ardez, sco plevon de Domat. P. Ireneo ha en decuors d'in onn uniu la minoritad protestanta culla baselgia catolica (12 persunas). Gia 1628 ha Rueun clamau P. Ireneo e siu compogn pader Giovanni della Viangie per la pastoraziun a Rueun, Andiast e Pigniu. El ha en Surselva propagau cun fervur ils pertratgs della propaganda.⁴⁵⁾

A Ruma insistevan ins, che la reforma dellas claustras benedictinas vegni ussa exequida, sinaquei che quellas possien survir allas ideas della propaganda, per l'uniun della baselgia cristiana. A quei intent duevan ils administraturs a Mustér survir, che fuvan leu dapi 1623. Arrivond l'armada de Coeuvres 1624, haveva gl'avat de Castelberg capiu ded eleminar quels dus paders; els lamentavan, che gl'avat seigi sesurvius de siu parents colonnel Rudolf de Salis, per stridar els ed occasionar lur partenza. Gl'avat vuleva profitar della nova situaziun e tractava cun Salis, cul magistrat della Cadi, cun menaders politics e cul marschal Harcourt sur sia restituziun a sia prelatura. Il magistrat vuleva remetter Castelberg en sia dignitat, sco el haveva pli baul elegiu el; udend el, che la congregaziun benedictina hagi dismess el, ha il magistrat desistiu da siu project. Il nunci ha lu sin cussegli dils dus administraturs e dil plevon

⁴⁵⁾ Quelli di Rovano pure nella lega grisa intesero la buona vita et frutto che li capuccini facevano nelli sopradetti luoghi et per ritrovarsi già tempo fa anch'essi senza curato, mescolati, et circondati d'intorno d'heretici fecero anch'essi istanza al Padre Ignazio per un predicatore che havesse cura dell'anime loro. Haveva di già il Padre Ireneo redotto le cose in Damed a buon termine et si era procurato un buon prete allevo del collegio helvetico di Milano per loro curato . . . In questo luogo (Rovano) hanno questi Padri fatta fabricar una chiesa parochiale, perche la vechia era molto al'inordine, et con la loro diligenza et operare manualmente insieme con li maestri, a'quali procuravano essi con elemosine il salario, cosa di molta edificatione et frutto in tutti contorni . . . Archivio di Propoganda Fide, Scritture riferite, vol. 343, fol. 307, pareglia la raquintaziun de Clemente, F. P. Istoria delle Missioni nella Rezia, pag. 274.

Bein la pli impurtonta fontauna historica per Rueun e contuorn ei el Archivio di Propaganda: Miscellanea. Svizzera — tomo III, fol. 1. Visitatio ecclesiarum Missionis Rouanensis et Taraspiae etc. p. P. Marinum Brixianum, Capucinum. 1639. Dasperas ei in voluminus rapport de P. Marinus sur l'entira missiun retica ord igl onn 1639 in fetg impurtont document per la historia grischuna en general.

Sacco a Mustér surdau las fatschentas al pader clastral Giorgio. La restituziun digl avat en sia dignitat vuleva la congregaziun a Roma nuota tolerar. Era divers paders (ei eran en tut mo 5) giavischavan, che Castelberg resti suspendius da sia prelatura per adina. Sin giavisch dil nunci haveva la congregaziun destinau la claustra de San Salvatore sper Pavia sco refugi a Castelberg, ed ils paders, che vivevan e sedivertevan a Mustér ellas ustrias sco laics, duevan vegnir spedi en otras claustras. Castelberg ha refusau ded ir a Pavia, ed ha denton empruau de cumentar ses superiurs tras sia veta e demanonza.⁴⁶⁾ Igl uost 1627 suenter la partenza de Coeuvres, era il nunci arrivaus a Cuera; igl uestg era sin murir, la missiun en Giadina periclitada, ed il nunci vuleva tractar cun Mesmin. Quella caschun ha gl'avat priu; el ha tarmess il cauderschader Sigisbert de Rungs e mistral Giachen Balliel et auters adherents e menaders a Cuera, per intermediar tiel nunci e rugar quel, ch'el remetti puspei gl'avat en sia dignitat. Paucs dis pli tard ein igl avat ed il viceprior P. Conrad sepresentai a Cuera, e gl'avat ha surdau in memorial al nunci. En quel dumandava el ussa sez novs reformaturs per la claustra e lu la restituziun de sia prelatura. Ils paders sustenevan igl emprem giavisch e combattevan il secund, ferton che Mesmin ed ils menaders ord la Surselva plidavan en favur digl avat. Il nunci vuleva nuota decider la caussa senza la congregaziun benedictina ed ha tarmess il vicari general e prevost Gion Zoller a Mustér. El ei returnaus cun bunas impressiuns priu ora l'administraziun entras igl avat.⁴⁷⁾ Gl'onn suondont ei lu pader Ireneo vegnius a Rueun, ed el ha el senn della propaganda operaue per la reforma della claustra a Mustér e gudognau ils menaders per quei intent. En quels dis ha la missiun era entschiet ad operar en Sursès; Lonsch ei daventau il centrum per quella part, e leu ei P. Ireneo pli tard secollocaus. En general era la missiun re-

⁴⁶⁾ Archivio di Propaganda, Roma, vol. 68, fol. 27, Lucern ils 2 de fevr. 1627 ed ils 13 de mars 1627; vol. 6 lettere volgari, Roma ils 13 de mars 1627.

⁴⁷⁾ Archivio di Propaganda, Roma. Vol. 130, fol. 96—100, il rapport de Zoller. Sur quellas damondas ei de pareglier Archivio glottologico VII, 242—46, ed Annalas 48, pag. 70. La „Cuorta memoria“ semuossa era cheu sco ina fontauna tendenziusa.

tica ussa ina pussonza spirtala e pli ni meins era politica ella Rezia. Ses interess eran ligiai cun Roma, Milaun ed Innsbruck, e quellas vias politicas mavan ussa, principalmein suenter il contract de Monsonio, sūrtut ils umens della Ligia grischa de tschartamein. Luci de Mont, ils Schmids de Grüneck a Glion, mistral Giachen Balliel, Giachen de Turre, cauderschader Sigsibert de Rungs ed auters vulevan ussa far ina fin al cussegl dil stadi, scaffius da Coeuvres. Els cussegliavan als cumins de nuota respectar ils conclus de quella autoritad, e vegnend il cussegl clamaus tier la radunanza a Cuera, vulevan els simplamein buca comparer. Mesmin pretendeva, che quei seigi tut urgiu dals Schmids e da Mont cun il niev guovernatur spagnol a Milaun Don Gonsales.⁴⁸⁾ Il congress grond a Cuera ha sinquei stuiu cumentar ils Sursilvans, concedend dus deputai dapli alla Ligia grischa ed in dapli alla Ligia della casa de Diu; il cussegl dil stadi ha el pudiu mantener.

Mesmin, il representant dil retg Ludivic ils XIII, haveva surtut sin Dr. Giachen Schmid de Grüneck ina speciala greta. Quel seseva el cussegl dil stadi ed haveva tuttina urgiu las novas relaziuns culla Spagna. El era staus a Genua en atgnas fatschentas tier siu amitg Gion Maria Vertemann de Plurs. Quel stava en connecziuns amicablas cugl ambassadur spagnol, il marchese de Castaneto, ed en quella societad ha Dr. Schmid empruau de delucidar la damonda della restituziun dellas tiaras subditas. El ha relatau quei als deputai e caus ella patria, e quels han incumbensau el de turnar a Genua e continuar a s'orientar, sch'ei dessi vias de tractar culla Spagna. Sin via a casa ha el entupau a Pavia il niev guovernatur Gonsales de Cordova e naturalmein era plidau cun el sur la caussa, tonpli

⁴⁸⁾ Archiv federal, Bern. Mesmin a d'Herbaut, ils 19 de december 1627. Archiv cantonal, Cuera. Genatsch als caus, ils 16 d'oct. 1628. Luci de Mont haveva mai bandunau la politica spagnola, malgrad la vegnida de Coeuvres. El haveva en quei temps giu relaziuns cul capitani Baldeger a Blizuna e quel haveva occupau la via a Roveredo. De Mont era cheutras malvesius ellas Ligias e tier Coeuvres. Ils Confederai catolicks han 1625 era refusau ad el de confiscar el Tessin en sia favur la rauba dil cavallant Klaus Hörly de Lumnezia. Eidg. Absch. V, 2 p. 431 e 1830. — Don Gonsales ha dau a Luci de Mont 600 ducatas, per sefar cauderschader 1628.

ch'el enconuscheva Gonsales. El era staus a Milaun a salidar el sco niev guovernatur, sco Gonsales haveva giavischau. En num della Spagna fageva Gonsales ussa tutta breigia, per acquistar l'amicizia dil pievel grischun. Era Guler, il menader dellas X dertgiras, ed auters anteriurs venezians, s'occupavan cul pertratg de s'approximar alla Spagna. Els supposevan cun buna raschun, che la nova posiziun della baselgia catolica damondi risguards politics e che las Ligias stoppien conceder alla Spagna, che mo la baselgia catolica hagi in dretg d'exister en Valtlina. Quei vulevan els era far en il ner basegns e s'accordar culla Spagna e l'Austria; mo Genatsch era en survetsch militar de Veniescha ed haveva auters interess. Mesmin vuleva segidar cun pagar las pensiuns allas Ligias ed a privats, che havevan susteniu el, ed el scheva, cun 100 000 livras vegli el puspei entscheiver a tractar sur la ratificaziun dil contract de Monsonio.⁴⁹⁾

Culla partenza de Coeuvres haveva era il survetsch militar calau, ed officiers e schuldada encurevan paun. Gion de Mont, Schauenstein ed Ulisses de Salis fagevan truppa per il retg de Frontscha. Per buca stuer dumandar ils cumins per la lubientscha de far truppa, haveva Salis acquistau il consentiment dil cauderschader Luci de Mont.⁵⁰⁾ — Autras roschas mavan discus a Veniescha tier Gieri Genatsch. El haveva gudiu la favur de Coeuvres ed era suenter la partenza de quel ius a Paris, per prender leu survetsch militar; ins veseva leu aunc il manti de predican e vuleva saver nuot ded el. Genatsch era stridaus, mo spetgava sin meglies temps. A Paris haveva igl ambassadur venezian Zorzi cussegliau a Genatsch il survetsch ell'Italia, e cuort suenter ha quel fatg marcau a Veniescha.⁵¹⁾ Il cussegl dil stadi haveva scumandau quei survetsch, il pievel murmignava encunter il conclus, e Genatsch defendeva da Veniescha e Turitg anora siu secuntener e sia simpatia per la Serenissima e per il retg de Frontscha, e Mesmin sosteneva el. Entras siu survetsch a Veniescha era Genatsch sin

⁴⁹⁾ Archiv federal, Bern. Affaires Etr. Grisons. Mesmin a d'Herbaut, ils 10 de schaner, 3 e 6 de fenadur e 5 ded uost 1628.

⁵⁰⁾ Salis, Memorie pag. 258, 261.

⁵¹⁾ Haffter, Urkundenbuch, p. 92 e s.

via de daventar in um fetg beinstont; aschia era sia posiziun empau capeivla.⁵²⁾

Da mesa stad 1628 fa Mesmin aunc in'oprova, de defender la posiziun de siu retg. El passa avon ils caus e cussegli dil stadi e declara, ch'il retg vegli tenor l'allianza de 1602 liber pass per sesez e ses amitgs, e quei pertucchi Veniescha. Las Ligias deigien arver il pass alla truppa per la republica veneziana ed al niev duca de Mantua, Carli de Gonzaga-Cleve, duca de Nevers.⁵³⁾ Da l'autra vart stoppien las Ligias disapprobar las praticas de Dr. Giachen Schmid a Milaun. Il cussegli dil stadi ei sedefendius, ha dumandau il pareri dils cumins e quels han susteniu el. Sis deputai han purtau la liunga risposta a Mesmin en siu domicil. Mesmin era tuttavia buca cuntents cul cussegli dil stadi; pertgei el concludeva las caussas senza tadlar siu pareri, e quei fageva gronda malaveglia. — Molina ei quels dis era turnaus a casa. A Paris haveva el plidau cul resident digl imperatur a Vienna, Mathias Vertemann ed haveva declarau, che las Ligias reticas renovassien «l'uniun hereditara» ni «pasch perpetna» de 1518 cull'Austria, sche quei savessi daventar claramein. Vertemann era sin quei ius a Praga tier gl'imperatur ed haveva silsuenter ils 8 de fenadur dau part a Cuera, che l'Austria seigi prompta de tractar. Da Cuera anora era Fortunat de Juvalta perquei viagiaus ad Innsbruck, per plidar sur la fatschenta. Mesmin era irritaus encunter Molina e carteva che quel meini el davos la cazola.⁵⁴⁾

Ton cull'Austria sco cun Milaun eran aschia tractativas urgidias; quei correspondeva als basegns politics ed als sentiments dil pievel grischun e surtut era allas relaziuns digl exterier, che dumandavan risguards pigl imperatur. Sias armadas sut Tilly e Wallenstein marschavan victorisond tras la Saxonia, Slesia, Braunschweig, e l'armada de Mansfeld era svanida dal camp

⁵²⁾ Haffter, E., Jenatsch, 226 e s. Sprecher I, 581. Archiv federal, Bern. Mesmin a d'Herbaut, ils 19 de fenadur 1628.

⁵³⁾ Vincent Gonzaga era morts il december 1627 e Carli de Gonzaga-Cleve pretendeva la jerta. El era vegnius sur Cuera il schaner 1628, per ir a Mantua, e capitani Stiafan This fageva truppa per el. Veniescha ha priu partida per el. Spagna-Milaun susteneva siu rival, il duca de Guastalla.

⁵⁴⁾ Affaires Etr. Grisons 7, Mesmin ils 27 d'uost 1628.

dapi il combat sper la pun de Dessau (1626). Il retg de Danemarc seretergeva avon las truppas imperialas en sia patria. Alla cuort imperiala a Vienna speravan ins sin ina restauraziun della baselgia catolica en grondas parts della Germania. Il medem dueva daventar ella Rezia cugl agid della missiun; perquei havevan las Ligias de sperar pauc ad Innsbruck. Mesmin vuleva spartamein far acceptar il contract de Monsonio, per buca schar curdar las Ligias sut il predomini austriac-spagnol e subir las consequenzas; perquei ha el l'entschatta de settember 1627 aunc inagada declarau, ch'el vegni a dar negins sclariments sur la fin e mira della politica franzosa, entochen che las Ligias hagien buca approbau il contract de Monsonio. Mo tut adumbatten, la counterpart era pli e pli activa. Ferton che Juvalta mava sco deputau ad Innsbruck, era Dr. Schmid de Glion puspei sin via a Milaun, naturalmein cun consentiment dils caus. Cun tutta forza vulevan ils menaders ussa vegnir a riva cullas tractativas a Milaun ed Innsbruck. Novs umens eran ussa (1628) vegni tras ils cumins alla testa; p. e. haveva la Cadi de Tschuncheismas elegiu Giachen de Turre sco mistral ed haveva clamau a casa ord il cussegl dil stadi Balliel e remplazzau el tras il mistral en uffeci, schegie che l'elecziun el cussegl era ina caussa della dieta ni silmeins pauc clara. Auter stava ei a Glion. Ils Schmids de Grüneck havevan leu cumprau la mistralia per 12 onns — ina caussa mai s'udida — ed els vulevan buca ceder ord il cussegl dil stadi, schi malvesi ch'els eran tier Mesmin e la Frontscha.⁵⁵⁾ Tier tuts quitaus vegn gl'atun 1628 la pestilenza ella tiara. Il cussegl dil stadi fui a Glion; Mesmin va tier siu confidau, colonnel R. de Schauenstein a Fürstenau. Gia l'entschatta ein las unfrendas della muria fetg numerosas.⁵⁶⁾ Gl'onn 1629 ha lu aunc purtau il fomaz. Mesmin sefidava empau sillla influenza de Schauenstein ella politica della Ligia grischa. Mo ils caus ed il cussegl dil stadi a Glion han nuota sesshau stermendar ed han tarmess ina deputazium, consistenta ord Guler, Juvalta e Schauenstein, a Fürstenau; quella ha pro-

⁵⁵⁾ Archiv federal, Bern. Affaires Etr. Grisons 6, Mesmin a d'Hau-baut, Cuera ils 15 d'oct. 1628.

⁵⁶⁾ Sur ils mortoris pareglia Annalas 27, Pfister, A., Sur la carschen e digren della populaziun el Grischun.

testau encunter ils dazis, ch'ils subdits havevan senza consentiment dellas Ligias mess sin rauba d'export, ed han lu annunziau, che las Ligias veglien tractar cull'Austria sur la renovaziun della pasch perpetna de 1518. Quei era in lungatg, che fageva nuota lignar. Mesmin ei sinquei tut irritaus e di: Ei para a mi necessari de mortificar empau ils Grischuns, per curar els de lur garmischia. El spera, che las Ligias vognien ad Innsbruck tier negin marcau; a Milaun haveva Schmid denton daveras tractau senza success.

Ils 15 de november 1628 vognan da Paris las novas, che la fortezia de La Rochelle seigi prida; Mesmin suppona, che la Frontscha hagi ussa de disponer sur novas forzas. El va pers. Andriu ad Almens a festivar en in survetsch divin la pasch de siu retg culs hughenots.

Fortunat de Juvalta era returnaus dad Innsbruck culla sperronza, ch'ei vegni tier ina pasch cull'Austria. Las difficultads eran bein grondas. Ei fuva la damonda, schebein l'Austria remetti las VIII dertgiras, concèdi alla Giadina e Portenza libertad de cunscienzia e desisti de transitar las valladas grischunas cun truppa. Il combat dils paders e catolics en Giadina culla populaziun protestanta continuava era egl onn 1628. Ils paders pretendevan aunc adina adumbatten la restituziun dellas baselgias tenor conclus della dieta; ils amitgs della Spagna e dell'Austria temevan, che sut talas relaziuns savessien las tractativas ad Innsbruck esser periclitadas, ed il cauderschader Luci de Mont ha cuortamein declarau al pader Ignazi, ch'el e ses partisans, ils catolics en Surselva, veglien saver nuot pli dallas dispetas en Giadina, e sch'ils paders sappien buca setener leu, sche deigien els bandunar la vallada. E Mesmin sapeva era buca sustener ils paders; el fuss cheutras mo s'allontanaus da ses paucs partisans ed havess catschau quels ella bratscha dell'Austria.⁵⁷⁾ Gl'archiduca Leopold encuntercomi uleva ina pasch, senza unfrir la posiziun della missiun retica e l'idea della restauraziun della baselgia romana sin ses confins ellas Ligias.

⁵⁷⁾ Archivio di Propaganda, Roma vol. 131, 17, Clavenna ils 6 de nov. P. Ignazi scriva: . . . hora trovo che mi hanno solo pasciuto di parole, et la manco assistenza mi vien fatta da cattolici grisoni, quali particolarmente m'hanno detto per bocca del capo della lega grisa, che poi non

Ils 28 de december 1628 cavalcheschan Luci de Mont, Fortunat Juvalta ed Andriu Sprecher ad Innsbruck, per renovar leu la «pasch perpetna» de 1518. Ils commissaris digl archiduca, denter els Maximilian Mohr, tractan en tutta curtesia, gie els concedan l'incorporaziun della Giadina bassa e Portenza allas Ligias reticas, mo la posiziun ed ils interess della missiun e digl uestgiu de Cuera defendan els cun la pli gronda fervur. Pader Ignazi ei presents e dat plaid e cussegl als commissaris en fatgs della missiun e digl uestgiu; el vul far neginas concessiuns ed ha igl archiduca Leopold da sia vart. Rudolf de Planta, che ei era presents, para de capir meglier l'imporzonza d'ina pasch cun ses partisans ellas Ligias ed empermetta de sez intermediar la pasch en Giadina, ils paders dueian secuntentar a Zernez culla baselgia veglia, e Planta vul dar ina casa per-venda alla missiun.⁵⁸⁾ Las novas d'ina pasch ed independenza eran gia penetradas en Portenza, ed il pievel giubilava. Las condiziuns de Leopold eran denton meins favoreivlas, che la fama e davan buca la libertad religiusa. — Ils deputai ein returnai a Cuera avon la dieta (22 de schaner 1629), e quella ha presentau il project de pasch als cumins. Quels ein insisti silla «libertad de cunscienzia» en fatgs de religiun. Culla medema caschun han ils caus era surdau als cumins ina protesta de Mesmin encunter las tractativas ad Innsbruck e las pretensiuns digl uestg, che dumandava la restituziun de tuts dretgs e possess dil temps feudal. Mesmin vuleva impedir il marcau cull'Austria e cussegliava ded acceptar il contract de Monsonio.⁵⁹⁾

vogliono saper altro delle cose dell'Egnadina, et che se noi non possiamo trattenerci ivi, che dobbiamo partire. Nè meno posso sperar aiutto alcuno dal signor nominato ambasciatore quale credo, volontieri c'aiutarebbe hora, ma non può, perche questi Grisoni gl'hanno del tutto voltato le spale, et si volgono alla parte della Serenissima Casa d'Austria, parrendoli non poter la loro republica subsistere senza la buona corrispondenza con quella, come più vicina. Si che ho pensato di transferirmi quanto prima a Inspruck, ove doveranno convenire 6 Comissari Grisoni per trattare col serenissimo Arciduca Leopoldo, et io spero di ottenere col favore di quell'Altezza qualche buon successo per gl'interessi della santa fede delle nostre missioni

⁵⁸⁾ Archivio di Propaganda, Roma, vol. 131, fol. 66, 68, ils 12 e 14 de schaner 1629.

⁵⁹⁾ Sprecher II, 6. Mesmin survegn ils 24 de matg 30,000 livras, ed il

Ils 14 de mars 1629 tarmettan ils caus in «dils pli fins», sco pader Ignazi di, il commissari Caspar Schmid de Grüneck ad Innsbruck culla decisiu dils cumins; el duei urbir la libertad de cunscienzia. Pader Ignazi suonda ils 15 de mars a pei ed arriva malgrad neiv e stemprau paucas uras pli tard che Schmid ad Innsbruck. El sto per siu displascher observar, che Leopold entscheiva a far concessiuns. Igl operar de Mesmin sforza empau leutier. Schmid vul la libertad dil cultus evangelic en Portenza e Giadina, e Leopold insista sil possess de treis baselgias en Portenza. Siu cancelier lai denton sperar, ch'el vegni a tolerar il cultus e la construcziun de baselgias evangelicas. Schmid re-tuorna cunts a Cuera e spera, che tut vegni ussa acceptau. Paucs dis suenter dementescha Leopold ils plaids de siu cancelier. Duront ch'ils cumins decidan sur la risposta a Leopold, vegn la surpresa.

Ils 29 de matg 1629 marschan 12 000 umens truppa digl imperatur sut il comt Merode sul pass s. Glieci encunter Cuera. La truppa duei penetrar ell'Italia alla conquista de Mantua. A Milaun vulan ins en quei mument buca la truppa per tema della pestilenzia. Merode lai ereger fortificaziuns dal pass s. Glieci tochen en Schons e resta ella tiara. Gl'imperatur drova la stgisa, che la pasch de Lübeck seigi aunc buca signada e da l'autra vart la raccolta ell'Italia buca fatga. Gonsalez lai buca vegnir garnezi ella Rezia, ed en cuort regia ellas valladas grischunas sper la muria il fomaz. Il pievel sto furnir fier, lenna, crappa e caltschina per las fortezias, far paun, e la schuldada engola la biestga ord nuegl e cumpra nuot.⁶⁰⁾ Per part fuian ils umens e van a rugar a Cuera e contuorn. La miseria crescha talmein, che las Ligias ston vender alla schuldada il garnezi, che Turitg dat ad ellas per la fom. Ella Ligia grischa compara la truppa sezza buc, mo tut mal, ch'ella ha purtau, la muria e la fom, ed era cheu miera ina tiarza dil pievel. Ei regia ina miseria sco

retg vul ussa interpretar il contract de Monsonio en favur dellas Ligias — Genatsch ei en survetsch de Veniescha, mo quels dis a Tavau tier sia familia. El sto udir, che il pass deigi vegnir serraus alla Serenissima; per-quei eis el encunter quellas fieras ad Innsbruck ed encunter igl operar de de Mont e Schmid, che ein en quella caussa ils capoacturs.

⁶⁰⁾ Archivio di Propaganda, Roma, vol. 131, fol. 75, Innsbruck ils 3 de matg 1629.

la Rezia ha quasi mai viu. Ils imperials han naturalmein arretau Mesmin a Cuera e pertgirau él en sia habitaziun en tut siu far e demenar.

Las Ligias han tarmess ina nova deputaziun ad Innsbruck, consistenta ord Luci de Mont, Gion Pieder Schalkett, remplazaus tras Florin, Gregori Meyer, Fortunat Juvalta ed a. En medem temps haveva Leopold era clamau pader Ignazi ad Innsbruck, per representar ils interess della missiun e digl uestgiu. Ils deputai han empruau ded acquistar la libertad de cunscienzia per ils de Giadina e Portenza. Ignazi era cuntents, che ella Giadina bassa fussi mo la baselgia catolica tolerada. La missiun ha sut protecziun dellas armas imperialas saviu far progress. Ils deputai ein returnai cun pign success. Las Ligias han ils 8 ded uost stuiu signar a Cuera ina convenziun cull'Austria, semiglionta alla pasch de Lindau. Tenor quella curdavan la Portenza e Giadina bassa puspei all'Austria sco subdits, mo astgavan s'alliar cullas duas outras Ligias; pass e repass eran libers agl imperatur ed all'Austria, ed igl uestg dueva vegnir en possess de tut sias pretensiuns.

La Ligia grischa haveva l'entschatta dell'invasiun temiu, che la truppa vegni en Surselva. Uri ha cuñinagada offeriu de vegnir en agid, e la dieta federala a Solothurn ha concludiu de gidar als de Mesauc cun las compagnias el Tessin.⁶³⁾ L'entschatta digl onn 1630 tarmetta il retg de Frontscha igl ambassadur Bassompierre; el vegn cun «60 méls cargai cun aur» e vul secusseegliar en Svizzera, co catschar la truppa imperiala ord las Ligias. Quella ei tras la muria e deserziun reducida sin 2000 umens. In'attacca sco quèlla de Coeuvres sul pass s. Glieci ei buca pusseivla muort. las fortezias; il pertratg de penetrar tras la Surselva e sur Ragaz en ina, vegn ventilaus. Ils Mesolcinès survegnan tras Gion Paul daners, per resister alla truppa imperiala. Il comt de Merode va tras la Surselva a Mustér ed Ursèra ,per s'orientar, co el vegli sedefender cheu, sche Bassompierre arrivi cun truppa. En quels temps ei era

⁶¹⁾ Salis, Memorie, p. 280 e s. Juvalta, Fort., pag. 97. Rott, IV,1 p. 415.

⁶²⁾ Sut las armas imperialas di Ignazi: spero non puoco aiuto per gli interessi di Dio et delli suoi fideli. Vol. 131, fol. 78 ed 81, Coira ultimo maggio 1629.

⁶³⁾ Rott, IV,1, p. 369.

Wallenstein returnaus da sia campagna encunter il retg de Danemarc e stat cun sia truppa imperiala denter Constanz e Memmingen en Suevia. Era el ha queidas de penetrar ell'Italia, ed ella Ligia sura van las tunas, ch'el savessi sin via vegnir ella Surselva. Il menader Merode smanatscha cun fiuc e spada als Grischuns, sch'els tractien cun adversaris digl imperi ni cun la Frontscha. Dalla Ligia grischa ha el gl'emprem pretendiu, ch'ella declari aviertamein, ch'ella prendi buca part ded ina campagna dils Franzos e Confederai encunter la truppa imperiala ella Rezia, e finalmein duei la Ligia grischa empermetter, ded unir sia truppa cun quella de Merode. Detschartamein defaran cauderschader Florin ed il congress, che quei plaid vegnien els buca a dar. La fidonza silla Frontscha ei pintga. Genatsch e Guler renconuschan bein, che la Frontscha hagi agiens interess a Mantua en égl. Perquei emprovan ils menaders a-dina puspei, de s'approximar al guvernatur de Milaun. Il mars 1630, ils dis che Bassompierre ei arrivaus en Svizzera, va ina deputaziun, consistenta ord cauderschader Florin, Gregori Meyer, Gion Sprecher, Rudolf de Marméls, G. P. Schalkett, Fortunat Juvalta, Gion Travers, Meinrad Buol, Paul Waltier, a Milaun ed Alessandria a salidar il niev guvernatur Spinola e giavischar la restituziun dellas tiaras subditas. Schalkett miera a Milaun della pestilenzia; ils auters retuornan il zercladur senza success a casa. E tuttina viva en Surselva la simpatia per la Spagna. Era las relaziuns dils menaders spagnols, sco de Mont, Florin ed a., cul pader prefect Ignazi vegnan pli amicablas.

Ferton che las difficultads internas regian, ei la Frontscha penetrada cullas armas tras la Savoia ell'Italia ed ha victorisau. A Chierasco vegn tractau sur la pasch (ils 6 d'avrel—19 zercladur 1631). Gl'imperatur tema en quels dis era ils gronds success de Gustav Adolf, il retg della Suezia, che marscha das nord enneu tras gl'imperi german. El sto far pasch e denter auter era empermetter de bandunar cun sia truppa las Ligias e devastar las fortezias ni schar ellas alla libra disposiziun dellas Ligias.⁶⁴⁾

⁶⁴⁾ Archiv federal, Bern. Frari, Svizzeri 25; Scaramelli, ils 14 d'oct. e 30 de nov. 1630 e Rott, IV,1, p. 407—412 e 425. Affaires Etr. Grisons 7, 158. Mémoires pour Du Landé, Fontainebleau, ils 18 d'avrel 1631.

Ils Franzos retuornan ellas Ligias 1631.

Per controllar, schebein la truppa imperiala banduni la tiara, vegr il niev ambassadur Du Landé, che haveva surviu ell'armada de Coeuvres, ils 29 de februar 1631 a Cuera. El ha ordras de cumprar sut maun il material d'uiara dals officiers imperials, acquistar praus, uaul e casas dil pass s. Gieci ed immediat suenter la partenza de Merode e sia truppa reconstruir las fortezias dil pass e tschentar leu tras il colonnel Brügger ina guardia. Lu duei Landé empruar de far pasch denter ils subdits ed ils Grischuns sin fundament dil contract de Monsonio e sias midadas. Ils 10 de settember 1631 ei la davosa part della truppa imperiala ida sul Spligia a Clavenna. Leu ha Feria reteniu il comt de Merode e detg, ch'el spetgi ordras da Madrid ded occupar ils pass retics.⁶⁶⁾ Denton ha Landé preparau tut sco ordinau. Ils Grischuns, surtut ils menaders en Surselva, havevan viu pauc bugen a vegr Landé; mo il scarvon Tscharner vegneva en quels dis da Chierasco e saveva de resdar, co Feria hagi combattiu leu ils interess dils Grischuns e la Frontscha protegiu els, e quei e la memoria dil contract ded Innsbruck han en cuort temps stimulau ils Grischuns pli ferm per la Frontscha.

Il colonnel Brügger haveva menau 100 umens sil pass s. Gieci; per augmentar quella guardia, ha Landé survegniu camond, de trer la truppa franzosa ell'Italia tras las Ligias e per part salvar ella cheu. Tut quellas preparaziuns han vilentau igl archiduca Leopold, che haveva disapprobau la pasch de Chierasco, perquei ch'ella liberava la Rezia dalla truppa imperiala. El stava perquei aunc en relaziuns cun ses adherents, sperond de vegr tier ina fin en tuttas differenzas, e vuleva renovar u megliurar las convenziuns dils davos onns. Era il guvernatur Feria era malcuntents; el carteva, che la partenza della truppa imperiala seigi la ruina della baselgia catolica en quellas contradas reticas. En quella perschuasiun vuleva il pader Ignazi encuraschar l'Austria d'occupar la Giadina bassa e quei tonpli, ch'ils predicants smanatschavan ded ussa catschar

⁶⁶⁾ Rott, IV, 1, p. 524 e 531.

ils paders caputschins ord la tiara e surprender ils convertits.⁶⁷⁾ Era Luci de Mont, cauderschader en uffeci, spetgava nuot bien, e cun ses partisans vuleva el puspei sligar il cussegli dil stadi, che era adina staus ina spina els égls de sia partida. Ils 20 de settember 1631 serimna la dieta a Domat; pertgei a Cuera regia la muria sil pli ferm. Landé ei presents, el paga la dieta, el dat pensiuns, e surtut ha el dal retg Ludivic ils XIII ordras de gudognar il cauderschader Luci de Mont, per haver siu agid en tuttas interpresas projectadas. Als capomenaders dat Landé summas de 4—500 livras; ils treis caus stattan ussa cun Landé, per tractar sur tuttas fatschentas, ed el paga ad els ina schurnada d'ina pistola (quei ei 10 livras; ina dublona ha 20). En uniun culs caus vul Landé organisar la defensiun dils pass encounter ina invasiun austriaca, ed el propona de formar treis regiments, mintgin de 1000 umens. La dieta ei prompta de dar il consentiment; gie ils menaders proponan, che Landé deigi

⁶⁷⁾ L'invasiun imperiala de 1629 haveva favoriu la missiun, e quella haveva giu novs success; ell'entira Giadina havevan ils plevons reformai stuiu untgir u emigrar. Surtut pader Donato da Valcamonica a Scuol gudognava la populaziun (versatissimo nelle controversie, ha appresa la lingua del paese così bene, che li par naturale). A Ramuosch haveva plevon Thunet Vuolp stuiu bandunar la pleiv, mo admoneva il pievel de resister alla missiun, entochen che ils Franzos retuornien (et di presente manda giornalmente lettere a questi popoli, che guardino a non venire alle nostre prediche, perche preste veranno essi, et rimettiranno tutti loro alle sue prebende, et con tali speranze mantiene questo popolo nell'ostinatione. Vengono però molti alla predica massime huomini, ma maggior ostinatione è nelle donne. Archivio di Propaganda Roma, vol. 343, fol. 100, ils 17 d'avrel 1631. Donato ei morts dalla pestilenzia 1636). Semiglions progress fa la missiun surtut tras pader Ireneo en Sursès, en Tumliasca ed en Surselva. Igl avat de Castelberg e paders vegnan eliminai ord claustra, gl'uestg propona ded ereger a Mustér in seminari teologic, e pader Ireneo tracta culs menaders politics ed era cun pader Ignazi sur quella questiun (Archivio di Propaganda, Roma. Vol. 72, fol. 219, ils 15 d'uost 1631). Igl ambassadur franzos Du Landé ha lu da Paris instrucziuns de combatter Luci de Mont e pader Ignazi, ed el accentuescha era, ch'il retg vegli nuota donnegiar la baselgia catolica, mo il pievel grischun stoppi haver sia libertad (il retg a Landé, Compiègne, ils 15 de settember 1631 ed Archivio di Propaganda, Roma, vol. 72, fol. 242, Lucern ils 16 d'oct. 1631). Gl'uestg va en Giadina a visitar las pleivs e pader Ignazi accompagna el; mo la primavera 1632 miera il pader Ignazi, la pli impurtonta forza impulsiva della propaganda ella Rezia.

prender 10 000 umens sut las armas. La buorsa dil retg de Frontscha tonscha buca aschi lunsch, mo el vul far 5000 umens schuldada, sch'el duess haver basegns; quels anfla el sufficients. Las Ligias ein sblutadas ed en stermentusa pupira; ei maunca vivonda, daners, armas. Landé dat daners, per continuar las fortificaziuns; en cuort temps ein 80 000 talers duvrai. Entochen il november 1631 ein ils menaders ed il pievel per gronda part sereconciliai culla Frontscha, e las relaziuns cun Leopold continueschan mo singuls, sco p. e. Travers. Era las relaziuns digl exteriur ein midadas; ils 17 de settember 1631 ha la truppa imperiala sut Tilly stuiu su ttacumber a Breitenfeld en Saxonia als Sueds sut Gustav Adolf, e Feria, che haveva, observond las preparaziuns de Landé, tarmess empau truppa encunter la Valtlina, mida ussa suenter miez settember 1631 ses projects, pertgei era il retg de Spagna ha exprimiù il giavisch de tener pasch. Feria cusseglio schizun als subdits, de s'accordar cullas Ligias, e Giachen Venosta vegn per quei intent a Cuera. In accord dat ei buca.⁶⁸⁾ La dieta a Maienfeld ed ina tala a Tumein (ni el casti a Rehanau) han continuau las fatschentas cun Landé. El ha priu ils treis regiments grischuns sil quen dil retg e numnau ils menaders, era anteriurs adherents de Spagna; per la Ligia grischa il colonnel Rudolf de Schauenstein cun il colonnel-litinent Anton Molina ed ils capitanis L. Tschudi, Luci de Mont, Dr. Giachen Schmid de Grüneck, Gion Coray, Ambrosi Planta, Chr. Rosenroll, Gion Schorsch, Carli a Marca e Caspar Molina; Ulysses Salis, Andreas Brügger cun Genatsch meinan ils dus auters regiments.⁶⁹⁾

Calonda November 1631 ein ils 3000 Grischuns presents e passan en survetsch della Frontscha. Il guovernatur Feria fa aunc in'emprova d'impedir in'acziun franzosa ella Rezia; el tar metta il comandant della fortezia Fuentes a Cuera ed offerescha de tractar cullas Ligias sur tutt giavischs. Ils deputai secusse glian in'jamna e vulan finalmein saver nuot da Feria. Els speran ussa, che la Frontscha pertgiri lur tiara e remetti las tiaras subditas cun las armas en lur possess.

⁶⁸⁾ Archiv federal, Bern. Affaires Etr. Grisons 7, p. 167, Fontainebleau ils 11 d'oct. 1631.

⁶⁹⁾ Genatsch era returnaus da Veniescha, mo viveva a s. Gagl, empau

Ils 4 de dezember 1631 arriva il **duca de Rohan** a Cuera. El vegn da Veniescha enneu ed ha menau leu truppa franzosa, per pertgirar il pass. Landé ha già survegniu il camond de preparar tut, per retscheiver la truppa franzosa, ch'ei destinada de vegnir da tuttas varts ella Rezia, ed ils menaders ellas Ligias ein tuts cunents, plein speronza e demuossan, ton ils catolics sco ils protestants, la pli gronda confidonza enviers il «bien duca». Rohan ei hughenot, in un de stupenta educaziun e morala, consciensius e religius; el ha spert in'affecziun per Genatsch — che ei en biars graus il contrast dil duca —. Rohan recamonda instantamein Genatsch al retg entras Bouthillier. El survegn la risposta, che sche Genatsch continueschi de survir sco èl passau, sche vegni il retg a renconuscher ses merets. Cert haveva Genatsch entras siu temperament e sia premura gudognau Landé, surviu a quel cun cussegl, e Rohan stava cun Genatsch sil medem pei.⁷⁰⁾ Luci de Mont, ussa capitani franzos, va il settember 1632 cun Rudolf de Salis a Lucern a dumandar igl agid dils cantuns catolics; Dr. Giachen Schmid, Finer e Buol van cul medem intent a Baden tiels protestants, e la Frontscha ueglia buca meins, de sustener las Ligias. Rohan vul in'armada de 6000 Grischuns, 4000 Svizzers, 4000 Franzos cun 600 cavals, Ed ussa plaida Rohan buca mo della defensiun dellas Ligias; ei lai capir, che la tiara subdita vegni restituida. Ord Germania vegnan novas dils success dils Sueds; ellas augmentan las speronzas ella Rezia, ed era Rohan ei perschuadius, ch'il mument de marschar en Valtlina seigi favoreivels sco mai avon; mo Landé ei scuius, che Rohan ei daventaus il menader ed ambasadur extraordinari, ed el declara al retg, che la campagna

per tema dils Austriacs, che vulevan schizun far extrader el, e per haver counterfatg als camonds dellas autoritads, fagend truppa per Veniescha. Il fevrer 1631 va el en Frontscha, schegie ch'el ha in onn avon declarau, che da quellas varts seigi nuot de spezgar. Il matg 1631 eis el a Turitg (Rott, IV,1, p. 516) e vegn ussa en relaziuns cun Landé. Igl atun, duront che Landé tracta a Domat culla dieta, va Genatsch, per incumbenza de Landé, cun in ingenier franzos Beau ed aunc in auter a Riva Chiavenna, bein per spiunar e controllar leu fortezias, che Merode ha buca schau destruir. Da leu anora va el en Frontscha, ed ils 29 de november eis el puspei anavos e passa, favorius da Landé, el regiment Brügger (Archiv federal, Fontainebleau, ils 12 d'oct. 1631).

⁷⁰⁾ Rohan ils 17 de mars 1632 (Archiv federal).

en Valtlina vegni cara e seigi buca senza gronds prighels. E Rohan survegn la primavera 1632 il camond, ch'el duei ad interim continuar culla construcziun dellas fortezias, augmentar l'armada per 1000 Confederai e prender aunc treis compagnias Grischuns per regiment, per cuntentar surtut ils catolics en Surselva ed unir il pievel grischun culla Frontscha. Il retg tarmetta 200 000 talers a Rohan, per finir tuttas preparaziuns de defender las Ligias.⁷¹⁾ Rohan elegia puspei anteriurs partisans della Spagna sco capitanis per las novas compagnias, ord la Ligia grischa Giachen Baliel, Rudolf de Marmels, Hercules de Mont ed Heinrich de Schauenstein. Christoph Montalta survegn ina compagnia sut colonnel Brügger. Treis canuns della Ligia grischa vegnan menai da Glion sil Pass s. Gieci.⁷²⁾

Duront las elecziuns della primavera 1632 emprova Rohan de far sil tierm s. Gieri in cauderschader de sia pasta. Era Feria e Leopold spargnan buca daners e breigia; Ambrosius de Planta-Wildenberg a Razen vegn elegius, in um suenter gavisch de Rohan.⁷³⁾ Puspei emprovan las Ligias de survegnir agid dils Confederai, e Luci de Mont, colonnel Guler e Gregori Meyer van cun Rohan a Baden; els vulan saver definitivamein, sch'ils Confederai dettien lur truppa en agid. Surtut ei d'impurtonza, tgei ils cantuns catolics concludan de far, pertgei Rohan di, sche Feria anfli il Gottard aviarts e sappi vegnir ad Ursera, sche seigi el cun las Ligias piars. Il meins d'uost arriva in niev regiment ord Frontscha, che vegn direct sut il comando de Landé. Tonaton croda negina decisiun a riguard in'attacca silla Valtlina; pertgei las interpresas dil retg dependan dals evenements exteriurs, surtut en Germania, e buca dals gavischs dils Grischuns.

⁷¹⁾ Rott, IV,1, p. 597.

⁷²⁾ Quella truppa vegn pagada dals 21 de schaner 1632 naven. Ils capitanis vulan quintar la compagnia de 90 per 100 umens; quei ei tscheu e leu daventau en survetsch jester. Ils 3 regiments cuosten alla Frontscha 383,400 livras en sis meins, las expensas totalas della Frontscha per meins 1,348,411, tenor in auter quen 1,742,951. Ils regiments franzos survegnan 15,560 il meins, in grischun 22,370; il paun sto il schuldaу franzos pagar sez; al Grischun paga il retg quel. Il plum lai Rohan cavar en ina miniera grischuna (Rohan, igl 1 de zercl. 1632).

⁷³⁾ Landé a Bouthillier ils 8 de zercladur 1632.

Ils 4 d'avrel 1632 ha Gustav Adolf battiu Tilly a Rain sper il Lech; quella victoria dils Sueds, la conquista dil Palatinat e de parts della Baviera preparan puspei grevs quitaus agl archiduca Leopold. El tema, che Gustav Adolf vegni el Tirol; el suppona, che Rohan seigi da Cuera anora en relaziuns cul retg della Suezia. E daveras, Rohan e Gustav Adolf stattan en correspondenza. Il retg della Suezia offerescha a Rohan de penetrar cull'armada ni ina part de quella a Constanz e Lindau; gie, el ha il pertratg de veginir ellas Ligias, a Cuera, d'occupar il Spligia e Bernina, ni pertgirar il Spligia cun in'armada e schar marschar las Ligias alla reconquista della Valtlina e star denton davos lur dies. Aschia vul el serrar tuttas vias da Milaun tras la Valtlina e las Ligias ell'Austria. El offerescha 6000 umens per quei intent.⁷⁴⁾ Il guovernatur Feria ei en gronds quitaus; el spetga in'attacca dils Franzos da Montferrat enneu ed ina dils Sueds ord las Ligias, e sin agid sa el buca sperar; gl'imperatur ei sez battius. Era gl'uestg tema las consequenzas d'ina invasiun tras ils Sueds.⁷⁵⁾ Auter ils menaders dellas Ligias; els spetgan tut bien da Gustav Adolf e fusan beai de ver el in bi di marschar da Maienfeld a Cuera. Els speran surtut sin la restituziun dellas tiaras subditas.

Rohan damonda a Paris la permissiun de tractar cun Gustav Adolf; el vul ussa entscheiver la campagna en Valtlina. Il retg snega quei; pertgei a Paris han ins en quels dis empau sgarschur giud il success dils Sueds e vul buca la cumpleina terrada dils catolics en Germania, e surtut vul il cardinal Richelieu buca renovar l'uiara ell'Italia u en Valtlina; el vul secunvegnir a risguard la restituziun dellas tiaras subditas; quei damondan ils interess della Frontscha.⁷⁶⁾

Mo en in cass duei Rohan s'unir culs Sueds, quei ei, sche l'Austria e la Spagna empruassien in'offensiva. Veginend lu cuort suenter il zercladur (1632) las novas, che Gustav Adolf seigi seviults encounter Nürnberg, ein ils Grischuns puspei decurschai. Las Ligias han ils 23 de zercladur insistiu — ei era gia

⁷⁴⁾ Rott, IV,1, p. 621.

⁷⁵⁾ Rohan a Bouthillier ils 20 de februar 1632.

⁷⁶⁾ Rott, IV,1, p. 624, Archiv federal, Bern, Affaires Etr. Grisons 8, Rohan a Gustav Adolf, Cuera ils 7 de zercladur 1632.

memia tard — che la campagna en Valtlina e la restituziun vegnien exequidas senza retardar; mo il secretari de Rohan vegn ussa da Paris cun las novas, che la truppa stoppi vegnir reducida. Era ils daners muncavan. Rohan haveva retschiert il davos temps 200 000 livras e pagau als capitanis il sold della truppa per il schaner e fevrer; treis meins era el aunc culponts. Il meins ded uost retscheiva Rohan aunc 300 000 livras, ed el paga ils Grischuns per il mars ed avrel 1632 ed il regiment Landé mo per dus meins. En quella situaziun survegn Rohan sez ordras, ded ir a Veniescha. 500 pistolas restan ad el per siu viadi. Bein emprova Rohan de perschuader Richelieu, che la interpresa astgi buca vegnir refiersa. Tut ei adumbatten.⁷⁷⁾

El representa tut las relaziuns; ils Sueds ein demaneivel, Leopold ei morts (ils 13 de settember 1632), Feria ei en tema, la schuldada ell'Italia per part en revolta, e dat il retg a mi truppa, sche ei la situaziun buna. Il general franzos Toyraz vegn da Montferrat, ils Sueds molestan il Tirol, Veniescha duei gidar, e tut sto reussir. Gl'unviern ei per nos projects favoreivels, las auas pintgas. Rohan vul era buca stridar ils Grischuns entras relaschar lur truppa, quei vul dir 50 umens per compagnia, sco el ha ordras. Gia ussa auda el las reproschas dils Grischuns, che dian: L'Austria havein nus bandunau e stri-dau, ils Franzos fan nuot per nus e relaian la truppa. Ultra de quei lamentan ils capitanis; els ston pagar la truppa e far dei-vets, e la schuldada marmugna; tut il viver ei cars, e cun tut ei il pievel aunc malidis. Rohan vul aunc il november 1632 5—6000 pistolas, per saver pagar e continuar las fortezias; sia guardia de 50 umens sto el pagar ord sia atgna buorsa. La risposta da Paris arriva pér la fin de november. Landé, Boul-lion e Coevres, ils adversaris de Rohan, han gidau a cungir la sort dil bien duca e fatg crer, che Rohan vegli propagar la re-forma ellas Ligias, perquei hagi el mess sco cauderschader in protestant (Ambrosi Planta), el stetti en relaziuns secretas cun Gustav Adolf e culs protestants Svizzers e vegli arver als Sueds la via sul Spligia a Ruma, encunter il papa! — Richelieu haveva sez bein empau fauls suspects sin Rohan. Avon che

⁷⁷⁾ Rohan a Richelieu, Cuera ils 28 de settember 1632. Affaires Etr. Grisons 8,48.

la risposta vegni da Paris a Rohan, han ils Sueds ils 5 d'october passau la Donau, e Gustav Adolf ei ils 16 de november 1632 morts ella battaglia de Lützen. Ils 5 de dezember arriva quei rapport a Cuera. Cun la risposta negativa dil retg ensemens han quellas novas preparau ina vera consternaziun e greta en medem temps. La truppa lamenta; Franzos e Grischuns desertan. Rohan lai sittar giu entgins Franzos, per stermentar ils Grischuns de fugir; el tema ina revolta ellas visch-nauncas, nua sia truppa ei campada. Ils capitanis comparan avon la commissiun de quens, radunada a Cuera e declaran, ch'els hagien fatg deivets, pagau immens tscheins ed ussa vengnien els relaschau. La situaziun ei tresta.

Rohan crei, ch'ei retracti a Paris mo dil daner; mo Veniescha ha declarau, ch'ella giavisci negina acziun, e la Spagna ha dau ordras a Feria de conservar cun tutta precauziun la pasch. Aunc inagada scriva Rohan a Paris, co ils Grischuns plaidien, e ch'ils spagnols aulzien la vusch encunter ils partisans franzos. Las Ligias tarmettan ils 27 de november 1632 Dr. Giachen Schmid de Glion cun Tschudi e Stuppa tiel retg. Els san mo observar, ch'ils adversaris de Rohan, il pader Giusep e Bouillon insistan sil contract de Monsonio; il retg e Richelieu laian sperar els empau meglier. Denton ha Rohan malgrad tuttas protestas relaschau la truppa tochen sin 1000 Grischuns (in regiment cullas compagnias de Luci de Mont, Giachen Schmid, Ambrosius Planta e Rosenroll ect.).

Avon che viagiar a Veniescha, ha Rohan aunc scret ina brev al retg e repetiu sia supplica, ch'il retg deigi pagar il deivets ellas Ligias. Ils capitanis havevan otg meins buca survegriu ils daners per la schuldada; quei fageva in dabien de 750 000 livras. Els havevan tscheu e leu fatg gronds deivets e pagavan in tscheins ded 1 % il meins. Rohan sez lamentava, ch'ils daners, ch'udes-sien als pasterners pil paun alla truppa, schagien ella trucca dil retg. El haveva fatg empristar daners en Svizzera ed a Cuera tiel banchier Stiafen Reidt, per saver finir las fortezias avon serrar unviern.⁷⁸⁾ Ussa, che Rohan vuleva ir nave, ein ils capitanis secussegliai, schebein els veglien salvar a ferm el, per

⁷⁸⁾ Da Stiafen Reidt ils 30 d'oct. 1632 VIIMVC L., a Pietro Gonnello sco spiun en Giadina, per observar il transport de puorla e muniziun

survegnir lur dabien. Rohan haveva sez dapi dus meins retschier negina paga. El ei partius da Cuera cun grevs quitaus, tralaschond la Rezia irritada ed agitada sil pli ault; pertgei ins temeva in'invasiun dell'Austria u digl imperi e da l'autra vart la sperdita dil dabien. Landé ha sez aschi pauc credit, ch'el sto rugar tscheu e leu per daners ad imprest, ed Ulysses de Salis, Brügger e Genatsch ston esser leutier gideivels.⁷⁹⁾ Aschia va igl onn 1632 alla fin.

Rohan va e retuorna 1633, novs prighels e viriveris.

Il duca de Rohan ha ils 11 de schaner 1633 bandunau nossa tiara. Avon sia partenza eran aunc las novas della battaglia de Lützen dils 12 de november 1632 arrivadas. La truppa imperiala haveva subiu ina greva terrada entras ils Sueds, e gl'imperatur e la Spagna eran stimulai de far pasch cullas Ligias. Cuort suenter la sventira de Lützen haveva gl'imperatur animau il gubernatur Feria a Milaun ded instradar tractativas de pasch dentier ils Grischuns e lur anteriurs subdits, pertgei gl'imperatur supponeva ch'ils Franzos vegnien ussa en quella situaziun a marschar tras las Ligias encunter Milaun. Ed en quei senn luvravan ussa la fin digl onn 1632 Feria e Lelio Brancatio, il viceguovernatur, Antonio Porras, Luigi Trott, il cumandant de Como, el mument che Rohan era sin via ord la tiara.⁸⁰⁾ Quei era ussa aura per ils amitgs della Spagna e digl imperi, surtut en Surselva. Luci de Mont haveva adina mantenui sias relaziuns amicablas cugl ambassadur spagnol, Casati a Lucern. El

200 l., a Gion Pol (Paul), secretari 300 l., a Taccher per in viadi en Giadina tiels paders caputschins 233 l., ad Ant. Molina, secretari 200 l., a capitani Giachen Molina 200 l., a Conradin Planta 575 l. per ils paders caputschins della Giadina, al colonnel Genatio 400 l., ils 16 d'oct. per construir las fortezias 11 043 l., a Sprecher per in viadi en Svizzera 100 l., a Travers per in viadi en Giadina 166 l. 13 solz e 4 deniers; agl inschegnier Beau per 500 „vin hottes“ 208 l., a Nicola Fessler?, per lenna de construir tegias de guardia (guerittes) 227 l., a Crest Hedin? per petgs e palas 468 l.

⁷⁹⁾ Archiv federal, Bern. Landé al retg ils 27 de schaner 1633.

⁸⁰⁾ Archiv federal, Bern, Landé al retg, ils 15 de dezember 1633 e Sprecher II, 216.

e cauderschader de Florin, che haveva stuiu rēlaschar sia compagnia el regiment Schauenstein, han rapportau a Casati, che il pievel ellas Ligias sēigi consternius giud la partenza de Rohan, las speronzas de survegnir las tiaras subditas entras el seigien svanidas, las vischnauncas seigien engraviadas tras la truppa franzosa, ed ils menaders vilai, perquei che la Frontscha hagi aunc buca pagau ils daners per la schuldada; ei füssi il temps de renovar las relaziuns ed allianzas cul retg de Spagna e de better ils Franzos ord la tiara. Casati ha admoniu ses amitgs de batter il fier, aschiditg ch'el seigi cotschens. Il menader della truppa milanesa ha schizun schau resdar als Sursilvans, ch'ils Grischuns stoppien mo sesparter dalla Frontscha e lu empermetti el la Valtlina, ed il commissari Fels ded Innsbruck lai el medem temps crer, che l'archiduchessa seigi prompta de conceder la libertad religiusa en Giadina bassa ed a Tavau e Portenza. Naturalmein fuva dad omisduas varts aunc raschieni ded auters gronds avantatgs pil general e per la buorsa privata.⁸²⁾ Luci de Mont e Gion Tschamun de Florin han relatou a Gieri Genatsch tut quellas caussas, e quel ha dau part dellas relaziuns a Gion Pieder Guler, che era medemamein vegnius relaschaus cun sia compagnia, ed els ein secussegliai cul castellan en Portenza, Gion Victor Travers. Ils spagnols ein encuraschai e secusseglian vi e neu. Lur partida fa tuts sforzs ded occupar la primavera 1633 ils uffecis, aschia ils Schmids a Glion. Sil tierm s. Gieri 1633 vegn Conradin de Castelberg, in giuven de 25 onns, nominaus cauderschader. Molina va en Mesauc e vul pereger il cumin, ed ils spagnols en Surselva attaccan puspei il cussegl dil stadi, pertgei quel serimna quasi adina cuīs caus mo a Cuera; ils Schmids, de Mont, Florin, Castelberg, de Marmels, Gion Coray ed a. vulan la veglia pluralitat della Ligia grischa e sias usitadas sessiuns era a Glion. Ella raduonza dils caus e cussegli dil stadi il mars 1633 a Cuera grescha tut encunter ils Franzos, la partida spagnola in pli ferm che l'auter, e naturalmein ein ils capitanis tuts malidis, perfin ils anteriurs adherents della Frontscha. Genatsch s'uneschà pli e

⁸¹⁾ Salis, Memorie p. 378.

⁸²⁾ Archiv federal, Bern. Il nunci, Lucern ils 16 d'avrel 1633; Landé a Bouthillier, Cuera ils 18 de schaner 1633.

pli culs spagnols, e surtut para el ded ussa esser vegnius en pli stretgas relaziuns cun Caspar Schmid de Grüneck de Glion e ses frars.⁸³⁾

Quella midada ella Rezia ei vegnida ad ureglia a Rohan a Veniescha; sia dunna Margreta de Bethune anfla a Paris la via tier Richelieu, e quel di finalmein, ch'el vesessi buca nuidis Rohan puspei a Cuera. Ils 13 de fevrer 1633 ei il duca puspei ella capitala retica.⁸⁴⁾ Il prighel para daveras gronds. In'armada imperiala s'approximescha da Memmingen sur Kempten encunter il pass s. Gieci, autra truppa vegn sils confins de Giadina ed autra a Como. Las Ligias tschentan sils 11 de mars 60 umens per cumin grond a Maienfeld, e colonnel G .T. Florin, colonnel-litinent Heinrich de Schauenstein e major Gion Hössli meinan la truppa della Ligia grischa.⁸⁵⁾ Rohan va ils 17 de mars a Turitg; el vul gudognar ils Confederai per la defensiun dellas Ligias.

En quei temps vegn gl'imperatur a Breisach ed ella Franche-Comté ellas stretgas, e la Spagna vul dar agid ad el da Milaun anora. Feria cusseglio a Madrid de penetrar suls pass grischuns a Cuera; pertgei el seigi perschuadius, ch'il pievel seigi stuffis dils Franzos e vegni a retscheiver l'armada spagnola cun bratscha'aviarta. Quellas tunas van a Cuera ed a Turitg. Beroldingen protesta en num dils IV cantuns catolics a Milaun encunter tals projects. En Surselva astgan ils spagnols buca exprimer claramein lur giavisch; mo els ein suspectai de sez haver menau Feria tier quei project entras lur secuntener. Il cauderschader Conradin de Castelberg ei gie en ses sentiments in bien spagnol-austriac ed en parentela ed affecziun dependents da Rudolf Planta a Zernez.

⁸³⁾ Scaramelli al senat, Faveras igl 1 de sett. 1633, en Frari. Svizzeri 29.

⁸⁴⁾ Rott, IV,2 p. 36. Rohan arriva buca ils 25 a Cuera, sco **Sprecher** di II, 91.

⁸⁵⁾ **Berther, P. Baseli.** Il cumin della Cadi 1656, p. 14. Tenor quei rapport ein 63 umens della Cadi sut mistral Giachen Berther marschai sil pass s. Gieci, per defender quel encunter ils Sueds sut general Horn. Ils caus e cussegli dil stadi havevan clamau 60 umens per cumin grond sils 11 de mars a Maienfeld encunter la truppa imperiala ed en medem temps radunau la dieta a Cuera. Archiv cantonal. Ausschreiben gem. III Bünde 25. Febr. 1633.

Ils caus ed il cussegli dil stadi vegnan per quellas fatschentas da miez matg a Glion tier ina sessiun; pertgei ils Sursilvans han refusau de vegnir a Cuera. Ils spagnols, susteni dals capitanis, ein aschi encuraschai, ch'els proponan gia ussa de better ils Franzos e Landé suls confins, sch'il retg paghi buca tochen ils 15 d'uost ses deivets alla truppa grischuna. Els reproschan aviartamein, ch'il retg de Frontscha vegli mo sefortificar e restar elles Ligias, e la Valtlina vegni buca restituida. Malgrad la renitenza dils Schmids, Castelberg, mistral Gion Soliva, R. de Marmels, Gion Coray ed a. concluda la radunonza de mantener 1000 umens per Ligia per la defensiun della patria, e Landé di, il retg vegni a proteger ses alliai, e la restituziun della Valtlina resti la fin e mira de Ludivic il XIII.⁸⁶⁾

Las novas, che Feria prepari de marschar en Germania, han allarmau Richelieu ed ils Confederai. Tuts vulan ussa segidar. Rohan a Turitg survegn ordras de dumandar agid dals generals sueds Horn e Bernhard de Weimar; ils Confederai empermettan agid; il retg tarmetta duas tiaras dil pagament, ed ils 2 de fenadur 1633 survegn Rohan il camond ded ir a Cuera e supreender la truppa. Tut quellas novas fan in mument gronda impressiun sils Grischuns, tonpli che Rohan lai udir, che la restituziun dellas tiaras subditas vegni a suondar. Ils Grischuns ein puspei plein speronza e legria e fan tut lur pusseivel, per survir e cumentar Rohan. Catolics e protestants dattan cun plascher quartier.⁸⁷⁾

Cuort suenter mesastad 1633 semida l'aura. Dr. Giachen Schmid de Grüneck di gia igl uost a Soranzo, igl ambassadur venezian en Frontscha, nus seschein buca menar pil nas dals Franzos, ed en cuort demuossa la Ligia grischa puspei mala-veglia e vul buca dar albiert alla truppa franzosa.⁸⁸⁾ Ins vul buca la truppa, mo pretenda surtut ils daners pils deivets e lu la Valtlina. Ils paders caputschins cusseglian al pievel a Cuera ed en Giadina aviartamein de buca sefidar dils Franzos, e da Milaun anora vegn il pievel grischun puspei admonius, de better ils Franzos ord la tiara. —

⁸⁶⁾ Rosso al senat, Turitg ils 21 de fevrer 1633. **Rott**, IV,2 p. 30.

⁸⁷⁾ Rosso al senat, ils 28 de fenadur 1633.

⁸⁸⁾ **Rott**, IV,2, p. 36.

En quels dis, ils 22 d'uost 1633, marscha Feria cun in'armada tras la Valtlina el Tirol; el va en agid alla truppa imperiala spel Rhein. Rohan tarmetta il regiment Lanlé en Giadina; el lai avanzar sia truppa els vitgs de Schons e Montogna, Tumliasca e Sursès, preparaus de rebatter mintga attacca sil territori grischan. Duesse ina tala succeder, sche ha Rohan camond dil retg, ded immediat occupar Bormio e Clavenna. Quei sa era daventar, sche Rohan anfla sez opportun de marschar, suenter che Feria ei en Tirol. En medem temps tracta Rohan era culs Sueds. Quels dueian vegnir maneivel dals confins svizzers e retscheiver Feria en nausch combat entuorn Constanz. Rohan dat part als menaders ellas Ligias de tut quels plans; ils partisans franzos selegran e spetgan per part cun grond entusiasmus il di, che la Valtlina crodi en lur mauns.⁸⁹⁾ Era Rohan spera, ded ussa astgar operar en quei senn. El vul augmentar la truppa sin 10 000 umens; el damonda 200 000 livras daners ed il consentiment ed agid dils Confederai e de Veniescha, ed ils 20 ni 25 d'october vul el semetter sin via viers la Valtlina.

Puspei semida la situaziun a Paris; ils adversaris de Rohan gudognan il giuc, ed il retg di: Ell'Italia ei quasi negina truppa spagnola pli, ed jeu hael leu ruaus per miu possess ed interess, semigliontamein egl Elsass. Han ils Sueds en Suevia pli gronds success, sche han els silsuenter la mira de sepatrunar de parts digl Elsass, ed els impedeschan lu mei de far mia preda, perquei viel jeu buca marschar ell'Italia. Il retg ha pia dau camond, de desister dad in'attacca sin Clavenna e Borùnio e de returnar en quartiers. La truppa seretrai ord Giadina ed ord ils aults giu ellas vals, per passentar gl'unviern 1633/34 ellas Ligias. Il general Horn ha denton sin via encunter a Feria adumbatten empruau de vegnir en possess de Constanz.

Quels evenements e surtut il secuntener dil retg Ludivic ils XIII han gritentau ils Grischuns. Ton pli ventireivels sesenta il guovernatur a Milaun. El mument, che Rohan sto dumandar novs quartiers per sia truppa e che tutta speronza sin in success ei svanida, porscha Milaun a ses partisans ed allas Ligias de tractar sur tuttas damondas. Il guovernatur vul mo, ch'ils Franzos vegnien catschai ord la tiara e che la Spagna-Milaun survegni

⁸⁹⁾ Rott, IV,2, p. 56.

liber pass e repass per sia truppa. Quei havess ussa grondissima impurtonza per il combat encunter ils Sueds en Suevia. Han gie Horn ed ils Sueds pitiu grevamein tras la truppa, che Feria ha menau tras la Valtlina ed il Tirol. Carlo Casati vegg ad Ursèra, per far da leu anora marcau culla Ligia grischa, cul cauderschader Conradin de Castelberg, Florin, mistral Gion Soliva, mistral Berther, ils Schmids a Glion ed auters. Gie perfin Genatsch⁹⁰⁾ e Guler e scarvon Tscharner han piars la speronza sigl agid della Frontscha ed ein prompts ded ir autras vias, per vegnir en possess dellas tiaras subditas. Il cardinal-infant, fegl de retg Filip ils III, vegg da Milaun a Como, per da leu anora declarar als partisans spagnols a Cuera ed ellas Ligias, sut tgei favoreivlas condiziuns ins vegli restituir la Valtlina, dar pensiuns generalas allas Ligias e privatas als menaders e lubir il cult religius en Portenza e Giadina; mo ina condiziun tschenta el: las Ligias ston desister da tuttas relaziuns cul retg de Frontscha.⁹¹⁾

En quella stimulaziun eran las Ligias èls dis d'october 1633, cura ch'ils caus stuevan reparter la truppa per igl unviern 1633/34 en novs quartiers. Las valladas dil Rhein anteriur eran sblutadas da tut; Sursès, Lonsch, Vazsu e Bergugn havevan negin fein pli. Caus e cussegli dil stadi han perquei concludiu de metter la truppa franzosa per igl unviern a Mustér, en Lumenzia, ella Foppa, ad Uors, Laax e Sursaissa. Il november dueva la truppa pia marschar en Surselva. Encunter quei conclus han ils representants della Ligia grischa, surtut cauderschader Conrardin de Castelberg e ses condeputai, protestau aviartamein. Il mistral Gion Soliva ed il magistrat della Cadi han immediat rapportau il conclus alla dieta catolica a Brunnen e declarau, che las vischnauncas vegnien a s'armar e far resistenza; Uri duei tarmetter in deputau, per observar las caussas ed ils cantuns catolics empermetter de dar agid. La dieta catolica ha tarmess mistral Trösch ded Uri, e quel ha cussegliau als Sur-

⁹⁰⁾ Scaramelli (Frari, Svizzeri 29) scriva igl 1 de settember 1633: Delle cose de Grisoni mi ha fatto dire il Sr. Duca d'haver scoperto qualche intelligenza di quei popoli con Spagna, e che il colonello Gianazzo, che altre volte ha servito V. S. sia uno dei capi, che è in pena di ciò.

⁹¹⁾ Rott, IV,2, p. 59. Haffter, E., pag. 250.

silvans de purtar tgisá avon ils V cantuns.⁹²⁾ Dasperas eran lu Dr. Schmid de Glion e capitani Schorsch de Spilgia fetg actihs encunter ils Franzos. Schorsch mava a Gravedona a tractar cun emissaris de Milaun. Encuraschai dals V cantuns e dals agents de Milaun, han las vischnauncas della Cadi e della Lumnezia clamau lur pievel cun tut ils zenns sut las armas, ed entuorn 2000 umens della Cadi ein serimnai cun lur bandieras a Trun, schegie aunc senza nominar ils capitanis. La Lumnezia ha concludiu la peina de mort a tgi che plaidi de retscheiver la truppa en quartier.⁹³⁾ Las duas outras Ligias han clamau ina dieta a Cuera; igl ambassadur Landé ha empermess de pagar ella, e Gion Tscharner ei ius a Trun e Mustér tier Conradin de Castelberg, bein per quietar il pievel. Ussa van aunc las tunas, che «18 mélis cun aur de Fröntscha» seigien arrivai sils confins, ed il pievel della Cadi, Laax, Sursaissa, Uors e Lumnezia ei perschuadius, de buca saver resister pli ditg, tuorna a casa e tarmetta ses deputai puspei alla dieta a Cuera; mo tuttina tschenta el guardias, per pertgirar il pass e repass tras la val. En lur dieta separada eran las duas outras Ligias promptas de tschentear ina truppa e sforzar ils cumins renitents tier obedientsha, ed ils deputai della Cadi e della Lumnezia han a Cuera stuiu empermetter de retscheiver siat compagnias truppa a pei ed ina mesa cavalleria per cumin grond. En lur greta han els cun quella caschun reproschau a Landé, che la Fröntscha hagi fatg nuot, per restituir la Valtolina; il pievel piardi la pazienza e mundi bein spert tier l'Austria. Fussi la Fröntscha en verdad intenzionada de reconquistar la Valtolina, lu dessi la Ligia 1500 umens en agid. Landé ei sin quei marschaus a Paris a rapportar la situaziun. Ils purs e plevons, surtut en Lumnezia, eran tuttavia buca cuntents cun il secuntener de lur deputai a Cuera, la renitenza era denton rutta. Rohan era en quitaus; el ha ils 5 de dezember 1633 relatau al retg, che las difficultads vegnien pli e pli grondas, ei sedamondi u de marschar en Valtolina ni de bandunar la tiara, e per quei intent vuleva el era ussa encurir.

⁹²⁾ Eidg. Abschiede, V,2 p. 794 e 796.

⁹³⁾ Archiv federal, Mémoire de Rohan al retg, ils 5 de dec. 1633. Scotti al cardinal Barberini, ils 17 d'oct., 22 e 29 de nov. e 6 de dec. 1633. Archiv Tscharner LXXIX, p. 335.

relaziuns culs Sueds en Germania e dumandar lur agid e cun 3000 Grischuns e 9000 umens truppa franzosa marschar alla conquista dellas tiaras subditas. La truppa mava denton en quartier d'unviern en Surselva.⁹⁴⁾ En Tujetsch havevan ils caus dau negina truppa, per buca vegnir en carplina cun Uri, che havess bugen endridau la Surselva catolica el combat encunter ils Franzos. La truppa franzosa ha tscheu e leu preparau grevas difficultads; la schuldada engulava, mazzava e carschen-tava la malcontententscha. En in vitg sursilvan vul in schuldau supreender ina dunna; ils purs cuoran neutier cun pals e bastunan el alla mort. —

Ultra de quei era la Ligia grischa empau malcontenta a riguard l'elecziun dil niev colonnel per il regiment Schauenstein. Il.colonnel Rudolf de Schauenstein haveva l'entschatta de novembre 1633 cun risguard sin sia vegliadetgna demissionau ed haveva proponiu de dar il regiment ad Antoni Molina. Cun siu agien fegl era el fetg malcontent. ⁹⁵⁾ En Surselva, surtut en Lumnezia ed ella Cadi, haveva ins Molina pauc a cor, essend ch'el representava la Frontscha; ins spetgava, che Gion de Mont survegni il regiment; il retg haveva dau ad el igl uorden de s. Michel. ⁹⁶⁾ En num della Ligia grischa ha Conradin de Castelberg scret ils 14 de schaner 1634 al retg e rugau el de surdar il regiment a Gion de Mont; el seigi in affeczionau e bien survient dil retg, in bien schuldau e surtut catolics, ils auters protestants. En quei senn vegli il retg dar ordras a Rohan. Ils 11 de matg 1634 vegn dal tierm s. Gieri anora repetiu quei giavisch e Rohan envidaus de visitar la Ligia grischa,

⁹⁴⁾ Dal regiment Chamblay, consistent ord 20 compagnias ni total 647 umens, van ina part ella Cadi a Mustér, en Lumnezia e 5 compagnias el cumin d'Uors, leutier la cavalleria de Guglielm, barun de Canillac cun 45 umens e 120 caval, la mesadat ad Uors, il restont a Glion. La cavalleria de Claude Murat, signur de Villeneuve, en tut 118 caval, la mesadat ella Cadi, il restont en Lumnezia. Il regiment Landé cun 400 umens ella Foppa, a Glion e duas compagnias a Sursaissa. L'entira armada dumbrava quels dis de dezember 1633 mo 1527 Franzos e 2010 Grischuns.

⁹⁵⁾ Rosso al senat, ils 23 de fevrer 1634 (Archiv federal, Bern).

⁹⁶⁾ Duront la dispeta per ils quartiers alla schuldada franzosa haveva Molina fatg grevas smanatschas als Sursilvans.

nua ch'el gaudi in bien num e bien credit. Molina sco Genatsch, d'ina gronda ambiziun, pli temius che respectaus, ha survegniu il regiment. Gion de Mont era in valerus menader e stupent um ed en tuts graus de preferir a Molina, mo ils de Mont ugliavan (surtut Luci e Paul) memia ferm encunter il cussegl dil stadi e la Frontscha.⁹⁷⁾ Malgrad la biala invitaziun a Rohan, auda ins de Tschuncheismas sin cumin a Mustér il clom: Ord la tiara culs Franzos. Duront igi unviern era en verdad la mala-veglia carschida. Landé, che stava cun sia truppa ella Foppa, selamenta tier il nunci, ch'in plevon catolic hagi leventau il pievel encunter il retg de Frontscha. Il nunci ha surschau la caussa agl uestg.

Richelieu saveva sez strusch s'imaginar, co las relaziuns ellas Ligias semidavan en disfavur della Frontscha. El vuleva tuttavia buca seretrer. El projectava p. e. de cumprar il casti de Rehanau, ch'il vegl colonnel R. de Schauenstein teneva venal ord greta viers siu fegl. Molina e Tschudi vulevan davos dies intermediar ina mariaglia della feglia de Schauenstein cul guvernatur Peter König a Lindau; quei havess renforzau la posizion dell'Austria a Razen. Richelieu carteva, che Rehanau seigi sco ina fortezia ni citadella ellas Ligias ed ins possi arrivar leu sul Segnas, Flem e Trin, e gest la posizion encunter l'Austria seigi de muntada.⁹⁸⁾

Finalmein ils 10 de schaner 1634 sedecida Richelieu, de buca schar marschar Rohan en Valtlina. Duessi denton la Spagna prender Clavenna e Bormio, sche hagi Rohan de penetrar en Valtlina ed occupar Tirano e Morbegno ed impedir il transit da Milaun ell'Austria.

⁹⁷⁾ St—A. Milano Trattati Svizzeri. Carlo Casati 1630—41. Lucern ils 10 e 18 d'oct. 1634. Paul de Mont era gia 1620 e 1622 staus igl um de confidenza de Milaun e reparteva ils daners spagnols en Surselva.

⁹⁸⁾ Archiv federal, Bern. Affaires Etr. Grisons 8, 131—135 ils 27 de december 1633 ed ils 10 de schaner 1634; Bibliotheque Nat. f. fr. 4106, fol. 300, Boullion, Cuera, ils 5 de dec. 1634.

Ils Grischuns preparan de better ils Franzos ord la tiara 1634.

Il contract de Monsonio e la decisiun de Richelieu dils 10 de schaner 1634 han preparau la sventira de Rohan e de sia truppa ella Rezia.

Gia duront la stad 1633 eran ils menaders ellas Ligias returnai tiel pertratg de segidar sesez. Dr. Schmid de Glion era staus l'entschatta digl onn 1633 a Paris ed haveva rugau il retg de buca relaschar Rohan e la truppa e de remetter la Valtlina allas Ligias. El haveva a Paris era plidau cugl ambassadur venezian Soranzo, per udir, tgei che las Ligias hagien de spetgar da quella vart. Il settember u october 1633 va lu Gieri Genatsch a Veniescha — ins di en fatschentas privatas —; el ei pensionari della Serenissima e retrai annualmein 300 du-catas. Probabel han ils caus (Castelberg, Finer e Guler, senior) ed ils Schmids a Glion ed a. cartiu, che Genatsch gaudi a Veniescha tutta confidonza ed han insinuau el de far il viadi. El stava era gia en relaziuns cun Zorzio (Giorgio), ch'el haveva empriu d'enconuscher a Paris, ed el era s'orientaus tras quel sur la damonda d'ina missiun a Veniescha.⁹⁹⁾ El retuorna l'entschatta de november a casa, suenter haver gudiu a Veniescha tuttas honurs. Il cau della Serenissima ha dau speranza, che Veniescha vegni a sustener ils Grischuns, cura che la Fron-tscha marschi alla conquista della Valtlina. L'entschatta digl onn 1634 — la truppa franzosa ei aunc en Surselva en quartier — spetga il pievel grischun, che Rohan marschi en Valtlina¹⁰⁰⁾ En Schons e Valrein e surtut en Surselva smanatscha la re-volta encunter ils Franzos. La schuldada sto pitir e schizun ir uras lunsch, per survegnir empau paun. Ils purs vegnan animai de destruir la raccolta de garneci ni ils èrs sin pei, per buca stuer tener pli ditg la truppa. Giud scantschala, sin cumin, per-tut regia nauscha pissiun encunter la truppa franzosa. Ella dieta dils 12 de mars 1634 sto Rohan udir tuttas reproschas e sma-natschas, ed el tema, che il pievel grischun massacri in bi di sia pintga armada.

⁹⁹⁾ Archiv federal, Bern. Rosso, Turitg, ils 10 de nov. 1633. A Veniescha eran ins orientaus tras Scaramelli, che Genatsch mundi culs spagnols. **Haffter**, Urkundenbuch, 119.

¹⁰⁰⁾ Rosso, Turitg, ils 23 de fevrier 1634.

Ils caus piardan la speronza silla Frontscha. En quels dis vegn in agent della Suezia, Paul Strassberger, tras Cuera; ils caus sevolvan tras el tier il minister Oxenstierna a Stockholm per agid; els offereschan als Sueds ils pass, sche quels empermettan de restituir allas Ligias la Valtlina.

Tier tut mal vegn ils 25 d'avrel da Paris aunc il camond de relaschar per part la truppa grischuna; la malaveglia crescha. Rohan va cuort suenter (ils 6 de matg) a Paris. Las Ligias ein en grevs quitaus, ed ils caus scrivan al retg: Pertgei buca marschar en Valtlina? Il pievel vul aunc buca crer, che Richelieu pertratgi mo vid ils interess della Frontscha. Rohan cusseglia al retg de retrer tut sia truppa ord la Rezia, cheutras prendi el als Grischuns tuts dubis sur l'intenziun dil retg; negin sappi reproschar, ch'el vegli mo occupar las Ligias e sefortificar e buca ir en Valtlina, e la Spagna sappi buca dir, che la Frontscha vegli attaccar dalla Rezia anora l'Italia ni Milaun; als caüs ellas Ligias astgien ins dir, che ins hagi discuvretg lur praticas ed emprovas de tradir ils Franzos als Spagnols. Quei cussegl sustegn era Landé, mo il retg suonda buca el e lai continuar las lavurs vid las fortezias. La truppa resta ella tiara, mo ella duei marschar en novs quartiers. En Surselva vulan ils purs buca tolerar ella pli ditg che tochen Tschuncheismas. Duront la 'dieta dil matg 1634 rogan ils deputai Landé — Rohan ei sin viadi — danovamein de buca refierer l'interpresa encunter la Valtlina. Nova truppa arriva e material d'uiara, e gl'ambassadur lai capir, che Veniescha ed ils cantuns svizzers seigien la culpa; els hagien buca vuliu dar agid.¹⁰¹⁾ La dieta serimna suenter las elecziuns ils 14 de zercladur puspei a Cuera, per dar ils novs quartiers alla truppa. Landé vul era bandunar la fortezia dil Rhein sut Malans, per privar ils Grischuns dils dubis, ch'el vegli sefortificar encunter els. Ils partisans spagnols ord la Surselva vulan per part far marschar la truppa a Tavau ed Engiadina bassa sils confins austriacs, auters vulan far campar la truppa a Spliglia e contuorn, per in bi di saver stuschar la

¹⁰¹⁾ Rosso, Turitg ils 6 d'avrel 1634. Rohan Mémoire, Cuera, ils 25 d'avrel 1634.

¹⁰²⁾ Rosso, Turitg ils 11 de matg 1634 ed 8 de zercladur 1634.

pintga armada sur cuolm ed els mauns della Spagna.¹⁰³⁾ Suerter empau dispeta denter ils cumins croda la decisiun suerter giavisch de Landé. El senta, che la partida spagnola vul catschar el e sia truppa alla malura; ils regiments de Landé e Lecques marschan en Giadina, e sin giavisch de Landé han cauderschader Caspar Schmid e Genatsch surpriu de direger la midada de quartier. Il commissari-general Bouillon vegn da Paris, e la truppa fa parada, il regiment Landé ils 30 de zercladur silla planira a Razen, il regiment Lecques avon la fortezia dil Rhein e la truppa de Canillac sper Domat, e lu marscha ella els novs quartiers.¹⁰⁴⁾ Genatsch va en medem temps en Giadina, per introducir la truppa e per metter pasch denter la missiun caputschina ed ils predicans ed il pievel protestant, che tegnan occupadas las pleivs. El ha gia en quels dis in'autra missiun.

A Cuera han caus e deputai merveglias, sche Veniescha hagi propri buca vuliu sustener la Frontscha per igl acquist della Valtlina. Genatsch duei puspei ir a Bergamo tiel proveditur Giorgio e s'orientar sur tut.¹⁰⁵⁾ Ultra de quei reflecteschan caus e deputai de sez interpreter gl'atun 1634 la campagna encunter ils subdits, sche la Frontscha resti inactiva. Guler ha offeriu 1000 umens, Genatsch 200, auters 100 e 50.¹⁰⁶⁾ La dieta ha concludiu de dumandar a Veniescha las pensiuns restontas de 1620. E finalmein duei Genatsch cun auters menaders s'orientar sur las vias per la campagna.

Duront che Genatsch ei en Giadina, marschan l'entschatta de fenadur ca. 10 000 umens sut il cardinal-infant de Spagna tras Bormio e Tirol encunter ils Sueds en Germania. Paucs dis pli tard arrivan Genatsch, colonnel Salis, Brügger, Schauenstein ed a. a Bormio culla stgisa de far bogn, en verdad per ponderar sur la via per la truppa grischuna, ed en medem temps cun buna caschun udir dal podestat a Bormio e siu pievel, schebein

¹⁰³⁾ Landé, ils 17 de zercladur 1634 (Archiv federal, Bern).

¹⁰⁴⁾ Archiv federal Bern Bouillon al retg ils 17 de zercladur 1634.

¹⁰⁵⁾ Rosso, Turitg ils 28 de zercladur 1634 ed Archiv cantonal, Cuera. Landesprotokoll ils 20/22 de fenadur 1634.

¹⁰⁶⁾ Rosso, Turitg, ils 9 d'uost 1634 e Landé, Cuera ils 29 de zercladur 1634.

ils de Bormio vulessan returnar sut la bitgetta «patriarcala» dils Grischuns. Il podestat Alberti senta, tgei fin e mira ils officiers grischuns han e di: Per nus dat ei mo in contract de Monsonio!¹⁰⁷⁾

Denton ei en quei mument la Spagna fetg activa; ella vul allontanar l'influenza dils Franzos; ella renovescha l'allianza culs cantuns catolics. La Frontscha vul adumbatten impedir quei. Era ella Surselva, en Schons e Valrein (Schorsch), ella Ligia della casa de Diu crescha puspei la fidonza silla Spagna ed Austria, e quellas pussonzas encueran sezzas pasch. El bogn de Bormio compara en quels dis de stad 1634 era Lelio Brancatio, il viceguovernatur de Milaun e cavàlier digl uorden de Mantua, per «duront sis dis far ina cura de bogn» — ins haveva gia practicau pli baul ellas damondas reticas. — Brancatio vul cun quella caschun menar ils subdits tier in'allianza cun Veniescha ed ina pasch ed accord culs Grischuns. Per quei pertratg vul el gudognar il guovernatur Robustelli e Gion Antoni Paravicino, il podestat de Morbegno. Ina tala allianza progreda ils interess digl imperatur e dil retg de Spagna e po allontanar ils Franzos dals confins dellas duas pussonzas. Era Robustelli ed ils menaders della Valtlina ein l'entschatta decidi de s'accommo-dar culs vischins, surtut culs Grischuns, pertgei els supponan, che ina pasch generala vegni tractada senza els e lur vallada vegni a curdar en mauns della Spagna. Quei vul il pievel della Valtlina gest aschi nuidis sco la tirania grischuna. Lur pertratg ei de daventar in cantun catolic e s'alliar culs V cantuns catolics della Svizzera. Per ina tala viulta savess la Spagna dar il consentiment; mo ils subdits san che la Frontscha ei cuntraria a quella sligaziun, pertgei ella tema, che Bormio, Valtlina e Clavenna vegnien cheutras tuttina en dependenza dil retg de Spagna. Quella greva difficultad ei buca de supprimer. Cert han Genatsch e ses compatriots discuriu cheu a Bormio cun Lelio Brancatio e Robustelli — e quei per cummissiun dils caus. Ina dieta secreta a Cuera (forsa eis ei quella dils 11 de fenadur) decida de continuar quellas tractativas ed encuir pasch ed uniun, per catschar ils Franzos ord la tiara, ed in dils caus (probabel Caspar Schmid de Glion) va sinquei cun Genatsch a Sondrio tier

¹⁰⁷⁾ Alberti, Antichità di Bormio, Como 1890 I, 215, 221.

Robustelli, Azzo Besta e Brancatio.¹⁰⁸⁾ Il comt Brancatio animascha ton ils subdits sco ils Grischuns ded exequir siu project e s'unir cun Veniescha, che hagi in grond interess de guder il pass tras la Valtlina. Tgei ch'ils umens han cheu (igl uost? 1634) tractau scretamein ei buca d'eruir; finalmein ein els vegni perina, de tarmetter Genatsch ed Azzo Besta a Brescia tier il proveditur Giorgio (Zorzio) e da leu a Veniescha.¹⁰⁹⁾

Ei era forsa suenter miez uost 1634, cura Genatsch ed Azzo Besta cavalcavan a Bergamo e Brescia. Cheu han els teniu cussegli cun Giorgio.¹¹⁰⁾ Genatsch sperava sillla victoria dils Sueds en Germania, el ha perquei teniu la dira encunter il representant dils subdits e vuliu conceder la giudicatura e la religiun catolica als subdits, mo buca ina atgna administraziun. Giorgio, che veseva bein, che il project de Brancatio seigi buca de realisar e che Veniescha sappi buca seseparar totalmein dalla Frontscha, ha consolau ils dus deputai culla speranza, che ils contracts de Madrid e Monsonio vegnien en cuort revedi e che la via della pasch stetti aviarta. Azzo Besta era pauc satisfatgs dellas pretensiuns de Genatsch; quel ei viagiaus vinavon a Ve-

¹⁰⁸⁾ Archiv federal, Bern. Nunziatura. Scotti, ils 5 de settember 1634 ed ils 31 d'october 1634.

¹⁰⁹⁾ Haffter resda p. 248, che ils caus hagien surschau a Schmid de dar in creditiv a Genatsch per Veniescha, el hagi fatg quei a bucca. Ils 9 d'uost relata Rosso, Genatsch hagi cummissiun ded ir a Bergamo, per dumandar sur la tenenza de Veniescha, sch'ils Grischuns veglien igl atun rumper ella Valtlina; pia ei Genatsch avon miez uost sin via, mo Rosso sa nuot dallas tractativas a Sondrio. Il nunci Scotti scriva al cardinal Barberini ils 26 de settember 1634, che tenor il rapport digl arciprete Paravicino seigien Genatsch ed Azzo Besta viagiai avon paucs dis a Brescia. Ils 3 d'october sa lu Paravicino de raquintar, che las tractativas seigien buca reussidas. Las novas della terrada dils Sueds a Nördlingen eran aunc buca arrivadas (ils 6 de sett. 1634). Archiv cantonal, Cuera. Landesprot. dils 20/22 de fenadur 1634. Rosso ils 9 d'uost 1634.

¹¹⁰⁾ si ridussero dunque il colonnello Gianatio per Grisoni et il sudetto Besta per Valtelini a Brescia da Giorgio Proveditore generale con risolutione di trattarsene con l'istessa segretezza a Venetia; ma purchè il Gianatio credendo all'ora che Svezesi, de quali Grisoni facevano tutti il loro capitale, havessero da rimanere superiori agli Imperiali, nel congresso di Brescia tenne la pretensione sua tanto alto, non volendo a Valtelini permettere, che la giudicatura e la Religion Cattolica, che il trattato andò a monte. Scotti, Muri ils 31 d'oct. 1634. Archiv federal.

niescha; el haveva leu aunc de s'orientar, schebein la republica vegli propri buca dar agid per la conquista dellas tiaras subditas, sco la Frontscha pretendeva. L'entschatta de settember era el puspei sin via a casa.¹¹¹⁾ El purtava pauc bunas speronzas; Veniescha haveva dau bials plaids, mo haveva fatg schlia-
tas experienzas ell'uniu culla Frontscha e vuleva setener d'ina vart. Ultra de quei eran ils Venezians bein orientai sur Genatsch; els havevan bein interess de buca stridar quei um; els savevan denton, ch'el udeva tier ils spagnols ella Ligia grischacha, ils Schmids a Glion, de Mont, Schorsch e Castelberg,¹¹²⁾ ed el era buca igl um de confidonza.

Malgrad las differenzas a Brescia havevan Azzo Besta e Genatsch tuttina demussau la buna veglia de vegnir tier ina pasch ed exprimiu l'intenziun de continuar las tractativas suenter la vendemia; Genatsch saveva, che ils caus vulevan vegnir ad ina fin e scatschar ils Franzos ord la tiara, ed ils subdits temevan de stuer daventlar Spagnols. Robustelli sefidava denton buca dils Grischuns. Suenter tut quei, ch'el haveva udiu ed observau, spetgava el in'attacca ord las Ligias ed haveva perquei rugau il niev guvernatur a Milaun, cardinal Albornoz, instantamein de porscher agid.¹¹³⁾

Las Ligias han tralaschau quella campagna, pertgei ils 6 de settember 1634 eran ils Sueds sut general Horn e Bernhard de Weimar vegni terrai dals menaders digl imperatur, Gallas ed il prenci Ferdinand, cun agid della truppa, ch'il cardinal-infant ed archiuestg de Toledo haveva (ils 8 de fenadur) menau tras la Valtlina e Bormio el Tirol. Robustelli, ils subdits, Milaun e Spagna ed ils cantuns catolics giubilavan; ils menaders franzos e ellas Ligias e Richelieu a Paris eran consterni. Entras la ter-

¹¹¹⁾ **Sprecher** II, 261 di, ch'el seigi staus a Milaun. Era Sprecher e Salis, ils cronists, eran buca orientai en quellas damondas.

¹¹²⁾ Rosso, Turitg, ils 9 d'uost 1634, ils 22 e 28 de settember (634. Scaramelli, igl 1. de settember 1633. Frari. Svizzeri 29. Ils 24 de novembre haveva Rosso secret a Veniescha: Anco il Gianatio, che di bassa fortuna e rilevato a qualche comodo, e che si è fatto nelle dieci Drittture e tenuto per adherente a Spagnuoli con quali mostra di voler cambiare religione e farsi Catholico, ma mai si risolve. Sur quella damonda raquenta il capitel suondont.

¹¹³⁾ **Rott**, V, p. 14.

rada dils Sueds eran ils Franzos en Lorena ed egl Elsass e perfin ella Rezia ussa en prighel de vegrir surpri. Per la partida spagnola sco Genatsch, ils Schmids e Castelberg era quei il mument giavischau, per agir en lur project. Ina truppa imperiala ella contrada de Constanz ed autra a Milaun periclitava ils Franzos ellias Ligias. Il guovernatur a Milaun ei seconferius culla regenza ad Innsbruck; pertgei el vuleva marschar tonpli spert en Valtlina, avon che nova truppa franzosa arrivi.

En quei mument rapporta Rohan allas Ligias, ch'il mument ded ademplir lur giavisch seigi cheu; Richelieu ei ussa decidius de serrar la via da Milaun tras la Valtlina e tras la Rezia agl imperi e marschar alla conquista della Valtlina.

Ellas Ligias han quellas novas purtau novas speronzas; ils adversaris della Frontscha han buca dumignau lur gronda disfidonza e la profunda aversiun encunter ils Franzos ed han davos dies continuau de tractar culs subdits e cun Milaun cugl intent de better ils Franzos ord la tiara.

Suenter la battaglià de Nördlingen dils 6 de settember 1634. Genatsch e ses compatriots en Giadina; tractativas cun Casati; la conversiun de Gieri Genatsch.

La victoria digl imperatur a Nördlingen ha dau ina viulta en tuttas relaziuns. Genatsch era en quels dis sin via da Veniescha a Cuera tiels caus. Cun Veniescha e culla Suezia eran el ed ils caus secuglienai, e la speranza, che la Frontscha vegni ussa a vegrir cun ferma truppa, conquistar las tiaras subditas e finir la miseria dellas Ligias, era mo fetg modesta. Ultra de quei stavan els silmeins dapi 1633 en seriusas relaziuns culla Spagna, principalmein tras l'influenza dils Schmids a Glion e

¹¹⁴⁾ Archiv cantonal. Brev de Rohan dils 17 d'oct. 1634.

¹¹⁵⁾ Landé sminava, ch'ei vegni tractau davos dies, mo el sperava a-dina sil camond de Paris, de marschar en Valtlina ed empruava de mantener ils amitgs della Frontscha cun pensiuns e fiastas. Il di de naschient-scha de Ludovic ils XIII vegn festivaus a Cuera ella catedrala ed a meisa (cun „550 potz de vin“), e cun quella caschun sto il predican Saluz sin giavisch de Landé portar in viva al papa. Landé a Bouthillier, Cuera ils 29 d'uost 1634.

Luci de Mont, ed era ils caus eran fermamein intenzionai de continuar las tractativas secretas culs subdits e culla Spagna-Milaun.

Gieri Genatsch haveva dapi la primavera 1634 aunc d'intermediar la pasch denter ils paders caputschins e ses compatriots en Giadina.

La missiun retica era tras gl'ingress della truppa franzosa puspei periclitada; pertgei ils predicans ed il pievel de Giadina speravan, ded ussa saver guder las baselgias e pleivs e viver tenor lur perschuasiun. La sinoda a Filisur dils 30 de zercladur susteneva quei giavisch ed havess bugen enviau ils paders ord la tiara. Il pievel haveva era gia la stad 1631 occupau diversas pleivs; aschia era il plevon Thunet Vuolp returnaus a Ramuosch e pader Donato da Cortona haveva stuiu untgir ord casa pervenda ed ord baselgia. Rohan stueva tenor ordras proteger la missiun dalla forza, e Landé era in fervent amitg della missiun. Sin instanza de Rohan e dil pader Ireneo han Conradin e Gion Planta sut menonza de mistral Caspar Saluz radunau las vischnauncas de Suttasna a Fetan (ils 17 de nov.) e serrau in contract culla missiun. Quella haveva entochen 1631 gudiu 10 baselgias parochialas e las pleivs cun lur intradas. Il niev contract ha en general partiu il dretg sillas baselgias e pleivs.¹¹⁶⁾ En medema fuorma ein las vischnauncas de Suttasna s'accordadas ils 19 de november a Zernez entras Gion Planta, Antoni Planta e mistral Gieri Grass. Ramuosch e Tschlign han silsuenter refusau ded exequir il contract, ed il prefect della missiun, pader Ireneo ei comparius ils 15 de zercladur 1633 avon il congress a Trun, ha dumandau igl agid dil cauderschader Conradin de Castelberg, e quel ei seviults tier Rohan ed ils auters caus, e la dieta ha concludiu de restituir als paders las baselgias ed intradas tenor ils contracts ed aunc castigiar las vischnauncas per 150 scudis, sche ils contracts vegnien buca exequi. Landé ha schizun smanatschau cullas armas. Per surveglier l'execuziun ha Rohan tarmess Antoni Molina, ed ils caus han deputau

¹¹⁶⁾ **Sprecher II**, 85. Archivio di Propaganda, Roma, vol. 76, fol. 100, ils 27 nov. 1632, vol. 76, fol. 95, ils 19 d'uost 1633. Fetan dat 5 r. Scuol casa pervenda e mesa intrada de 39 renschs, Sent casa e mesa intrada de 40 r., Ramuosch baselgia e mesa intrada etc.

Gion Travers de Zuoz, Gion Tschamun de Florin e Masella de Puschlav sco commissaris en Giadina, e Gudegn Tachio, il predicant, ha accompagnau els sco secretari. Per disgust dils paders ha Molina dominau las fatschentas. Ils 6 de december 1633 han ils commissaris ordinau: Ils contracts de 1632 vegnan exequi; a Zernez resta la baselgia veglia als paders; la Frontscha gida a restaurar ella; a Fetan han omisduas confessiuns survetsch divin en baselgia, gl'altar ed il crucifix audan als paders, ed il caluster protestant tucca ils zenns era per il cultus catolic. Tuts beins e possess dils paders (paramenta e donns caschunai) ein de restituir. Il garneci de pervenda ei de dar sin Nadal 1633 (ma che detti Padri constituischino un loro curatore, o agente, che vada per la comunità a dimandarlo) ed in catolic ed in protestant duevan examinar ils products furni. Otto Rober de Ramuosch ha declarau als commissaris, che sia vischnaunca vegni buca ad ademplir las pretensiuns e dar la casa pervenda, e Tschlign ha snegau de dar la baselgia, schegie che quella pleiv haveva circa 50 convertits. P. Ireneo era medemamein pauc cuntents della partizun, e la congregaziun a Roma ha ordinau de buca far resistenza, mo era buca s'obligar tier il contract.¹¹⁷⁾ Aschia han omisduas parts sperau sin megliers temps ed aspects.

La primavera 1634 ha il canoni e prevost catedral a Cuera, Gion Flugi, animaus da Ruma anora de dar agid als paders, insinuau il duca Rohan de tarmetter Gieri Genatsch en Giadina, per exequir ils contracts de 1632 e 1633. Sperava Gion Flugi, che Genatsch seigi aunc il heros de siu pievel? Rohan ha adempliu il giavisch de Gion Flugi. Gieri Genatsch era ussa sin autras vias. Dapi 1631, il temps, ch'ils Franzos eran vegni ella tiara, pertava el la spada sco colonnel, ed internamein meditava el sur damondas religiusas. El sez raquinta 1635 en ina brev alla Sacra Congregatio de Propaganda Fide a Roma, ch'el seigi dapi quater onns vid il studi della sontga Scartira, e surtut era el versaus ellas scartiras de s. Augustin. A Veniescha

¹¹⁷⁾ Archivio di Propaganda, Roma, vol. 176, fol. 95, ils 19 d'uost 1633. Vol. 176, fol. 97, ils 6 de dec. 1633. Vol. 176, fol. 101, ils 14 d'oct. 1633. Vol. 110, ils 4 de settember 1633. Vol. 14, fol. 38, Roma ils 12 d'avrel 1634.

ha el il settember 1634 aunc cumprau las scartiras de s. Cyril-lus, che eran en quels onns comparidas en nova edizion. Il nunci a Lucern haveva ils dus davos onns, pia el temps. che las relaziuns culla Spagna eran daventadas pli stretgas, animau Genatsch repetidamein de returnar tier la baselgia catolica. Surtut stava el en intimas relaziuns cul canoni e prevost Gion Flugi e sequintava denter la gronda parentela, che Flugi haveva en Giadina aulta. Il nunci haveva era tarmess il pader Rudolf de Montbéliard, in dils pli versai missionaris, tier Genatsch. Mo Genatsch era ella politica in grond realist e ponderava e reflectava sur il pass, ch'el era sil precinct de far tier la baselgia catolica. La posiziun en Giadina era en quei mument per el fetg delicata. Surveva el als paders ni a ses amitgs e compatriots?¹¹⁸⁾ El vuleva buca stridar ses compatriots, mo perschuader els, che la Giadina sappi en vesta dellas relaziuns politicas buca sperar sin la cumpleina restituziun e che la Frontscha vegni mai a tolerar la persecuziun dils paders. Sin fundament dils contracts de 1632 e 33 ha el sesprau de reconciliar ils Engiadines cun lur sort, parter baselgias e pleivs culs paders e viver en pasch. Caus e deputai dellas Ligias havevan ils 10 de matg aunc animau il pievel de Giadina bassa, ded exequir il contract, concepius 1632. Landé haveva susteniu el e dirigi siu regiment e duas compagnias cavalleria en Giadina, per stermentar la resistenza. Genatsch ha radunau a Scuol ils menaders e perschuadiu els, che la Frontscha ni vegli ni sappi sustener els encunter ils paders e la missiun, e quella seigi mai e pli mai d'eleminar; il retg de Frontscha vegni a tener ils paders, era sch'ei fussi buca in um catolic en Giadina. Quella declaronza tenevan ils paders per ina necessitat ed il meglier susteniment. Molina surtut haveva adina dau speronza, che tutt contracts vegnien inagada a haver ina fin ed il pievel survegni la libertad religiusa. A Tschlign ed a Ramuosch ha Genatsch

¹¹⁸⁾ **Haffter**, p. 257. El ha per sia lavur fundamentala sur Genatsch buca saviu examinar il material de Ruma ed grondas parts dils documents a Paris. Quei ei cheu daventau. Las brevs de Genatsch en **Haffter, Urkundenbuch**, pag. 113 e s. ein naturalmein tarmessas al canoni Flugi, il parents de Genatsch. Pli detagliadamein vegn igl autur a plidar sur tut quellas relaziuns en ina monografia sur Genatsch, che vegn a comparer cun temps e peda.

ulivau las differenzas, mo el relata a Flugi, ch'el hagi suau per quella «benedida casa pervenda» de Ramuosch; il pader Donato da Cortona survegni ella. Las dunnauns de Tschlign han buca renconuschiu 'ses motivs ed han retschiert Genatsch cun crappa; mo era cheu eis el vegnius tier siu intent, ni silmeins sperava el sin in bien success. Ils paders eran cuntents de Genatsch; la congregaziun a Ruma ha admoniu igl uestg de Como ed era Flugi ded engraziar a Landé per ils buns survetschs de Genatsch, surtut per la declaronza, che la Frontscha vegni a proteger la missiun. Genatsch era denton ius a Bormio e silsuenter returnaus a Tavau tier sia familia (el haveva maridau 1620 Anna Buol, ina feglia dil bandierel e capitani Paul Buol, che haveva surviu a Veniescha ed ha giu ord quella lètg dus fegls e quater feglias). Ses compatriots a Sent fagevan aunc vinavon resistenza, e Landé ha animau Genatsch encunter la fin de fenadur de returnar en Giadina. El ha en ina brev romontscha als de Sent regurdau vid il contract ded Innsbruck, che ligiavi peis e mauns, e la Frontscha, che hagi liberau els, mereti risguards.¹¹⁹⁾ Ils 9 d'uost eis el puspei a Fetan; el vul surtut obligar ils protestants de schar als paders la precedenza per il survetsch divin ella baselgia parochiala. — Las tractativas a Sondrio ed a Brescia han occupau el silsuenter, e l'entschatta d'october eis el puspei ftschentaus culla dispeta en Giadina. Ils paders vulan a Tschlign persuls la baselgia; quella pretensiun vul Genatsch buca adem-

¹¹⁹⁾ Archivio di Propaganda, Roma, vol. 76, fol. 132, ils 10 de matg 1634, Vol. 76, fol. 128, ils 14 de zercladur 1634. Flugi scriva a Roma: . . . Ma a fine il tutto non si facesse con sole lettere e minaccie delle quali sin hora poco si sono curati quelli popoli, mandò esso signor ambasciatore per Comissario (oltre haver messo in guarnigione alli loro confini il suo regimento d'infanteria, et due compagnie di cavaleria nelle prime terre d'Engiadina) il colonello Georgio Genacio, quel tanto lui effetuato habbia, vederanno l'Emminenze loro dalla soggionta copia d'una sua lettera a me scritta. . . .

Tutto il male, et di quello il signor ambasciatore più si lamenta, consiste, che li catholici sono si freddi, che da loro non si ha veruno agiuto, promettono molto, ma

Da Roma scriva la congregaziun a Flugi ils 5 d'uost 1634: Con molto contento hanno sentito questi miei Eminni Signori i buoni aggiustamenti fatti da cotesto Ambasciatore di Francia per mezzo di quel

plir, mo ei dat a Sent ed Ardez particulars, ch'ein era renitents, e Genatsch vul tras Flugi da Landé l'incumbenza, ded ir tier il regiment e la cavalleria en Giadina ed astgar mover quella en Suttasna, per stermentar ses adversaris. Ils 20 d'october 1634 vegr ei tier in niev contract a Fetan. Era quel ha buca purtau la pasch.

Genatsch haveva ils 13 d'october da Tavau anora supplicau Flugi, de s'adressar al nunci a Lucern, sinaquei ch'el detti al pader guardian Rudolf de Montbéliard a Rapperswil la medema autoritat sco al prefect Ireneo, quei vuleva bein dir, l'autoritat ded absolver in hereticher. Genatsch vuleva viagiar sin sia possessiun a Katzensteig (s. Gagl) e cun quella caschun exequir sia conversiun a Rapperswil.¹²⁰⁾ Ils evenements politics han bein impiediu el en quei mument, de far siu viadi. Ils caus han en quels dis (ils 17 d'october) retschiert las novas da Rohan, che la Frontscha seprepari d'ademplir ils giavischs del las Ligias e conquistar la Valtlina. Ils caus stavan denton aunc en relaziuns secretas culs subdits e cun Milaun. Dasperas tractavan ils Sursilvans cun Casati. Il secretari dil guovernatur Albornoz Platone confereva cul niev avat de Mustér, Augustin Stöcklin, e tras il burser Paul de Mont culs auters menaders, sco Castelberg, Florin, ils Schmids a Glion, mistral Tadeo Bonalino a Roveredo e mistral Lazaro Toscano a Mesauc. Paul

suo colonello per la diffesa et utilità delle missioni, e perciò m'hanno ordinato che V.S. in nome loro gliene renda particolari gratii, e l'essorti insieme a proseguir nella protezione di quelle con andar sollecitando per quanto sia possibile la biasimevole tiepidezza di cotesti cattolici, nel che potendo anch'ella molto giovare, havrà carissimo di sentir ch'ella medesima non tralassi le sue solite diligenze . . .

Pader Ireneo ha da Lonsch anora emprau de gudognar ils catolics en Surselva. El ha racumandau Gion Coray a Roma sin agien giavisch per il „cavalierato di Giesù Christo“ e cuort suenter ha era G. T. Florin survegniu quella honur; plevon Gion de Castelberg a Mels ei daventaus protonotar papal e silsuenter canonic; el haveva susteniu la reforma a Mustér, e sils medems merets serefereva Luci de Mont, dumandond per siu fegl Girolamo il canonicit a Cuera. Archivio di Propaganda a Roma. Vol. 76, fol. 65, ils 14 de matg 1634. Vol. 76, fol. 85, ils 7 de sett. 1634. Vol. 76, fol. 86, ils 3 d'oct. 1634. Vol. 77, fol. 166, ils 28 d'avrel 1635. Vol. 77, fol. 165, ils 28 de matg 1635, Vol. 77, 166, ils 28 d'avrel 1635.

¹²⁰⁾ Haffter, Urkundenbuch p. 125.

de Mont era gia sin via da Milaun culs daners per effectuar in'allianza. Ei fageva prescha, ei mava las tunas, che Rohan seigi gia per s. Martin cun ferma truppa a Cuera.¹²¹⁾

Il caupresident ed il caumistral han clamau il cauderschader Caspar Schmid de Grüneck a Cuera per l'entschatta de novembre (ils 9 de nov.) per secunvegnir tut secretamein sur las tractativas culla Spagna e la damonda, co better ils Franzos anetgamein ord la tiara.¹²²⁾

Genatsch, il confidau de Caspar Schmid, de caumistral Meinrad Buol, della Curia e canonic Gion Flugi e dils spagnols ella Surselva, della missiun caputschina survegn cun auters menaders ensemens l'incumbenza de menar las tractativas culla Spagna, cugl ambassadur Casati. Gia ils 19 de december 1634 sa il nunci de dir, ch'ils Grischuns hagien bandunau Veniescha e marcadien cull'Austria e culla Spagna, ed il medem Genatsch seigi quel che fetschi la «burla» als Venezians; el vegli dormentar els, per buca schar encorscher, tgei ch'el hagi avon maun. Las pretensiuns dils caus e sur representants ein ussa modestas; la situaziun suenter la battaglia de Nördlingen ed ils interess della part spagnola (e catolica) dicteschan ellias. Ils pass atras las Ligias reticas e tras la Valtlina vegnan dai all'Austria e Spagna e quella survegn effectivamein il predomini dal pass s. Glieli entochen il Badus. Per defender quellas vias, mantegn l'Austria treis regiments grischuns sin agien quen; las Ligias surdattan als Austriacs treis fortezias, surtut il pass s. Glieli, furneschan in regiment schuldada a Milaun e retscheivan dalla Spagna-Milaun pensiuns generalas ella cassa dils cumins e pensiuns privatas als menaders. Las Ligias san schar studiar 12 giuvens el collegi helveticum a Milaun. En quei pact duei era ina cunvegnentscha culs subdits esser contenida; quella dat grevas difficultads, ins plaida dad ina restituziun modificada, lu puspei duei l'offerta el contract de Monsonio (25 000 scudis indemnisiaciun per onn) vegnir ac-

¹²¹⁾ Archiv federal, Bern. Frari. Svizzeri, Rosso, Turitg 1 e 21 de de-Casati 1630—41, Lucern ils 4 d'oct. 1634, e Casati ils 10 e 18 d'oct. 1634. Rosso ils 12 d'oct. 1634.

¹²²⁾ Archiv federal, Bern. Frari. Svizzeri, Rosso, Turitg 1 e 21 de de-cember 1634.

ceptada, e finalmein vulan ils Grischuns acceptar la summa e surschar las tiaras subditas a quei prenci ni potentat, ch'els vulan. Per in accord final u definitiv en quella damonda stueva il consentiment dil retg de Spagna esser daus, ed ultra de quei vuleva igl uestg de Cuera far valer sias veglias pretensiuns silla tiara subdita e cheutras survegnir daners, per pagar ils gronds deivets digl uestgiu.¹²³⁾ Genatsch e ses confidai havevan en prescha tarmess in curier tier Robustelli ed Azzo Besta, per haver pli spertamein la risposta ord Spagna, pertgei Azzo Besta mava e vegneva da Milaun en Valtlina per intermediar la fatschenta. Caus e deputai spetgavan ils 26 de december a Cuera silla risposta dil retg de Spagna; las lavurs vid las fortezias havevan calau, ed ils Grischuns patertgavan ded occupar ellas. Genatsch sez batteva ferm per quella sligaziun, ed el sperava, che en paucs dis (il december) seigi il marcau fatgs. Casati era buca meins scaldaus per quella fiera e giavinava Genatsch ed ils auters confidai dad in liuc a l'auter, per vegnir secretamein alla fin cullas tractativas. Encunter la fin de december 1634 haveva el priu la stgisa de pelegrinar a Nossadunaun e s'unir leu culs Grischuns ed aunc culs representants de Sviz. Ei setractava ussa plitost dell'execuziun dil project. Sviz dueva serrar la via sper il lag de Turitg alla truppa svizzera ni truppa franzosa, che havess saviu vegnir en agid e cun Uri, Glaruna, Tirol e Milaun tut en ina serrar ils confins, bloccar las Ligias, fomentar ellas e cheutras dar caschun al pievel de prender las armas e better ils Franzos suls confins. Quater regiments digl imperatur duevan sepreparar el contuorn de s. Pieder e prender il pass s. Gieci e sustener il pievel grischun encunter ils Franzos. Denter ils Grischuns a Nossadunaun era G. P. Guler. Casati e Genatsch havevan relatau ad el tuts projects; mo cheu ha Guler accentuau, che ina uniu cull'Austria e Spagna seigi dependenta dalla restituziun della Valtlina. Era il nunci carteva, che senza quella condizion vegnien las Ligias mai a far marcau culla Spagna. Casati e Genatsch speravan denton, che tut vegni a menar tier in contract, e Casati vuleva en cuort viagiar a Cuera,

¹²³⁾ Archiv federal, Bern. Nunziatura, Scotti a Barberini ils 19 de december 1634.

clamar ina dieta e serrar il marcau cullas Ligias. Immediat dueva l'execuziun dil pact vegrir effectuada.¹²⁴⁾

Guler haveva giudicau pli madiramein, e Robustelli ed Azzo Besta han en cuort destruiu ils projects dils caus, de Casati e Genatsch. Els ein secussegliai cun divers de lur menaders, il podestà de Tirano ed il cancelier della Valtlina ed han finalmein demussau gronda disfidonza encunter ils Grischuns.¹²⁵⁾ Els havetevan udiu, che las Ligias hagien gl'atun 1634 propri vuliu attaccar els cun atgnas forzas, che curiers grischuns seigien viagiai secretamein a Milaun, las consequenzas dil contract projectau seigien buca de calcular, ed alla fin declaran els: Nus vulein tener il contract de Monsonio! Gie els smanatschan schizun de tradir a Rohan tut ils projects grischuns, e Genatsch ha giu grev de giustificar tut sias truschas e declarar, che quei entir project mundi buca encunter il contract de Monsonio. Genatsch ed ils caus vulevan era en quella situaziun buca ceder de lur politica; els patertgavan de schar occupar truppa spagnola ils pass, schar bloccar las Ligias, ed a s. Pieder cantonava la truppa imperiala, per ademplir las condiziuns dil pact secret; era a Blizuna ed Ursèra vigilava truppa en sold spagnol. En quei mument vegrir da Paris il camond de marschar en Valtlina, e quel fa allas fieras spagnolas silmeins per in temps ina fin.¹²⁶⁾

All'entschatta digl onn 1635 compara Gieri Genatsch a Rapperswil ella claustra dils paders caputschins per abiurar avon il pader Rudolf e ses confrars sia cardientscha e passar tier la baselgia catolica. Il pader Rudolf haveva operau el Grischun en tuttas damondas della cunterreforma, ed entras il nunci era el en relaziuns personalas cun Genatsch. Sur ils motifs della conversiun ha la historia giudicau fetg different. Genatsch declara sez, che sia conversiun seigi in act de perschuasiun; mo il temps e las circumstanzias de sia conversiun han adina leventau il pertratg, che las relaziuns dil temps, las relaziuns politicas hagien gidau a stimular el per quella via. Ses compatriots ed

¹²⁴⁾ Archiv federal, Bern. Nunziatura. Lucern ils 19 e 26 de decembre 1634 ed ils 2 e 9 de schaner 1635.

¹²⁵⁾ Archiv federal, Bern. Nunziatura. Lucern ils 16 de schaner 1635.

¹²⁶⁾ Archiv federal, Bern. Nunziatura. Lucern ils 30 de schaner, ils 6 e 14 de fevrer, ils 8 de mars 1635.

amitgs sco mistral Heinrich Carl a Scuol, ils Leonis a Zernez, Paganino Gaudentio ed il quinau de Genatsch, Gion Jodoco ed auters eran seconverti alla baselgia catolica.¹²⁷⁾ Pasch e ruaus per la Giadina e per las Ligias sperava Genatsch mo dallas bunas relaziuns culla Spagna ed Austria, las pusonzas catolicas; sias tendenzas mavan en quella direcziun. Era Genatsch propi da-ventaus in adherent dell'idea autoritativa dil temps e veseva el ell'autoritatad papala, el dogma ed ella disciplina ecclesiastica la ventira morala e spirtala digl avegnir?

A Roma ella congregaziun han las novas della conversiun dil colonnel, che haveva gia prestau en Giadina buns survetschs, svegliau grond plascher; ils paders caputschins han paregliau el cun Saul e s. Paul.

Per ils plevons evangelics ei la conversiun de Genatsch stada ina surpresa. Ils 29 de fenadur han Stiafen Gabriel e Vulpius en ina brev fatg grevas reproschas a Genatsch e smanatschau de sclarir al retg de Frontscha sias truschas cun Casati e la Spagna. Genatsch ha dau ina risposta ed en medem temps supplicau la congregaziun a Roma de declarar a Richelieu ed al pader Giusep a Paris sia situaziun e recumandar el leu.¹²⁸⁾ Genatsch ed ils predicants ein mai pli sereconciliai; la mort de

¹²⁷⁾ Archivio di Propaganda, Roma, vol. 343, fol. 307. Raguaglio ed informatione. Primo a Cernezzo li signor Giovanni Jodoco che prima era predicante in atto nell'Egnadina alta in un luogo chiamato Pontresina. Poi l'Illmo 'Rud. Planta, cavagliere, sua consorta Margarita Traversin, la signora Anna Plantin, sorella del signor cavagliere, il signor Giorgio Grasso, ministrale; il ministrale Pietro Leone, et un suo figliolo Giovanni Leone, dottore di medicina. Ad Ardezzo Rudolf Planta, nipote del cavagliere, quale è statto ministrale et anco vice castellano nel castello di Tarasp, et la signora Elisabeth de Porti sua consorta. A Schuol il signor Carlo Henrico ancora esso ministrale hora per Sua Altezza Serenissima nell'Egnadina. A Ramuosch il signor Giacomo a Zun, già castellano in questo luogo et ministrale. A Santa Maria il signor Daniele Orso, stato podestà a Bormio. Pietro Perla podestà a Teglio et il signor Gialdea, stato ministrale della valle di Sta. Maria; Pedretto Grasso da Cervo, Nicolò Lerenz, anche esso ministrale di questa valle. . . .

¹²⁸⁾ Archivio di Propaganda, Roma, vol. 15, fol. 112, 113, ils 29 de nov. 1635 e Lucern ils 20 de december 1635: il signor Colonel Genaccio non manca della sua costanza, non curando le molestie continue dell'iheretici, che in parte comprenderà dalla qui congiunta lettera dei primi due predicatori de Grisono, con le ben adequate di lui risposta. Havute le

Stiafen Gabriel ils 6 de november 1638 para haver privau Genatsch da grevs quitaus.¹²⁹⁾ Ils paders caputschins e Genatsch sez temevan per sia sort.

La conversiun de Genatsch ei stada de gronda impurtonza politica. Ils menaders spagnols en Surselva, la missiun retica, gl'uestg han survegni in alliau de gronda peisa; las relaziuns culs Schmids ed a. existevan gia avon. Da l'autra vart sesepara el dals predicants e plaunsiu da Guler e schizun dalla parentela (ils Buöls) a Tavau. — Fuss l'allianza spagnola de 1639 stada pusseivla senza sia viulta politica e sia conversiun?

Rohan conquista las tiaras subditas 1635.

Ils 12 d'avrel 1635 arriva il duca Rohan a Cuera, ed ils medems dis marschan siat regiments franzos ella tiara. Ils caus e cussegli dil stadi ed il pievel salidan il bien duca «cun gronda legria». Tschun dis pli tard va sia truppa sul Spligia, ed el cavalchescha cun Boullion sul Septimer a Clavenna. Cheu campa ina truppa franzosa sut Landé ed ina part dils Grischuns. Ils umens della Ligia grischa stattan sut colonnel Gion Tschamun de Florin e ses capitanis ein Conraddin de Castelberg e Giachen de Turre (Breil) per la Cadi, Vincenz Caduff per la Lumnezia, Crest de Montalda per la Foppa, Crest de Florin e Risch de Montalda per Vuorz e Laax, Hercules de Capaul e Padrutt Willi per Flem, Trin e Razen, Gion Stecher per Tusau e Montogna, Gion Marchion per Schons, Giachen Molina

risposte di Francia alle lettere scritte dalla Sacra Congregatione e da V.S. Revma a suo favore, se si puotessero ad esso comunicare per mezo mio stimarei molto a proposito per conservarlo non solo ben affetto, ma obligato ancora, facendo egli certo da dovero per testimonio universale. Pareglia ella biblioteca centrala a Turitg: Simler'sche Sammlung. Briefe von Stefan Gabriel u. Jakob Anton Vulpius an Antistes Breitinger in Zürich (Ilanz 5 (15) Aug. 1635 und Thusciae Rhaetorum, pridie non. 6. Okt. 1635.

¹²⁹⁾ Archiv federal, Bern. Filza 35, Turitg ils 27 de nov. 1638: Vico scriva, che Genatsch seigi returnaus da Milaun a Clavenna, assai rinvigorito . . . per haver lui al suo ritorno ritrovato morto un tal Steffano Gabriel, predicante di gran autorità et che ben maneggiava i popoli Grisoni per moverli alle novità contro Spagnoli come da questi chiaramenti ingannati . . .

per Mesauc. Colonel Brügger e Genatsch cun sia compagnia havevan già occupau il comitat de Bormio. Negliu ei la resistaenza stada de muntada, pertgei il guovernatur a Milaun, cardinal Albornoz, temeva de veginr surprius da tuts mauns, ord la Savoia e da Mantua enneu, e per evitar ina sorpresa, haveva el saviu schar marschar mo 2000 umens sut Serbelloni all'intrada della Valtlina. Ils V cantuns catolics han da Blizuna anora priu Monticello all'intrada de Mesauc, ch'els han pli tard stuiu restituir. Sil pass s. Gieci stavan las compagnias ord il regiment Schauenstein sut ils capitanis Luci de Mont e Carli a Marca sper autras compagnias. —

Il pievel en Valtlina ha il duca calmau entras in manifest, declarond, che negins vischins veginen taccai, ils habitants pertgirai da tutta vendetga e la baselgia catolica protegida e garantida. Las Ligias speravan ussa naturalmein, che las tiaras subditas veginen immediat remessas en lur possess, ed ils 21 de matg ein cauderschader Caspar Schmid, Conradin de Castelberg ed auters sepresentai tiel duca Rohan cun quei giavisch; mo gest en quels medems dis marscha in'armada imperiala encunter val Mustair, e Serbelloni prepara in'attacca spel lag de Como, omisdus clamai dals subdits. Rohan damonda truppa dallas Ligias, e per la Ligia grischa fuorma G. T. Florin in niev regiment cun Crest de Montalta sco colonnel-litinent e Giachen Molina sco major ni serschant-major ed ils capitanis: Conradin de Castelberg, Gion Coray, Crest de Florin, Giachen de Turre, Vincenz Caduff, Hercules de Mont, Gion Heinrich Planta, segner de Razen, Gion Schorsch ed Antoni Derungs de Ruschein.¹³⁰⁾ Era a Paris haveva Rohan duman-dau succuors; mo leu ein ins quels dis en quitaus a riguard la situaziun militara en Flandra, en Lorena ed el Palatinat. Aschia sa la truppa imperiala prender Val Mustair e smanatschar in'attacca sillla Giadina bassa, nua Genatsch ei returnaus cun sia compagnia. Sco Florin formeschian era Genatsch e Guler min-tgin in niev regiment. Mo Fernamont, il menader imperial, attacca Brügger a Bormio, e quel sto untgir cun Landé ensemens a Tirano e da ſeu a Puschlav ed en Giadina.

¹³⁰⁾ Sprecher II, 122.

Duront quels combats era in curier suenter l'auter arrivaus en Surselva ed haveva clamau per agid; ils cumins havevan allarmau ils umens, e quels stavan gia ils 12 de zercladur a Domat. Mo ei regeva tuttavia buca in bien spért. Landé supponeva, ch'il pievel seigi clamaus tras ils partisans dell'Austria e Spagna, e perquei smanatschi el al cussegli dil stadi, sche quel duessi buca vuler la pasch cugl imperatur.¹³¹⁾ Tenor il cronist Sprecher vulevan ils protestants ord la Ligia grischa marschar en agid en Giadina. Ils catolics han proponiu de tarmetter la truppa dil pass s. Glieci en agid a Rohan e surschar ad els il pass. Admonend lu il cussegli dil stadi ils umens de tener il plaid, daus ellas allianzas, ein ils umens della Cadi stai ils emprems, che han consentiu ded ir en Giadina, e cun els ein quels della Foppa, de Flem, Trin, Tusaun, Tschappina, Schons e Valrein semess sin via; ils de Mesauc ein i a Clavenna, nua che Ulisses de Salis dirigeva vigurusamein la defensiun. Las compagnias de Luci de Mont, Carli a Marca e Giachen Tognola eran denton a Clavenna, ed il niev regiment Florin ha occupau il pass s. Glieci. Tut marschava el combat, schegie, ch'ils caus e menaders sco Genatsch e Guler, Castelberg ed ils Schmids eran adina prompts de continuar las tractativas secretas cun Milaun e l'Austria. Els quintavan, ch'ina victoria de Rohan fetschi Milaun e l'Austria mo pli madirs, cura ch'els vegnien puspei a fiera, ed en ina maniera discreta han ils caus (Florin, Finer e Buol) continuau las tractativas. Cuort avon che Genatsch arrivi, era Victor Travers staus a Bolzano tier l'archiduchessa Claudia, ed ussa che la massa truppa vegneva encounter ils confins grischuns, han ils menaders spagnols puspei dau de capir (la fin de matg), che lur desideri fussi de better ils Franzos ord la tiara e far pasch cull'Austria. L'archiduchessa ha deputau il cancelier Lindner e Jakob Hannibal de Hohenems a s. Pieder, Milaun il bursèr Antonio Porras ed ils caus Gieri Schorsch — Genatsch era sco niev convertit buca persuna adattada ed ultra de quei sco colonnel occupaus. — Schorsch era in bien politicher spagnol.¹³²⁾ Treis onns pli baul era el staus

¹³¹⁾ Rohan, Mémoires et lettres I, 166. Rohan allas Ligias, Tirano ils 14 e Clavenna ils 17 e 21 de zercladur 1635. Archiv cantonal, Cuera.

¹³²⁾ Ils caus tractan savens d'accord e per temps era mo in ni l'auter sco persuna privata; els sesurveschan en quels fatgs ded umens

cun Genatsch a Campodolcino ensem en cun in emissari spagnol, Gion Battesta Casnedo de Gravedona. Rohan ei tras umens de Maienfeld vegnius en possess della brev de Schorsch a Porras; el ha citau Schorsch e vuliu castigiar el; mo Genatsch, che capeva de menar Rohan davos la cazola, ha plidau en favur de siu partisan e cheutras era spargnau grevas difficultads als caus.

Rohan ei ils 23 de zercladur arrivaus da Clavenna a Zuoz en Giadina, per tener cussegl d'uiara; pertgei in success era in ner basegns, per impedir las Ligias de tractar sut maün culla Spagna. Rohan marscha a Livigno, attaca leu Fernamont, che vul penetrar en Giadina.¹³³⁾ Rohan va silsuenter tras Puschlav puspei en Valtlina, per impedir l'uniun della truppa imperiala e spagnola. El batta Fernamont a Mazzo e sevolva encunter Serbelloni, e quel seretrai. Milaun sto temer in'attacca de Rohan; pia duei ina bloccada encunter Mesauc, Clavenna, Valtlina donnegiar ils Franzos, e daveras vegn la fom, e l'armada de Rohan pitescha. Ultra de quei mauncan ils daners de pagar la truppa e menaders. En quella situaziun propona gl'imperatur, de remetter las tiaras subditas als cantuns catolics, entochen che la pasch generala seigi fatga. Uri animescha schizun la Cadi e Conradin de Castelberg ded acceptar quella proposiziun; mo era la Cadi vul saver nuot de quei project, e la dieta dils 16 de november 1635 a Glion ha immediat refusau quei pertratg, pertgei in'uniun culs cantuns catolics havess realisau lur project ad interim ni provisoricamein, havess infirmiu las relaziuns cun la Spagna e menau tier l'independenza dallas Ligias; ils Grischuns vulevan lur dretg e possess e quei en quels dis tonpli, che Rohan haveva la fin d'october 1635 aunc victorisau sur Fernamont en val Fraele e diesch dis pli tard a Morbegno sur Serbelloni. La truppa imperiala ha bandunau Bormio e Tirol. En quels combats haveva Genatsch prestau buns survetschs ed affirmiu la confidonza de Rohan.

Ils Grischuns vulevan ussa vegnir en possess de lur tiara subdita; Rohan ha survegniu camond de restituir la tiara,

sco Genatsch, Schmid, Schorsch. Rohan vegn empau cuglienaus era tras las racumondaziuns della Curia a Paris e sto perquei crer a Genatsch.

¹³³⁾ Haffter, E., p. 268.

mo en general setener vid il contract de Monsonio; ils Grischuns vulevan la tiara sut medemas circumstanzas sco avon la massacra de 1620, ed en quei senn influenzava il guovernatur Guzmann, marchese de Leganez els. Ils 4 de schaner 1636 ein ils subdits e Grischuns (G. T. Florin, Rudolf de Marmels, Gion Schorsch, Gregori Meyer, Fort. Juvalta, Gion Paul Beeli, Meinrad Buol, Gion P. Guler senior e Gion Antoni Buol) sera-dunai a Clavenna tier Rohan ed han suenter greva discussiun concepiu ils 14 artechels de Clavenna, che schevan: Ellas tiaras subditas vegn mo la baselgia catolica tolerada; adherents della confessiun evangelica astgan avdar mo dus meins en quellas tiaras; la giudicatura vegn en mauns dils subdits; mo ils treis officials grischuns, ils provediturs, han de nominar ils derschaders ord il miez dils subdits. Ils Grischuns obtegnan la suveranitad nominalmein ed in tribut annual de 25 000 renschs. Rohan sefidava sil cussegl de Genatsch, che batteva per quei contract. El ha pli tard raquintau, ch'el vulevi tras quel metter mal denter ils predicans e Svizzers e Rohan. Ei quei verdeivel? Il contract semigliava empau ferm ils pertratgs de Nossadunaun dil december 1634, el adempleva era ils giavischs della missiun retica e della congregaziun a Roma a riguard la confessiun en Valtlina, e quei motiv ha bein occasionau Genatsch de promover el encunter ses novs adversaris, ils predicans.

Ils subdits han en cuort acceptau quels artechels; la dieta grischuna ha dumandau midadas en favur dils protestants, e Gion Schorsch, Gion Tscharner e Gieri Genatsch ein i tier Rohan a Clavenna per obtener las concessiuns, che la Frontscha saveva cun risguards viers la Curia romana e la Spagna buca conceder.

Silla dieta dils 11 d'avrel 1636 a Tusaun han Lasnier, Priolo il secretari de Rohan, e surtut Genatsch operaou cun tuts rampins, per far acceptar ils artechels de Clavenna. Genatsch ha gidau Priolo a distribuir daners als deputai dellas Ligias, mo sut maun declara el, ch'ins savessi haver meglieras condiziuns da Milaun ed aunc construir baselgias evangelicas.

Rohan ignorava la vera situaziun e s'occupava cun in project d'uiara encunter Milaun. El vuleva penetrar sur cuolm da Cla-

venna a Blizuna, per impedir la truppa imperiala de passar da Constanz sur Rapperswil e sul Gottard giu a Milaun. Da Blizuna vuleva Rohan attaccar Chiasso e Milaun. Richelieu ha l'entschatta digl onn 1636 tarmess Lasnier sco intendant ed ambasadur ella Rezia, surdau ad el 60 000 livras per construir fortezas en Valtlina ed intercurir las relaziuns della truppa. Quei project de Rohan haveva Richelieu buc saviu approbar; el supponeva, ch'ils cantuns catolics savessien per vendetga lu cerrar la via da Basel a Cuera.¹³⁴⁾ Rohan ha perquei fatg in'emprova de marschar entochen a Lecco, mo ei la fin de matg 1636 returnaus a Clavenna; el haveva survegniu novas sur las practicas dils caus e menaders culla Spagna. La malsogna, la miseria en tuttas fuormas sminuevan puspei la truppa, ed era Rohan ei cuort suenter vegnius grevamein malsauns.

Caus e menaders tractavan vinavon culla Spagna ed Austria cugl intent de sedisfar dals Franzos e vegnir en possess dellas tiaras subditas. Pli e pli crescha la partida, ils officials della Valtlina spetgan vess, de saver cavalcar sco suverans ella tiara subdita. Buca meins ei il guovernatur a Milaun premuraus, de vegnir tier in marcau cullas Ligias. Serbelloni fa tutta breigia en quei senn en Mesauc, e Gion Coray viseta Mesauc bein en talas ed autras fatschentas, ferton che Gion Travers tracta ad Innsbruck ed a s. Pieder. Ils 11 de zercladur tar-metta il cussegl dil stadi R. de Marmels e Gion Antoni Buol a Balzers tier in commissari austriac.¹³⁵⁾ L'archiduchessa Claudia vul s'orientar sur l'intenziun dellas Ligias, surtut sch'ei seigi ver, che Rohan vegli marschar encunter Tirol — el haveva bat-tiu ils Milanes — e schebein las Ligias dettien succuors a Rohan. Ils caus damondan il pareri dils cumins, e quels declaran cun gronda pluralitat: Nus tenin la pasch perpetna de 1518. Ellas tractativas, che ils caus han cull'Austria, san els ussa pusar sillas victorias de Rohan e sillla posiziun della Frontscha.

Il retg a Paris targlinava per sia sventira de confirmar il contract de Clavenna, ed ellas Ligias mava la discussiun vina-von. Ils preducants smuldevan ils artechels de Clavenna e vu-

¹³⁴⁾ Rott, VI, 97 e Haffter 272.

¹³⁵⁾ Sprecher II, 198, 199.

levan era en Valtlina cumpleina libertad per lur confessiun; els admonevan il pievel de buc acceptar quei marcau. Ils Schmids a Glion havevan gia silla dieta a Tusaun fatg viva opposiziun al contract, ed els menavan lur combat vinavon en tutta premura. Da Milaun anora vuleva il guovernatur impedir il contract; pertgei el temeva, che Milaun vegni cheutras mai tier pasch ed accord cullas Ligias ed era mai en possess dils pass. Casati ei perquei dapi la primavera ad Ursera e sediscuora culs menaders della Cadi; el stat era en correspondenza cun Luci de Mont, e quel rapporta ils evenements. En Mesauc ei Serbelloni staus sez. Il mistral Tadeo Bonalini e siu fegl Martin e Lazaro Toscano ein ils pli fervents amitgs de Milaun, e cun els tracta era Gion Coray de Laax. Girolamo Corte de Gravdone sco emissari de Serbelloni raquinta cheu puspei, che la Spagna vegni a restituir las tiaras subditas bia pli favoreivla-mein allas Ligias, sch'ellas siarien ina allianza culla Spagna; el distribuescha era daners, e Nicolò Brochi de val Mesauc vegr per commissiun de Milaun gl'avrel 1636 cun impurtontas summas daners ella Surselva, secusseglio a Glion culs Schmids ed emprova de gudognar auters menaders sursilvans, che stattan en survetsch de Frontscha sut Rohan.¹³⁶⁾ Quei ei tonpli lev, essend che la Frontscha sa buca pagar ses officiers e sia schuldada. Rohan ha novas dellas truschas dils spagnols, mo el vul aunc buca crer, che Genatsch seigi il pli prigulus adversari de siu retg. Il secretari Priolo ei sin via viers Paris, per l'approbaziun dil contract de Clavenna, e returnond el suenter miez zer-cladur 1636, duei el empermetter ina modificaziun dils artechels ed il pagament della truppa. El porta mo treis cadeinas d'aur per quels, che han a Tusaun sedeportau «alla franzosa», ina al colonnel Salis per siu survetsch militar, las duas outras a «dus principals Grischuns», forsa a Genatsch. Priolo ha ludau al retg, co Genatsch hagi operaui a Tusaun, per far acceptar il contract de Clavenna e sur ses merêts en general; el ha ussa instrucziun de remunerar Genatsch (che convenga, per il credito

¹³⁶⁾ Archiv federal, Bern. Nunziatura 32. Scotti a Barberini. Lucern ils 11 de matg 1636. Rosso al senat Turitg ils 17, 24 de matg e 14 de zer-cladur 1636 en Filza 32.

ch'ha nella Rethia, il tenerlo consolato) e tener siu regiment e surdar ad el quels de Guler e Florin.¹⁸⁷⁾

Genatsch ei sez buca aschi segirs de sia posizion ed era buca d'in success dellas practicas spagnolas; pertgei ellas dependan naturalmein dals caus. El spetga plitost, ch'ils regiments grischiuns vegnien tuts relaschai; el offerescha perquei entras siu confidau scarvon Gion Tscharner de Cuera, de far 2000 umens per Veniescha e passar leu en survetsch, e Veniescha rispunda, ch'ins vegni a siu temps a far diever de sias offertas. Aunc la fin de fenadur 1636 emprova el de vegnir en survetsch venezian; el scriva, che Rohan hagi offeriu ad el in brevet de capitani ed ina compagnia en Frontscha. Rosso duei declarar, co el hagi de secuntener; el ei gie pensionari venezian. El reca monda siu frar ed il fegl de scarvon Tscharner.¹⁸⁸⁾

Priolo haveva dasperas purtau pauc bunas novas a Rohan. A Paris havevan Boullion, il generalintendant e pader Giusep declarau, ch'ils artechels de Clavenna seigien concepi memia pauc en favur dils catolicks; il nunzi scheva, che la Curia romana vegli buca s'occupar d'in contract d'in hereticher (Rohan). Finalmein era Priolo suenter cussegl cun Mesmin e Coeuvres vegnius culla risposta, ch'il retg sappi buca s'allontanar dal contract de Monsonio. Returnond Priolo a Cuera e Traona han ils deputai dellas Ligias insistiu, ch'ils artechels de Clavenna vegnien immediat approbai e la truppa pagada. Rohan di: Nus essan piars e quei senza remischun. El emprova de giavinar ils deputai a Clavenna, adumbatten. La revolta entscheiva. —

La revolta encunter ils Franzos 1636.

Entuorn mesastad 1636 regia ellas Ligias gronda malaveglia. Ils predicans s'altereschan sur ils artechels de Clavenna, ed ils officiers grischiuns lamentan, che la Frontscha paghi buca la schuldada. Gieri Genatsch posseda dad ina vart la confidanza de Rohan ed ha dall'autra vart gl'emprem plaid tiels officiers, ina posizion fundada en sia natira energica e brutala ed en sia

¹⁸⁷⁾ Rosso al senat, Turitg ils 28 de zercl. 1636.

¹⁸⁸⁾ Rosso al senat, ils 14 de zercladur e 12 de fenadur 1636. Guler offerescha schizun capital a Veniescha, 6—7000 scudis a 5 %.

premura per ses interess personals e sia ferma ambiziun. Ha el gia pli baul, surtut dapi 1633 a Sondrio ed a Nossadunaun surviu als caus els projects politics, sche s'avvischina el ussa als caus sco menader e representant dils officiers. Il cauderschader Conradin de Castelberg ei memia giuyens, per sez iniziare direger il moviment, e buca della pasta brutala de Genatsch, per daventar siu amitg personal; mo ella disfidanza viers la Frontscha han els bein ils medems sentiments, e davos els stat Florin, il cauderschader cass, igl officier donnegiau en ses interess financials ed en ses sentiments politics, mo senza la forza e voluntad rigurusa de Genatsch. Aschia acquista Genatsch en cuort sia preponderonza politica e militara. Mo Guler entscheiva ad observar cun empau reserva siu far e demenar, e davos el stattan ils predicants, surtut Gabriel e Vulpius ed il pievel de Giadina ed de Portenza.

Ils dis de zercladur, cura Priolo era de retuorn cun ils numnai mussaments de favur per Genatsch, haveva quel rabbitschau aschilunsch, ch'ils capitannis han engirau de bandunar il survetsch franzos, sche il retg de Frontscha paghi buca enteifer cuort temps la truppa. Ils regiments eran gia sminui; ei dava compagnias, che dumbravan mo 10 umens pli. Ils officiers grischuns tarmettan aunc Giachen Molina a Paris, per contonscher lur dabien, che munta sin cerca 800,000 livras. El damonda dei-vets restonts de 1632, 1635 e 1636 e declara, ch'ei seigi nunpusseivel de continuar il survetsch. El retuorna ils 10 de settember cun ina cadeina d'aur per sesez e relata, ch'il retg vegni en cuort a pagar ils dei-vets entras Priolo; mo quel vegn culla cagna de 100 000 livras.¹³⁹⁾ Susteni dals caus van ils officiers a Clavenna, anflan leu Rohan grevamein malsauns e continua-schan il viadi a Sondrio tier Lasnier. El paga ad els 30 000 livras e lai sperar sin pli. De retuorn a Silvaplana, engiran ils officiers, ded alzar gl'emprem d'october las bandieras e marschar a Cuera. Els avisano Rohan, ch'els vegnien a prender la partida, che cunvegni allas Ligias.¹⁴⁰⁾ L'entschatta d'october

¹³⁹⁾ Rosso al senat, ils 23 ded uost 1636. La brev al retg, Cuera ils 11 de fenadur, ei signada da Molina, Florin, Guler, Genatsch, G. A. Buol pil regiment Brügger. Affaires Etr. Grisons VII. Archiv federal, Bern.

¹⁴⁰⁾ Rohan a Chavigny ils 20 de settember 1636. Bibliot. Nat. a Paris f. fr. 5190, fol. 159.

marscha la truppa grischuna ord Giadina, ord Valtlina e Clavenna e seposta en Tumliasca, Schons ed el cumin de Belfort, per serrar il pass ed agir en cussegl e cumionza culs caus. Ina partida franzosa dat ei ussa strusch en quei mument. Genatsch e ses partisans spagnols declaran, che la Spagna vegni a pagar ils deivets della Frontscha ed ademplir ils giavischs dellas Ligias a riguard las tiaras subditas.

Rohan ei surstaüs e tarmetta spertamein Lasnier e Priolo a Cuera; els duessan quietar ils officiers ed il pievel. Lasnier ei arrogants e drova smanatschas, gie schizun ingiurias viers ils officiers; el numna caus ed officiers traditurs. El dismetta Molina, che selubeschä ded opponer ad el, da sia plazza ded interpret. A cauderschader Conradin de Castelberg fa el a mogna de metter il tgau avon ils peis, ad auters de «passar sil venter». Tgi ch'ei entochen da cheu staus en dubis, da quala vart se-better, semetta culs caus e Genatsch. Era gl'uestg Gion Flugi fa discretamein curascha als menaders, per sedeliberar dalla Frontscha. Genatsch, che domina pli e pli ellas fatschentas sper ils caus, insista ussa, che Rohan vegni personalmein a Cuera.¹⁴⁾ El vul eleminar el da sia truppa, per sepatrunar de sia persuna. Rohan, aunc malsanetschs, selai purtar sur cuolm; el discuorra a Tusaun culs menaders della truppa; el anfla a Cuera sillas portas dil marcau la truppa de Genatsch, il capitani Gion Tscharner, in dils confidai amitgs e congiurai de Genatsch e capitani Saluz. Rohan sto udir las grevas lamentaschuns sur il secuntener de Lasnier, el disapprobescha tut, vul far bien; mo ils 13 d'october comparan ils menaders militars avon ils caus e declaran: Nus obedin buca a Rohan e la Frontscha; pertgei ella ha ni dau la Valtlina, ni pagau nossa truppa. Genatsch e ses conspirai teman, che Rohan savessi menar tier in accord. El cusseglio perquei malignamein als caus de du-mandar Rohan, tgei ch'il retg hagi decidiu a riguard ils artechels de Clavenna. Rohan ha ordras de quescher; el sa indicar las midadas, ch'il retg ha giavischau sin cussegl de pader Giusep e de Boullion. Ella dieta regian ils spagnols, ed ina gronda majoritat ei encunter tuttas midadas dils artechels. Genatsch, Florin, ils Schnmids, Castelberg, ils de Marmels, Coray

¹⁴¹⁾ Rosso al senat. Turitg ils 22 de sett. 1636. Salis, Memorie, 358.

vulan better ils Franzos ord la tiara, quei ei tonpli lev, essend che Richelieu lai siu bien duca a miez liuc. —

La fin d'october 1636 vegn la dieta dellas Ligias a Glion, e cheu croda la decisiu. Rohan ha giavischau ella a Cuera e survegniu ina risposta impertinenta.¹⁴²⁾ Ils sis regiments grischuns passan ord survetsch della Frontscha ed en survetsch dellas treis Ligias, e quellas surprendan entras ils caus era la protecziun, quei vul dir, ellas smanatschan a Rohan cull'uiara, sch'el duessi vuler attaccar ils regiments dalla Valtlina anora, nua sia truppa stat (sut Lecques). Ils agents austriacs sepor-schan de pagar la truppa grischuna da calonda november naven. La dieta concluda de tarmetter ina deputaziun a Cologna tiel congress de pasch; en verdad dueian ils deputai Schorsch, Meinrad Buol e Genatsch ir ad Innsbruck e far marcau culla Spagna ed Austria; pertgei ils caus e menaders ein gia vegni d'accord de tener leu cussegl cugl ambassadur spagnol Don Federigo Henriquez. Els han dals caus bein instrucziuns secretas.¹⁴³⁾ Rohan sa buca impedir quella viseta ad Innsbrück, aschi bugen ch'el fagess quei; el sefida sin Genatsch.¹⁴⁴⁾ El medem temps va Gion Gudegn Schmid de Glion en Svizzera cun Rudolf de Salis-Zezras, per rugar ils Confederai de buca sustener ils Franzos e buca dar la via a nova truppa. Ad Innsbruck tractan ils treis umens liung e lad — da miez november entochen il schaner 1637 — sur las duas damondas capitalas: Co rabbitschein nus ils Franzos ord la tiara e sut tgei condiziuns vegnin nus tier nossa independenza e nossas tiaras subditas. Ils Grischuns, Austriacs e Spagnols vegnan tier ina cunvegnientscha. L'Austria tschenta la truppa de Gallas a Lindau, Serrbelloni s'avonza da miezdi enneu encunter Clavenna, mo ni in ni l'auter passa sin territori dellas Ligias ni dellas tiaras subditas. Ils Grischuns catschan sez ils Franzos ord la tiara e prendan lur posiziun ellas tiaras subditas. Il pertratg de segidar sesez ha cheu victorisau.

¹⁴²⁾ Rosso al senat, igl 1 de november 1636.

¹⁴³⁾ Salis, Memorie pag. 359.

¹⁴⁴⁾ Avon che viagiar ad Innsbruck, ei Genatsch aunc ius tier Rohan a Cuera ed ha schau crer quel, ch'el vegni a relatar tut; ei setracti mo de mantener la pasch cull'Austria.

Rohan ei duront quei temps a Cuera sco sin spinas; el spetga sil resultat ded Innsbruck e vul pacificar las Ligias egl intern. El paga 130 000 livras dils deivets als officiers, emprova de far bien quei che Lasnier ha tartignau. Ils 7 de december 1636, duront che Buol, Schorsch e Genatsch ein ad Innsbruck, siara el marcau culs caus; el empermetta en tschun jamnas puspei 130 000 livras ed il reminent de ses deivets en treis meins, e la truppa grischuna renconuscha el puspei sco menader. Ella dieta dils 9 de december sa Rohan annunziar, ch'il retg hagi approbau ils artechels de Clavenna e Tusaun, ch'el vegli restituir las tiaras subditas ed aunc schar ad els forzas militaras, per sedefender encunter igl inimitg, che duessi vuler passar suls confins. Rohan ha ussa sez puspei buna speranza, ed ils menaders entscheivan per part a ballucar.¹⁴⁵⁾ En Svizzera ein ins perschuadius, che tut prighel seigi svanius. Ils progress de Rohan a Cuera ein in grond avantatg per ils deputai ad Innsbruck. La Spagna vul ussa remetter las tiaras subditas e serrar in'allianza, semiglionta a quella culs cantuns catolics, per buca leventar scuidonza. Tut duei esser in'augmentazion fetg favoreivla della pasch perpetna de 1518. Ils 17 de schaner vegn ad Innsbruck il marcau signaus, e Schorsch, Genatsch e Buol vengnan a casa.¹⁴⁶⁾ Sin viadi rocla Genatsch cun sia schliusa, sefa

¹⁴⁵⁾ Rohan allas Ligias ils 30 de december 1636. Archiv cantonal. Rosso al senat ils 7 de fevrer 1637. Archiv federal, Bern.

¹⁴⁶⁾ Genatsch, Schorsch e Buol van sin lur retuorn tras la Giadina bassa; pertgei Genatsch vul s'orientar sur las relaziuns. La missiun ha els onns 1635 e 36 giu bien success; mo la stimulaziun encunter Rohan e la Frontscha ha encuraschau ils adversaris dils paders; els han cun paucas excepziuns puspei priu possess de pervendas e baselgias e persequitau ils convertits; surtut mistral Heinrich Carl a Scuol ha, sco il pli fervent catolic, stuiu desister dalla mistralia ed ei vegnius maltractaus; semigliontamein ein mistral Giachen a Zun a Ramuosch e vice-mistral Domenic Janett de Tschlign vegni dismess. Ils catolics en Surselva eran talmein occupai cun la damonda dell'allianza spagnola-austriaca, ch'els demussavan era ussa pauc attenziun per la damonda della Giadina, schegie che lur politica era ussa tuttavia dictada dad interess confessionals. Era Genatsch haveva en Giadina quella gada bein la mira de sclarir ses amitgs, surtut ils Leonis sur las vias, ch'el mava, per stimular ils Engiadines per la revolta. Il contract ded Innsbruck empermittava la independenza dellas Ligias egl intern. Quei era per il pievel protestant de Giadina ina buna speranza de restar en possess de sias

empau mal in schui ed ha ina buna stgisa de buca comparer tier Rohan; mo el admonescha ils amitgs e partisans de preparar la revolta. Ils 6 de fevrer resda Genatsch avon la dieta, naturalmein senza indicar ils pugns principals; el plaida d'in contract de buna vischinonza, ed aschia relata el era a Rohan. Agl ambassadur venezian scriva el, che l'Austria seigi bein disponida per las Ligias, ed el damonda en medem temps sia pensiun de 300 ducatas.¹⁴⁷⁾ La sera, suenter haver rapportau avon ils caus e deputai sur las tractativas ad Innsbruck, serimnan Genatsch, caus e deputai en casa de prefect Gregori Meyer; ils deputai ad Innsbruck resdan aviartamein sur il resultat de lur viadi, ed ils umens de quella radunanza suttascrivan «l'allianza dils concadenai» (Kettenbund) per «cun amur, affecziun e premura» encuir mieds e masiras de migliurar la sort della tiara; els empermellan de tener tschellau lur far e render responsabels mintgin, che cunterfetschi a sias obligaziuns, mo era de porscher la veta per la defensiun ded in dils lur, sch'el vegni persequitaus. Ils concadenai ein: cauderschader Conradin de Castelberg, Gion Gudegn Schmid de Grüneck a Glion, Rudolf de Marmels, colonnel Florin, Giachen Balliel, Crest Florin, colonnel Cristoph Rosenroll, Gion Schorsch, Christoph Montalta, Gion Coray, Gion Guglielm Schmid, ord la Ligia della casa de Diu: Gregori Meyer, Gion Bavier, Fortunat Juvalta, G. Paul Beeli, capitani Dietrich Jecklin, Rudolf de Salis, capitani Rudolf de Planta, Nicolaus Albertini, Gion Tscharner, Rudolf Travers, Gion Victor Travers, Gion Saluz e capitani Gion Jenny, ord las X dertgiras: Gieri Genatsch, Meinrad Buol, Paul Buol, commissari Gion Sprecher, Andreas Sprecher, vicari Gubert

pleivs; ils paders stuevan sperar sin Genatsch, ils catolics ed igl avegnir. Genatsch empruava de mantener l'unitad interna, e quella disturbavan surtut Rudolf Planta e siu nevs Rudolf, il castellan de Tarasp, che perseguitavan lur concartents, ils Leonis. En quei senn sevolva Genatsch ad Innsbruck tier barun Moor e recamonda leu ses amitgs, ils Leonis. **Haffter**, Urkundenbuch, p. 138. Archivio di Propaganda, Roma, vol. 343, fol. 32, Relatione ed informatione, vol. 136, fol. 171, Ireneo alla congregaziun, ils 20 d'oct. 1637.

¹⁴⁷⁾ Brev de Genatsch, Coira, li X Gennaro 1637 e Rosso, ils 14 de fevrer 1637; Vico al senat, Turitg ils 21 de fevrer e 7 de mars 1637, Frari. Svizzeri 33.

de Salis, Ambrosi Planta, Gion Pieder Enderlin, Leonhard Wildener e mistral Gieri Wiezeli.¹⁴⁸⁾ Els han l'intenziun de better ils Franzos ord las Ligias ed ir tier in'allianza culla Spagna, sco las relaziuns grischunas dicteschan.

La situaziun de Rohan era denton gia il december semi-dada en mal. Lasnier, il scroc, che sfrusava ils daners della cassa franzosa e fageva gudogn malgestamein cul paun della schuldada, haveva en medem temps fugau a Paris encunter Rohan. El haveva secret al retg, che Rohan fetschi rauba, tegni culs protestants, la Ligia grischa lamenti, che Rohan hagi buca dau in colonnel catolic (de Mont), elegiu mo protestants sco novs capitanis ed impediui ils paders caputschins en lur propaganda.¹⁴⁹⁾ Malgrad che Lasnier di manzegnas e ch'il cardinal de Lyon ei seperschuadius della nunverdad, resta in dubi tier Richelieu, e Rohan survegn buca il daner empermess alla truppa. L'armada en Valtlina demoralisescha pli e pli. —

La truppa de Serbelloni s'avonza tochen ella fortezia a Fuentes; truppa austriaca vegn encunter Landeck ed encunter il pass s. Glieci. Rohan survegn novas dils projects dils concadenai; el renfatscha quellas truschas secretas a Genatsch; quel declara, che quei seigi in'invenziun u intriga dils adversaris; mo Rohan sa cuort suenter seperschuader, che tut ei en prighel. Ils 3 de mars scriva Genatsch a Vico, che la fiera cul l'Austria seigi fatga.¹⁵⁰⁾ El sez ha retschiert bialas empermischuns e regals ad Innsbruck. Ils 10 de mars 1637 serimna la dieta. Rohan, vesend il prighel, vul remetter la Valtlina tenor ils artechels de Clavenna e Tusaun; el damonda sis jamnas temps, per saver scriver al retg ed ademplir ils giavischs dellas Ligias e della truppa grischuna. E daveras vul ina pluralitat aunc ussa tractar culla Frontscha; perfin sils cumins dat ei bia ras vuschs encunter Genatsch ed ils caus e lur partisans. Denton vegn da Paris mo ina tiarza dil sold, e caus e deputai se-decidan ussa tier in'acziun.¹⁵¹⁾ Ils treis caus (Castelberg, Meyer

¹⁴⁸⁾ Da quels umens eran 10 buca stai ella radunanza ed han bein suffascret pér suenter, aschia Balliel, Crest Florin, capitani Rudolf Planta etc.

¹⁴⁹⁾ Rott, V, 183.

¹⁵⁰⁾ Coyra, li 3 marzo. Frari. Svizzeri XXXIII.

¹⁵¹⁾ Rott, V, 190.

e Buol) relaian in manifest al pievel e cloman ils umens grischuns per ils 20 de mars a Zezras sut las armas. Caus e colonnells s'accordeschan sur il secuntener ella revolta. Ins vu buca tolerar **in menader cun cumpleina autoritat**; perquei dueian ils colonnells sescumiar el dar la parola: Genatsch, Molina, Guler e Florin ed ils colonnel-litinents Travers e Buol. E per impedir la resistenza dils predicans, veggan ils decans (Stiafen Gabriel, Hartmann Schwarz e Gieri Saluz) instrui sur tut las preparaziuns ed intenziuns dils menaders. Cauderschauder Conradin de Castelberg va spert en Surselva a clamar las bandieras sut las armas. Ils regiments en Tumliasca sevolvan per part encunter Clavenna e Valtlina, per sepatrunar dellas tiaras subditas; in'autra part arriva avon Cuera. Ulysses de Salis, che vul tener siu engirament de fideivladad al retg de Frontscha, duei veggir remplazzaus entras Rosenroll.

La truppa a Zezras ha la mira de prender la fortezia spel Rein e serrar a nova truppa l'entrada ellas Ligias.

Divers cumins e vischnaucas sco Mesauc, Igis, Zezras, Termin han buca viu bugen il manifest; Genatsch ha cheu biars adversaris; auters teman la Spagna-Austria e san buca emblidar il passau. Brügger vegg cun amur e per forza tier la truppa grischuna a Zezras. En Valtlina stat aunc Lecques cun 3000 umens, che savessen sebetter sils Grischuns, mo quella truppa ei malnutrida e strusch vestgida.¹⁵²⁾ En quella situaziun segna Rohan ils 26 de mars 1637 in accord, capitulescha ed empermetta de bandunar cun tut sia truppa la tiara.

Las Ligias reticas van sut il predomini spagnol.

Rohan haveva empermess de bandunar la tiara cun sia truppa els dis suondonts, pia dals 20 d'avrel entochen ils 5 de matg. Lecques ha survegniu il camond de marschar cun ses 3000 umens a Cuera. Ulysses de Salis a Clavenna ei sin cussegli de Rohan sesuttamess als novs menaders ed ha silsuenter surdau Clavenna alla truppa de Genatsch. Denton era Priolo returnaus da Paris, e paucs dis suenter ein Jean d'Etampes-Valencay e

¹⁵²⁾ Rott, V, 193.

Guébriant vegni a Cuera, per aunc inagada empruar de mantener la posiziun franzosa ella Rezia. Els han offeriu a Genatsch 50 000 livras, in brevet de marschal de camp e las compagnias de colonnel Brügger e de Schauenstein en Frontscha, sch'el surlaschi (en uniun culs caus?) a Lecques la fortezia dil Rhein cun 1000 Franzos sco guardia. Cheu havess la Frontscha saviu augmentar sias forzas e pertgirar la Rezia dall'Austria. Genatsch ha stuiu confessar, che quei havessi el aunc avon miez mars saviu ponderar, ussa, la fin d'avrel seigi ei memia tard, schegie ch'el seigi adina staus in amitg d'ina allianza della Frontscha-Rezia-Veniescha.¹⁵³⁾ Genatsch ed ils caus eran gia en possess dil contract, ch'els havevan signau ad Innsbruck ils 17 de schaner 1637.¹⁵⁴⁾ Quei tradiment visavi caus (?) e Ligias fuss per Genatsch era staus memia prigulus.

La truppà franzosa marscha en liungas colonnas sul Spligia e sul Septimer a Tusaun e Cuera. Lecques sa aunc buca sereconciliar cun la sort de sia armada e de siu menader. El propona de surprender Genatsch, Travers e Rosenroll, ils capocongiurai a Cuera e mazzar els. Rohan vul saver nuot d'in tal act. Salis arriva da Clavenna. Lecques damonda sia assistenza encunter ils congiurai; Salis rispunda: Gl'ei memia tard, jeu hai adumbatten avertiu il duca avon Genatsch. Lecques presenta in secund project. Ils Franzos dueian marschar encunter Ragaz, mo schar anavos a Cuera e Zezras entgins officiers e schuldada zuppada, e lu duei la truppa sevolver e veginr anavos en agid als umens restai a Cuera e Zezras. Rohan vul tener plaid. Genatsch e divers conspirai compognan el a Ragaz; sils confins vul Lecques attaccar «il traditur» Genatsch. Rohan sto calmar el e continua-scha siu viadi tochen a Genevra. En Frontscha astga el buca comparer, pertgei Richelieu vul metter el en perschun. El va silsuenter en survetsch de Bernhard de Weimar, vegin blessaus avon Rheinfelden e miera a Königsfelden. El rauissa ella catedrala de Genevra.

¹⁵³⁾ Rott, V, 211. Salis, Memorie 380.

¹⁵⁴⁾ Haffter, E., pag. 315 e Sprecher II, 236. Ulysses Salis, Memorie suppona, che Genatsch tracti en general sin agien quen e sin atgnæ responsabilitad; quei ei ina errur. Sprecher para esser orientaus sur las vias de Genatsch mo tras Guler e sia partida.

Strusch ha Rohan giu bandunau la tiara, sche prendan ils menaders possess dellas pazzas impurtontas. Genatsch tschenta sia truppa a Clavenna ed administrescha quei segneradi, il pli impurtont en tiara subdita e preferius da tut ils officials.¹⁵⁵⁾ Rosenroll va a Mantello-Traona, Buol a Tirano, Travers a Ponte, Florin marscha sil pass s. Glieci, e Guler surpren la fortezia dil Rhein.

Il tractact ad Innsbruck dils 17 de schaner 1637 haveva dau la libertad confessionala en Portenzo e Giadina, aviert il pass alla truppa spagnola-austriaca, e retg Filip ils IV saveva far 6000 umens truppa ellas Ligias; mo la restituzion dils subdits — la caussa principala — era buca affirmada e signada. Bein havevan Henriquez e tuts emissaris spagnols adina declarau, che quei seigi buca ina damonda, che prepari difficultads.¹⁵⁶⁾

A Milaun ed ad Innsbruck haveva ins era strusch cartiu, che l'interresa dils caus ed officiers hagi success. Ils 18 de mars, il di ch'il pievel marschava, clamaus dals zenns, cun bandieras sglatschontas ord tut las valladas a Zezras, era Gion Coray de Laax ius sin trutgs isolai tochen a Gravedona e da leu a Milaun, per buca esser observaus da Lecques e da Salis ed haveva purtau las bunas novas della revolta al guovernatur Leganez, e returnaus a Cuera, ha Genatsch tarmess el anavos a dumandar daners e muniziu. Il guovernatur ha sinquei depautau Don Nicolò Cid ils 12 d'avrel ellas Ligias. Genatsch, Rosenroll ed Enderlin han conferiu cun el a Spligia e silsuenter a Cuera. Cheu ha Don Nicolò ils 12 d'avrel giu biars della dieta a meisa «tut ina sontga dumengia», e la damonda dellas tiaras subditas ei vegnida ventilada.¹⁵⁷⁾ Gia 15 dis pli baul va Antoni Molina a Milaun en quella fatschenta. Mo ussa, ch'ils Franzos ein ord la tiara, plaida Leganez empau auter. El insista sut influenza dils subdits e della missiun pli e pli detschartamein sil contract de Monsonio, ed ils subdits pretendan, che sulet quei contract passi en vigur. Genatsch era denton premuraus de surventscher las difficultads internas ed externas. El vuleva

¹⁵⁵⁾ Affaires Etr. Suisse, XXVIII, 209. Tschudi a Méliand la fin digl onn 1637. **Salis**, Memorie p. 380 e s.

¹⁵⁶⁾ **Rott**, V, 229.

¹⁵⁷⁾ **Rott**, V, 224.

cumentar igl uestg en sias pretensius, proteger las missiuns ed aschia cumentar la Curia e disarmar la resistenza da quellas varts viers in contract culla Spagna. El pact ded Innsbruck eran ils dretgs digl uestgiu a Cuera buca rugalai. Pertgei? Quei ei ad interim mo de supponer. Ellas fatschentas de quels dis ed en quella acziun en general dominavan ils catolics cun Genatsch; ils protestants eran reservai. Genatsch para haver dau plaid, de serugalar cugl uestg en ina moda ni l'autra. Suenter il retuorn dad Innsbruck, els dis, che la truppa de Rohan marschava ord la tiara, ha Genatsch affirmau quei en ina brev alla congregaziun a Roma:

Coira li 28 aprile 1637.

Eminni Signori, Signori Colendmi.

Per il zelo che professo giustamente alla propagatione della santa fede apostolica romana, piglio ardire di ricordare con occasione del padre delle missioni P. Ireneo a Sua Eminenza alcuni bisogni.

Mi pare necessario che la prevestura del Canonicato di Coira sia conferita al Signor Canonico Bernardino Gaudentio, huomo di buona dottrina, buona vita, di buon credito et adherenza nel paese.

Per il negotio della Valtelina daremo a Monsignor Vescovo di Coira ogni giusta sodisfattione, sperando che Sua Santità vederà volontieri Grisoni al possesso di quella doppo assicurata intieramente la fede cattolica et stabilendo buon governo. Li comuni di questo paese troveranno qualche honorato partito con detto Monsignor Vescovo per le sue pretensioni, et si troncheranno molti intrighi.

Bisogna provedere alli poveri Padri Cappucini di Fermo (?) per la loro nurritura se si vuole che possano vivere, che hormai alla sicurezza loro non è alcun dubio. Si doverà ancora dare autorità tale alle missioni, a cio non siano costretti ogni volte di scrivere et aspettare li ordini.

Sarebbe opera pia et santa di contribuire qualche cosa al povero Padre Priore del convento dei Domenicani in Coira, quale con suo compagno non cessano giorno e notte per riparare la casa, chiesa, et habitatione.

Voglio sperare che Vostra Eminenza receiverà dalla mia mano questi ricordi con quel affetto che conosco in essa per beneficio della fede cattolica et de tutti li cattolici di questo paese, rimettendomi nel resto al Rev. Padre Ireneo.

Et all'Emin. V. auguro ogni vero contento.¹⁵⁸⁾

¹⁵⁸⁾ Archivio della S. C. de Propaganda Fide. Scritture riferite nelli Congr. generali. Vol. 136, fol. 175.

Quella brev haveva naturalmein era gl'intent de cuntentar il papa e la congregaziun ed impedir il combat de Roma encunter gl'acquist dellas tiaras subditas. Pader Ireneo ha purtau ella a Roma, nua ch'il capetel general dils paders caputschins seradunava en quels dis. Ireneo haveva era l'incumbenza de presentar en num de Gion Flugi las fatschentas digl uestgiu. Personalmein eran las relaziuns cun Gion Flugi bein strusch aschi intimas pli sco els dis della conversiun. Genatsch haveva manteniu bunas relaziuns cun pader Ireneo, che haveva battiu encunter l'elecziun de Flugi, el susteneva e racumandava il canoni Gaudenzio per la prepositura, schegie che quei era in principal adversari de Flugi e che quel combatteva el cun tuts mieds e vuleva dar la honur al canoni Mohr. Ultra de quei sostegn Genatsch en sia brev il pader prior dils dominicans a Cuera, Ramus, che sprezza e denigrescha gl'uestg Flugi avon ils protestants e resda, che gl'uestg vegni dismiss, gie decapitaus. Paucs dis avon ha gl'uestg rugau a Roma ded allontanar quei pader.¹⁵⁹⁾ Pertgei quei secuntener de Genatsch? Pareva Flugi a Genatsch d'impedir tras siu temperament las vias tier pasch e contract? Flugi haveva per sia elecziun (1636) gudiu la simpatia dils protestants e dils catolics en Surselva encunter in candidat austriac; la favur dil nunci e dil pader Rudolf havevan dau la decisiun. Era Genatsch apparteneva en quels temps a quella societad.

Ussa sefidava era gl'uestg bein buca dil tut de Genatsch e dils contrahents dil pact dils 12 de matg, pertgei gl'uost 1637 roga el a Roma, ch'ins vegli impedir il contract culla Spagna, sche quel resalvi buca ils dretgs digl uestgiu.¹⁶⁰⁾ Naturalmein haveva igl uestg surtut tema della resistenza della sinoda. Era ils catolics ord la Ligia grischa han en quels dis dumandau gl'agid de Roma, sinaquei che ils protestants vegnien buca tolerai en tiara subdita. Genatsch veseva en quella condiziun ina necessitad per la pasch; personalmein era el buca scaldaus per il com-

¹⁵⁹⁾ Archivio di Propaganda, Roma. Vol. 136, fol. 143, Coira li 5 Aprile 1637. „In particolare poi supplico le E. loro comandare al P. Generale Domenicano levare di qua il Padre Priore mio poccho amorevole.“

¹⁶⁰⁾ Archivio di Propaganda, Roma. Vol. 136, fol. 146, ils 17 de zer-cladur 1637 e fol. 148, ils 4 d'uost 1637.

bat confessional. Aschia ha el disapprobau il secuntener, resdau da P. Girolamo da Lecce, en ina brev al podestad Lossio en Puschlav, in menader dils catolics.¹⁶⁰⁾ Visavi las pretensiuns de Spagna di el pli tard ils 24 d'avrel 1638: possano ben fare mille Condizioni in materia di religione, aber Z'letst wird man halten, was man mag und kan».¹⁶¹⁾

Ferton che Genatsch tracta cugl uestg e Roma per vegnir tier unitad, serageglia la resistenza davart ils protestants. Las novas de Milaun (Molina), che Leganez damondi las condiziuns de Monsonio, leventan la malaveglia encunter Genatsch ed encunter ils menaders della revolta. Il pievel entscheiva a crer, ch'el seigi cuglienaus; predicants damondan la libertad de cunscienzia era en las tiaras subditas. Surtut ellas X dertgiras regia gronda malcontententscha e quei tonpli che Genatsch ed ils caus han el contract dils 12 de matg 1637 lubiu agl uestg ded eleger per Bormio, Teglio, Traona, Morbegno e Plurs mintg'auter bienni in podestat. Ils 19 e 20 de zercladur alla sinoda

¹⁶⁰⁾ Genatsch scriva: Due cose mi fanno scrivere, viene sparso per certo, che uno Padre Capuccino con nome Geronimo da Lecce habbia publicamente predicato in Poschiavo che l'altra volta foste voi catholici troppo freddi nel estirpare li lutherani, ma che presentandosi l'occasione non dovereste più sparmiare nè a gioeni ne a vecchi. Di gratia signor Podestà fatemi sappere il vero, che realmente non posso credere che la passione habbia trasportato un Padre religioso caritatevole di predicare una tala bestialità, indegnità, porcheria ch'un paese dove le due religioni sono si bene, et se l'ha fatto non volemo perdonargliela. Casca nell'istessa constelatione che uno tale di Tirano (Tesino?) Malencasso habbia detto ad uno che ivi si trovava che bisognava fare l'Agnedina cattolica et se mai si voleva fare che un vespre siciliano sarebbe la mendicità. Scrivo al signor Albertino

Quella brev exista a Roma mo en ina copia: Bergogno li 9 maggio 1678 di V.S. . . . Giovanni Genatio, culla remarca: copia d'una lettera mandata dal signor Colonello Genatio al Signor Podestà Antonio Lossio, ricavata del istesso originale de parolla per parolla. . . . Archivio di Propaganda, Roma. Vol. 343, fol. 166. La brev ei probabel ord igl onn 1637 ni 38. Girolamo ei vegnius deputaus a Milaun ed a Ruma duront las tractativas culla Spagna, per impedir, che la part protestanta vegni tolerada en Valtlina. — Quellas tschontschas d'in vespro serepetan da **mintga vart sco product dil temps** ed ein per dilettants della historia adina puspei in „deletg spirtal“. —

¹⁶¹⁾ Haffter, E., Urkundenbuch p. 151.

a Samada declaran ils decans, ch'els hagien pér miez mars survegniu novas dil project della revolta encunter Rohan e buca saviu s'orientar avunda sur las caussas. En medem temps pretenda Leganez, che las fortezias eregidas en Valtlina vegnien destruidas promptamein. Genatsch senta la forza spagnola. Ils 25 de matg va el cun Guler, Florin e cauderschader Gion Gudegn Schmid de Glion a Milaun, per vegnir tier in marcau ed ina fin e saver intrar el possess dellas tiaras subditas. A Milaun compara era in deputau digl avat Augustin Stöcklin de Mustér e di, ch'igl avat risguardi tuttas tractativas per nunvalleivlas, sch'igl avat sappi buca prender part sez; el serefere-scha sin vegls dretgs.¹⁶²⁾ Leganez ei sil precinct ded ir ell'uiara encunter la Savoia; el tracta cuortamein e damonda puspei, che las fortezias vegnien demolidas, ella fortezia dil Rein duei ina ferma truppa campar sin cuost de Milaun. Cu e co la tiara subdita sappi vegnir surprida dals officials grischuns, vegli el surschar al retg a Madrid, mo vid il tractat de Monsonio vegni midau nuot.¹⁶³⁾ Genatsch e ses condeputai ein consterni. Els vulan bandunar Milaun e puspei encurir ils amitgs a Paris. Cheu arriva Henriquez, che ha capiu aschi bein de far marcau cun Genatsch ad Innsbruck. El giavina ils deputai demaneivel dil camp spagnol ad Alessandria ed Asti, e leu ston Genatsch e ses compogns signar in contract; pertgei ils subdits smanatschan ussa cun ina revolta encunter la pintga truppa grischuna, per saver viver tenor il contract de Monsonio. Il niev contract dils 5 de fenadur 1637 ei ina parafrasa dil pact de Monsonio, surtut a riguard ils uffecis en Valtlina. La questiun, schebein la confessiun evangelica sappi exister en tiara subdita, vegn sur-schada alla decisiuon dil retg de Spagna.

Casnedi offerescha 54 000 talers per cass che las Ligias approbeschien senza condiziun il contract de Monsonio. Leganez porscha «amureivels regals» en aur ed argien; ils deputai refuseschan els e van a casà.¹⁶⁴⁾ Ils caus e congress a Cuera acceptan il contract dils 5 de fenadur ed admoneschian ils cumins

¹⁶²⁾ Sprecher II, 262.

¹⁶³⁾ Salis, Memorie, 382.

¹⁶⁴⁾ Archiv cantonal, Cuera. Cid allas Ligias ils 10 de fenadur 1637; contra Sprecher II, 263.

de confirmar el. Ils adversaris han negin menader — Salis vu buca far quei survetsch — e da 42 vuschs dian mo 19 na. La dieta tarmetta sinquei ina deputaziun en Spagna, consistenta ord Dr. Giachen Schmid, Andreas Sprecher e Rud. de Salis, il sulet catolic. Cun els va era il custos della catedrala Bernhard Gaudenz, il confidau de Genatsch, per representar las pretensiuns digl uestg. Il viadi va sur Milaun a Barcelona e Madrid. Ils subdits tegnan cumpagnia. In miez onn varga, senza che ils deputai vegnien de tractar sur las damondas. Els vulan returnar a casa, e tarmettan Guglielm Schmid a Cuera tiels caus per relatar, co las fatschentas mundien.

Conform al tractat ha la Spagna duront quei temps pagau ils sis regiments grischuns dal november 1636 entochen il mars 1637 cun la summa de 34 000 ducatas. Il mars 1637 ein 5 compagnias de 50 umens l'ina idas en survetsch spagnol a Milaun. Florin e siu frar Crest, Molina e ses frars Giachen e Battesta, Travers, Tscharner ed auters han contractau per il survetsch spagnol. El casti a Sondrio vigilava en quels dis la truppa grischuna sut Rosenroll ed Ambrosius Planta; las compagnias de C. de Castelberg, Crest e Raget de Montalta e Rudolf de Marmels stavan a Rehanau e sil pass s. Glici; a Clavenna fuva la truppa de Genatsch, Gion Tscharner, Bavier, Albertini e Nutt Genatsch. Era quella truppa dueva la Spagna pagar, mo buca cumandar; a Milaun muncavan savens era ils daners e la buna veglia. — La fortezia dil Rein era ina spina els églis dils Confederai; els temevan, ch'ella savessi in bi di vegnir en possess della Spagna e digl imperi e daventar in prighel per las Ligias e per ils Confederai. Genatsch vuleva mantener ella; cun Gion Tscharner, ils capitanis Gion Coray e Gion Pierder Enderlin eis el ils 29 de fevrer ius tier la dieta federala a Baden; el ha fatg valer, ch'ils Grischuns stoppien ad interim mantener quella fortezia per la segirezia interna ed externa, e quei serefereva surtut sils moviments dell'armada de Bernhard de Weimar. Quel pren suenter ses buns success egl Elsass, Säckingen, Laufenburg, Waldshut e plitard l'entschatta de mars 1638 Rheinfelden, e siu pertratg ei de cun agid della Frontscha sepatrunar dil pass s. Glici e dellas vias ell'Italia. A Milaun ei il guvernatur en quitaus, che las Ligias savessien u curdar en mauns de Bernhard de Weimar ni sebetter da

quella vart; dabot arriva in emissari a Cuera, per far attents sil prighel ed empermetter agid e protecziun, e la dieta concluda ils 9 de mars 1638 de serrar il pass a tuttas pusonzas. Strusch ei quei prighel vargaus, arriva Guglielm Schmid ord Spagna e resda, ch'il retg de Spagna vegli absolutamein buca tolerar ils protestants en Valtlina.

Quellas novas de Madrid serasan; ils decans della sinoda evangelica rapportan la caussa als predicants, s'excusond, ch'els hagien buca pli baül impediu l'allianza culla Spagna. Ils decans Gieri Saluz, Luci Gabriel e Hartmann Schwarz comparan ils 17 d'avrel avon la dieta e lamentan, co els e lur concartents seigien vegni menai davos la cazola. Ils deputai catolics ord la Sur-selva insistan, che l'allianza vegni serrada tuttina e che nuot vegni tratg alla liunga, e Guglielm Schmid survegn secretamein dals caus e sut influenza de Genatsch las ordras de dar siu consentiment per las pretensiuns dil retg e serrar marcau, e quei vegn tut discus era relatau a Leganez a Milaun. — Ils caus ein vegni empau sut la toppa de Genatsch. A Clavenna eis el il nausch despöt. Stampa, in adversari de Genatsch, selubesch de ludar U. de Salis sco bien officier ed administratur a Clavenna. Genatsch lai cuortamein mazzar Stampa.¹⁶⁵⁾ Quella situazion penibla culla Spagna ed il secuntener de Genatsch sez ein per el de greva impurtonza; ils amitgs bandunan el.¹⁶⁶⁾ Silla dieta a Tavau l'entschatta d'uost 1638 aulza Guler la vusch encunter las tractativas spagnolas, ed entuorn el serimnan ussa pli e pli umens protestants, ils predicants ed ils adversaris personals de Genatsch. Sia posiziun ei grevamein periclitada. Il schaner 1639 tuorna la truppa grischuna, il regiment Travers e las compagnias de Florin, Molina, Genatsch e Buol a casa; mo Pieder Rosenroll resta cun 200 umens a Milaun. La truppa duei proteger la patria, per cass che Bernhard de Weimar s'avvischinass. Genatsch ei sez pauc edificaus dallas relaziuns

¹⁶⁵⁾ **Sprecher II**, 276.

¹⁶⁶⁾ Vico scriva ils 6 de mars 1638 a Veniescha: „Intorno al Gianatio parimente chiaro si scopre che gli andassero sempre più mancando in paese li amici e confidenti, mentre non più come prima veniva lui stimato ne honorato dalli Colloneli Buol, Guller e Scarner, et ciò non era certo dissimulatione per dar gusto a quelli che non gli sono troppo amici, ma per altre più vere occasioni e rincontri.“

cun la Spagna. Ils 3 de schaner vegn el da Clavenna a Cuera; quella sera derscha in orcan la tuor della baselgia s. Gieci; il pievel declara quei silsuenter per ina schliatt'enzenna. Genatsch crei, ch'il temps seigi favoreivels, per sepatriunar culla forza dalla Valtlina, nominar ils officials e far cuortamein ina fin a quella fiera cul retg de Spagna. Quei vegn a Milaun ad ureglia. Leganez tarmetta gl'ambassadur Francesco Casati a Cuera, per impedir ina tala interpresa. Ils 18 de schaner arriva Casati a Cuera. Sis dis pli tard vegn Genatsch assassinaus. A Casati era l'intenziun dils adversaris enconuschenta; el ha cuschiu.¹⁶⁷⁾

Tgi ei stau igl assassin de Gieri Genatsch e per tgei motivs? Genatsch sesa ina sera ell'ustria de Luregn Fausch, in anterius caputschiner, en societad de Guler, Rudolf Travers, Gion Tscharner ed Ambrosi Planta. Els beiban, e Genatsch giavischha musicants, che vegnan spert neutier. Encunter las endisch sesaulzan ils officers; ils survients envidan lur latiarnas, ins vul ir a casa. En aquella ses'arva igl ésch; ina mascra passa ella stanza, porscha a Genatsch il maun, trai la pistola ord sac, setta, mo senza tuccar Genatsch mortalmein. Dal fem e plum stezza la glisch; ussa sefulscha ina roscha de 25—30 umens, per gronda part mascrai, en stiva, e Genatsch, che ei seviults, per tschaffar il candelier e sedefender, survegn ina frida cun ina segir ella totona, croda giun plaun e sut las fridas mortalas, che suondan, miera el. Il di suondont vegn el sutterraus ella catedrala; il pader caputschin Justus pareglia Genatsch el plaid funeral cun Judas Maccabeus dil Veder Testament. — Ina inquisiziun vegn instradada, mo prest supprimida. Ella di pauc: las mascras ein per gronda part vegnidias da Haldenstein, nua Genatsch fuva odiaus dal barun Otto de Schauenstein e dal pievel. La fin digl onn 1634 haveva Landé giu dumandau leu quartier per sia truppa. Il barun de Schauenstein haveva cun bien dretg fatg valer, ch'el seigi in prenci digl imperi e buca obligaus alla Frontscha. Schauenstein ha schau rumper giu la pun de comunicaziun. Landé ha sinquei dau camond al colonnel Salis ded attaccar cun treis compagnias Haldenstein, sforzar il

¹⁶⁷⁾ Haffter, E., p. 397, Sprecher II, 284, Salis, Memorie 401. Vico al senat, Turitg ils 28 de schaner 1639. Rott, V, 316. Zeitschrift f. Schweizer Gesch. IV, 1925.

barun de remetter la pun, ed enstagl de 40 umens duei Genatsch marschar cun sia compagnia franca de 150 umens a Haldenstein, il barun hagi de dar quartier e lenna. — Il mars ha Landé dau camond de liberar Haldenstein dalla truppa. Quei incap haveva fatg schliet saun ed era aunc buca emblidaus. Ils umens ni sbiers en masbra eran pustai e pagai per lur delict. Ella casa de Guler a s. Margreta avon la Portasu a Cuera vegnan umens de Malans gastai la sera della terribla opra. Guler para esser il menader dell'acziun, il barun de Haldenstein siu gidonter. La sventireivla situaziun, che Genatsch haveva instradau culla Spagna, il prighel e la sort ch'el haveva preparau als concartents de Guler, la persuna de Genatsch sezza, paran d'esser ils motivs. Da l'autra vart reviva la speranza sin Bernhard de Weimar e la Frontscha e nutrescha ils sentiments politics e confessionals de Guler e biars compatriots. Il menader spagnol croda. Sia veta, siu caracter despotic, brutal e nuncalculabel per ses concarstgauns levgieschan als adversaris de preparar ad el la tresta sort. Tgi ein sper Guler ils congiurai encunter la veta de Genatsch? El sez, che ha purtau tontas masbras, croda tras armas brutalas de diversas masbras, ch'ein aschi grev ded identificar sco sias atgnas. Sprecher pretenda, che Rudolf Planta, il fegl de Pompeius e Conrad Beeli seigien stai alla testa dils umens masrai. Gieri Thüringer de Haldenstein hagi sittau e Barclamiu Bi(e)rtsch dau la frida mortala culla segir.¹⁶⁸⁾

¹⁶⁸⁾ Las relaziuns de Genatsch e Rudolf Planta e siu nevs Rudolf, il tegi de Pompeius, ein suenter la conversiun de Genatsch pauc semi-gliuradas; mo in mussament, che Rudolf seigi igl actur ei buca de prestar. La fama e fantasia han accusau la dunna de colonnel Rudolf Travers, Catarina Planta, feglia de Pompeius e suspectau ils Plantas, Travers, Tscharner, Schauenstein, Salis, gie gl'uestg, Casati e Richelieu e fatg ord Cuera e las Ligias „ina tauna de morders“, aschia en Zeitschrift für Schweizer Geschichte IV,4, 1925, ina scrutaziun primitiva. — Ei fuss stau ina curiosa tactica per ils congiurai encunter Genatsch, ded encuirir tonts gidonters per in delict encunter in um, che viveva leutier aunc senza precauziun. Nus abstrahein de plidar cheu sur quei evenement; el vegn examinaus sin fundament de niev material.

La stad 1639 vegn il pader Marinus ella Rezia a visitar la missiun, ed en siu liung e detagliau rapport scriva el sur Genatsch (Archivio di Propaganda. Miscellanea-Svizzeria. Visitatio Fratrum Min. Cap. Provinciae Brixiae in partibus Rhaetorum etc. per P. Marinum MDCXXXIX):

Las simpatias per la Frontscha retuornan, ed a Paris vegn il pertratg de reconquistar la Valtlina. Priolo tuorna a Cuera e secussegli cun Guler, il menader ella fortezia spel Rein. A Madrid vegn sinquei priu ina resoluziun energica. Ils deputai vegnan honorai e festivai e relaschai cun l'empermischun, ch'il retg vegni ad ademplir ils giavischs dellas treis Ligias. La dieta dil mars 1639 ei sil precinct de prender possess dils vegls dretgs ed uffecis en Valtlina, cura las bunas novas arrivan da Madrid. Dr. Schmid e ses condeputai arrivan ils 21 de matg a casa. La dieta elegia ils deputai a Milaun, per signar il contract definitiv, numnaus la pasch perpetna! Da 67 cumins voteschan 37 per il contract. El cuntegn las suondontas stipulaziuns: Ils Grischuns perdunan ed emblidan tut il passau dapi 1620; ils ufficials vegnan elegi dalla dieta grischuna ord treis ni sis candidats, propuni dals cumins, che han mintgamai il dretg sigl uffeci; il

Habuit quidem Samada in superiori Engadina virum in utramque partem generosum Georgium Gennatium, qui inter omnes calvinianae sectae facile princeps, velut alter Saulus abundantius aemulator existens haereticorum dogmatum, Patrum, et catholicorum fuit acerrimus persecutor, veruntamen cum doctrinae esset studiosus, Cardinalis Bellarmini controversias evolvens, et aliorum catholicorum argumenta fidei perspicaci mente recogitans, aliquo se lumine illustrari sentiens, frequentes cum Patribus instituit disputationes, quibus evanida suaee sectae fundamenta cognoscens, ampliori in dies veritatis lumine illustrabatur; donec aliquando totus mutatus publice se catholicum esse professus est summo Patrum et catholicorum gaudio, ut qui Saulum habuerunt consequentem, iam Paulum probarent protegentem. Sed quae fecit Saulus, passus est Paulus, omnes enim quos prius habebat amicos sustinuit inimicos, ac malignos insidiatores. Institerunt enim multiplicatis epistolis, satanicisque promotionibus, ut ipsum a proposito diverterent, quibus eruditis rationibus respondens ipsos etiam ad veritatis lucem de tenebris (r)educere conabatur. Cum autem verus esset Georgius, et in arte militari strenuus, apud omnes christianos principes maximo in pretio semper est habitus, cum animi fortitudine ac prudentia in agendis, sapientiaque praestaret in consiliis, factus catholicus in se omnium oculos et corda convertit; quod magis odii et invidiae fomitem insidiatoribus ministravit. Et quamvis admonitus de insidiis ut prudenter sibi caveret, nihil tamen praetermisit in verbo, aut in opere, quod in publicum patriae et fidei bonum cederet nihil de insidiis, neque de propriae vitae incolumitate curandum respondens donec Curiae publicis negotiis incumbentem nocturno tempore aggressum occiderunt, in nocte conversionis sancti Pauli, ut qui cum Saulo fuerat persecutor, esset cum Paulo triumfator.

vicari elegian ils subdits ord treis candidats proponi. A mintga act ni funcziun de giudicatura penala assista in representant dils subdits; tuts vegls statuts e privilegis veggan garanti; ellas tiaras subditas vegg mo il cultus catolic toleraus; cun excepziun dils ufficials, astgan protestants buca avdar pli che treis meins ella Valtlina. Ord la Ligia grischa van ils suondonts umens a Milaun per la confirmaziun dil contract: Conradin de Castelberg, Rudolf de Marmels, Crest de Florin, Christoph de Rosenroll, Gion Schorsch ed il scarvon della Ligia, Ulderigo a Calberg.

Guler e ses partisans protestan a Glion, ed il medem fan cumins e vischnauncas sco Glion, Trin, Tumein, Malans; ils partisans de Guler ein: Crest de Montalta, Giachen de Planta, Hercules de Salis, Barclamiu Cazin, Crest Jeuch, Daniel Saluz, Hans Nuttli, Carli a Marca, Thomas Schauenstein, Conradin Planta a Zuoz, Giachen Molina, Conradin Beeli, Andreas Finer, Gion Antoni Travers, Pieder Planta e Crest Casut.¹⁶⁹⁾) Richelieu vul buca dar agid, ed ina cunteracziun ei buca pusseivla. — Ils 3 de settember vegg la pasch perpetna signada a Milaun, ed ils 11 de settember arrivan ils ufficials grischuns puspei elas tiaras subditas. —

¹⁶⁹⁾ Rott, V, 346—348.